

Gowaltys ny Beiy

Liorish

George Orwell

Cabdil I

Va Mnr. Jones, jeh Gowaltys y Vannor, er chur fo ghllass thieyn ny kiarkyn son yn oie, agh v'eh ro scoorit dy chooinaghtyn er dooney ny tuill-chosnee. As kiarkyl y hoilshey veih'n londeyr echey daunsey veih çheu gy heu, ren eh loaganey harrish y chlose, ren eh brebbal jeh e vootsyn ec dorrys ny cuillagh, ghow eh er-e-hon's glonney yerrinagh dy lhune veih'n vullag 'sy thie strullee, as hie eh roish gys e lhiabbee, boayl va Bnr. Jones strinnoogh hannah.

Cho Leah's va'n soilshey 'sy çhamyr lhiabbagh er ny vooghey va gleashaghey as bennalt ooilley trooid troggalyn y ghowaltys. Va'n faaue er n'gholl mygeayrt feiy'n laa dy row ashlish quaaagh er ve ec çhenn Vajor, y collagh muck Bane Meanagh aundyragh, yn oie roish shen as dy row eh gearree insh mychione eck da ny beiy elley. V'eh coardit dy jinnagh ad ooilley çheet cooidjagh 'sy toalt vooar cha Leah's va Mnr. Jones kiart magh ass y raad. Wheesh arrym v'er Shenn Vajor (myr v'ad rieu gra rish, ga dy row eh er n'gholl er taishbyney fo'n ennym Aalid Willingdon) dy row dy chooilley pheiyagh lane-arryltagh dy choayl oor dy chadley dy chlashtyn ny v'eh dy ghra.

Ec un chione y toalt vooar, er sorçh dy ardan troggit seose, va Major ny lhie hannah er e lhiabbagh dy choonlagh, fo londeyr va croghey veih darrag. V'eh daa vleyn jeig dy eash as er y gherrid v'eh er jeet dy ve beggan roauyr, agh v'eh foast ny vuc as ymmyrkey ard-ooasle echey, lesh cummey creeney kenjal ny yei nagh row ny tuskyn echey rieu er ve giarrit. Roish foddey ghow ny beiy elley toshiaght er çheet stiagh as jannoo souyr ad hene rere ny caghlaaghyn saase oc hene. Hoshiaght haink ny three moddee, Bluebell, Jessie as Pincher, as eisht ny muckyn, ren lhie sheese 'sy choonlagh kiart jeeragh jeh'n ardan. Hie ny kiarkyn gys ny lhie uinnag, ren ny calmaneyn bennalt seose gys ny rafteyryn, ren ny kirree as yn ollagh lhie sheese çheu-chooylloo jeh ny muckyn as ghow ad toshiaght er caigney keerey. Haink yn daa chabbyl cart, Boxer as Clover, stiagh cooidjagh, shooyl feer voal as cur sheese ny yngnyn mooarey geayshteenagh oc dy braew kiarailagh er aggle dy beagh baagh beg ennagh follit 'sy choonlagh. Va Clover ny laair phoinnee voiroil çheet gys y vean eash, nagh ren rieu aa-chosney y cummey eck lurg y chiaroo harragh eck. Va Boxer ny vaagh feer vooar dy jarroo, bunnys hoght laueyn jeig er ard, as cho lajer as daa chabbyl cadjin elley erbee cooidjagh. Ren schimmeig vane sheese e stroin cur cummey ersyn beggan bolvaneagh, as ayns rieughid cha row tushtagh echey jeh'n chieid rang, agh va arrym ersyn ec dy chooilley pheiyagh son kinjid yn ambee echey as ny pooaraghyn ard-yindyssagh dy obbyr echey. Lurg ny cabbil haink Muriel, y ghoayr vane, as Benjamin, yn assyl. Va Benjamin y baagh shinney er y ghowaltys, as y fer smoo correydank. S'anvennick v'eh loayrt, as tra ren eh, dy cadjin v'eh dy chur raa granganagh ennagh – myr sampleyr, yinnagh eh gra dy row Jee er chur da arbyl dy reayll ersooyl ny carchuillagyn, agh dy bare leshyn nagh row arbyl er ve echey, as nagh row carchuillagyn ayn. Ny lomarcan mastey beiy y ghowaltys, cha ren eh rieu garaghtee. Dy beagh feysht ersyn son yn oyr, yiarragh eh nagh row eh fakin veg dy gharaghtee er. Ny yei shen as ooilley, gyn goaill-rish dy foshlit, v'eh slane currit da Boxer; va'n jees jeu dy cadjin ceau ny laghyn oc Jedoonee cooidjagh 'sy phaddag veg çheu-hoal jeh'n ooylagh, fassaghey cosh ry chobey gyn rieu gra veg.

Va'n daa chabbyl kiart er lhie sheese tra haink aailagh dy ein hunnag, as y voir cailt oc, shooyl ayns strane stiagh 'sy toalt, geegey dy faase as rouail veih çheu gy heu dy gheddyn boayl ennagh raad nagh beagh ad currit fo chosh. Ren Clover sorçh dy voalley mygeayrt-y-moo lesh e lurgey hoshee vooar, as ren ny ein hunnag clussaghey sheese çheusthie j'ee as çhelleeragh haink saveen orroo. Ec y vinnid s'jerree haink Mollie, y laair volvaneagh aalin vane va tayrn cart veg Mnr Jones, keimeragh dy dendeaysagh stiagh ayn, as ish caigney er glout dy hugyr. Haink ee gys boayl faggys da'n oaiie as ghow ee toshiaght er cloie lesh y e mwing, as treisht urree dy hayrn geill da ny rybbanyn jiargey va feeit aynjee. Yn fer s'jerree jeu ooilley, haink y kayt bwoirrin, ren jeeaghyn mygeayrt, 'syn aght cadjin, son y voayl s'çhoe, as fy yerrey ren ee jingey ee hene stiagh ayn eddyr Boxer as Clover; ayns shen ren ee cronnanne dy booiagh trooid magh oraid Major gyn eaishtagh rish fockle jeh ny v'eh dy ghra.

Va ooilley ny beiyne kionefenish nish er-lhimmey jeh Moses, y feeagh meen, va cadley er slattag çheu-chooylloo jeh dorrays ny cuillagh. Tra honnick Major dy row ad ooilley er n'yannoo souyr ad hene as dy row ad fieau dy friosagh, ren eh glenney e scoarnagh as ghow eh toshiaght:

"Chumraagyn, ta shiu er chlashtyn hannah mychione yn ashlish whaagh haink orrym riyer. Agh nee'm çheet er yn ashlish ny s'anmey. Ta red ennagh elley aym dy ghra hoshiaght. Ta mee smooïnaghtyn, chumraagyn, nagh bee'm meriu rish ymmodee meeaghyn ny sodjey, as roish my jeanyim geddyn baase, ta mee gennaghtyn dy nee my churrym eh dy chur diuish lheid y tushtey as t'er jeet hym. Ta bea liauyr er ve aym. Ta mooarane traa er ve aym son smooïnaghtyn choud's va mee my lhie my lomarcan ayns my stholl, as er-lhiam dy voddin's gra dy vel mee toiggal dooghys y vea 'sy chruinney shoh cho mie as ta baagh erbee ta nish bio. T'eh mychione shoh dy vel mee gearree loayrt riu.

"My te, chumraagyn, cre vees dooghys y vea t'ain? Lhig dooin goaill-rish: s'treih as s'tooilleilagh as s'giare ta nyn meaghyn. Ta shin ruggit, cha nel wheesh bee currit dooin agh nee freayll yn ennal ayns nyn girp, as t'adsyn jin as ta abyel eignit dy obbraghey gys y vreneen s'jerree jeh nyn niart; as 'syn eer hallid ta'n ymmydoilid ain er jeet gy kione ta shin currit gy baase lesh dewilys graney. Cha nel baagh erbee ayns Sostyn toiggal bun y vaynrys ny'n soccar lurg da çheet dy ve un vlein dy eash. Cha nel baagh erbee seyr ayns Sostyn. Treihys as y vondiaht ta bea vaagh: shen y firriney lhome.

"Agh vel shoh ayns rieughid rere dooghys? Vel eh er yn oyr dy vel y çheer shoh ain cho moal nagh vel eh cur seose bea choar dauesyn ta baghey aynjee? Cha nel, chumraagyn, shen ta mee dy ghra milley cheayrt, cha nel! Ta ooir Hostyn troaragh, s'mie ta'n emshyraght, ta ablid eck cur bee ayns slane palçhey gys earroo braew foddey smoo dy veiyne na ta baghey aynjee nish. Oddys yn un ghowaltys shoh ain cummal seose dussan dy chabbil, feed booa, cheeadyn dy chirree – ooilley jeu baghey ayns souyr as ayns ooashlid ta bunnys erskyn credjal ain ec y traa t'ain. Cre'n fa eisht vel shin tannaghtyn 'sy stayd trimshagh shoh? Er yn oyr dy vel bunnys slane troar y laboraght ain goll er geid voin liorish deiney. Ayns shen, chumraagyn, ta'n aght feayslee da ooilley ny doilleeidyn ain. Ta coontey giare jeant jeh ayns un fockle – Dooïnney. Cha nee agh Dooïnney ta'n un noid ain ayns rieughid. Fow-jee rey rish Dooïnney veih'n chooish, as ta moir y voirey dy accyrys as dy rour obbyr scryssit magh dy braght.

"She Dooïnney ta'n cretoor ynrican ta goaill gyn troarey. Cha nel eh cur bainney, cha nel eh brey oohyn, t'eh ro faase dy hayrn y cheeaght, cha nod eh roie tappee dy liooar dy hayrtyne conneeyn. Ny yei t'eh ny hiarn harrish ny beiyne ooilley. T'eh cur orroo obbraghey, t'eh cur

back daue y towse sloo lhome nee lhiettal ad veih goll neeu, as y chooid er-mayrn t'eh freayll er-e-hon hene. Ta'n laboraght ain traauue yn ooir, ta'n toarrey ain jannoo troaragh ee, agh ny yei shen cha nel fer erbee jin as s'leshyn ta veg agh e chrackan lhome echey hene. Shiuish vooaghyn ta mee fakin roym, quoid milley galloon dy vainney va currit lieriu car ny bleeaney shoh chaie? As cre haghyr rish y vanney shen lhisagh v'er hroggal lheyee hramylt? Ta dagh bine jeh er n'gholl sheese scoarnee nyn noidyn. As shiuish chiarkyn, quoid ooh vel shiu er vrey 'sy vlein shoh chaie, as quoid jeh ny oohyn shen va rieuu guirt son ein? Ta ny fir elley ooilley er n'gholl gys y vargey dy chosney argid da Jones as e gheiney. As uss, Chlover, c'raad ta ny kiare sharree ruggyr uss, as lhisagh ad er ve cooney as taitnys y henn eash ayd? Va cagh creckit ec un vlein dy eash – cha jean oo arragh fakin fer erbee jeu reesht. Myr cooilleeney son ny kiare traaghyn lhie hoalley ayd as ooilley dty laboraght ayns ny maghern, cre va rieuu ayd's er-lhimmey jeh lowanseyn sloo as stholl?

"As cha nel eer ny beaghyn ain ta shin ceau lowit dy roshtyn y seihll dooghyssagh oc. Er-my-hon hene cha nel mee gaccan, er yn oyr dy vel mish fer jeusyn ta aighoil. Ta mee daa vlein jeig dy eash as ta ny shlee na kiare cheead slught er ve aym. Myr shoh ta bea dooghyssagh ny muickey. Agh cha nel baagh erbee scapail y skynn dewil fy yerrey hoal. Shiuish, vuckyn keish ta nyn soie roym, nee dagh fer jiu screeagh magh nyn mioys ec y vlock çheusthie jeh un vlein. Gys y red atçhimagh shen t'eh orrin ooilley çheet – booaghyn, muckyn, kiarkyn, kirree, dy chooilley pheigh. Cha nel erree veg share eer ec ny cabbil as ec ny moddee. Uss, Voxer, yn eear laa nee ny muskylyn mooarey shen ayd's coayl y pooar oc, nee Jones uss y chreck da'n vuitçhoor cabbil, nee giarrey dty scoarnagh as uss y vroie son ny coyin hynnagh. Er son ny moddee, tra t'ad çheet dy ve shenn as gyn feeackle, ta Jones kiangley breek mygeayrt nyn mwannalyn as t'eh baih ad ayns y loghan sniessey.

"Nagh nee baghtal eh dy bollagh, eisht, chumraagyn, dy vel uilk ooilley y theihll shoh çheet veih tranlaase liorish deiney? My vees shin agh geddyn rey rish Dooiney, by lhiennyn hene veagh troaryn y laboraght ain. Bunnys çhelleeragh oddagh shin çheet dy ve berçhagh as seyr. Cre, eisht, ta ry yannoo ain? Cre, agh dy obbraghey oie as laa, corp as annym, ry hoi cur haart kynney deiney! Shen y çhaghteraght aym diuish, chumraagyn: Irree Magh! Cha s'aym's cuin harrys yn Irree Magh shen, foddee ayns shiaghtin ny ayns cheead blein, agh ta fys aym, cho shicky as ta mee fakin y coonlagh shoh fo my chassyn, dy gerrid ny fy yerrey dy bee cairys er ny yannoo. Jeerree-jee er shen, chumraagyn, trooid cooid ghiare er-mayrn ny beaghyn eu! As erskyn ooilley, insh-jee y çhaghteraght shoh aym dauesyn ta çheet nyn yei euish, dy vod sheelogheyn ry heet tannaghtyn lesh y streeu derrey vees barriaghtagh eh.

"As cooinnee-jee, chumraagyn, nagh nhegin da'n chiarail trome eu tuittym. Cha nhegin da argane erbee cur shiu er-shaghryn. Ny jean-jee eaishtagh tra t'ad ginsh diu dy vel sym co-reggyrtagh ec Dooiney as ny beiy, dy vel berçhys yn derrey yeh berçhys y jeh elley. She breagyn ooilley t'ayn. Cha nel Dooiney geiyrt er cooishyn cretoor erbee elley er-lhimmey jehsyn hene. As nyn mast'oc, ny beiy, lhig da slane unnaneys ve ayn, slane cumraagys 'sy strep. Ta deiney ooilley ny noidyn. Ta beiy ooilley nyn gumraagyn."

Ec y tra shoh va musthaa mooar ayn. Choud's va Major loayrt, va kiare roddanyn mooarey er snaue magh ass ny tuill oc as v'ad nyn soie er nyn gerrooyn jerree, geaishtagh rish. Doaltattymagh va ny moddee er n'ghoail reayrt sooilley orroo, as cha nee agh liorish ratçhal dy bieau gys ny tuill oc dy ren ny roddanyn sauail y bioys oc. Ren Major troggal seose e chrubbane son tostitid.

"Chumraagyn," as eshyn, "shoh cooish as shegin dooin cur reaghys urree. Ny cretooryn feie, gollrish roddanyn as conneeyn – vel ad nyn gaarjyn ny nyn noidyn? Lhig dooin ceau teiy er. Ta mee cur y feysht shoh roish y çhaglym: Nee cumraagyn roddanyn?"

Va'n teiy jeant çhelleeragh, as v'eh coardit liorish tromlagh lane niartal dy nee cumraagyn va roddanyn. Cha row agh kiare cremeyderyn ayn, ny three moddee as y kayt, ren ceau, v'eh feddynit ny sanmey, teiy er dagh çheu. Hie Major er:

"S'beg elley aym dy ghra. Cha nel mee agh gra reesht, cooinee-jee dy kinjagh er currym y noidys eu rish Dooinney as rish ooilley e raaidyn. Cre erbee vees gimmeeaght er daa lurgey, she noid eh. Cre erbee vees gimmeeaght er kiare lurgaghyn, ny ta skianyn echey, she carrey eh. As cooinee-jee neesht, ayns caggey noi Dooinney, nagh nhegin dooin çheet dy ve cosoyley rish. Eer tra ta shiu er chur laue y varriaght er, ny jean-jee arrish er ny drogh-oashyn echey. Cha nhegin da baagh erbee arragh cummal ayns thie, ny cadley ayns lhiabbee, ny ceau eaddagh, ny iu jough meshtallagh, ny smookal thombaagey, ny bentyn rish argid, ny goaill ayn ayns dellal. S'olk ta oashyn Dooinney ooilley. As, erskyn ooilley, cha nhegin da baagh erbee arragh tranlaase er e horç hene. Faase ny lajer, aghtal ny moal, she braaraghyn shinyn ooilley. Cha nhegin da baagh erbee arragh marroo baagh erbee elley. S'corrym ta beiyn ooilley.

"As nish, chumraagyn, nee'm insh diu mychione yn ashlish v'aym riyer. Cha noddym cur coontey jeh'n ashlish shen diu. Ashlish v'eh jeh'n theihll myr bee eh tra vees Dooinney er ny lheie ersooyl. Agh v'eh cur mee ayns cooinaghtyn jeh red ennagh va jarroodit aym rish foddey. Ymmodde bleantyn er dy henney, tra va mee my vannoo, yinnagh my voir as ny muckyn arkagh elley goaill shenn arrane, jehsyn bione daue veg agh y carr as ny three fockleyn toshee. Bione dooys y carr shen ayns my lambaanid, agh s'foddey er dy henney eh neayr's hie eh magh ass my chooinaghtyn. Agh riyer, haink eh back dooys 'syn ashlish aym. As ny smoo na shen, haink fockleyn yn arrane back neesht – fockleyn, ta mee shickyer, va goll er goaill liorish ny beiyn foddey er dy henney as va cailt ass cooinaghtyn rish sheelogheyn. Nee'm goaill diu yn arrane shen nish, chumraagyn. Ta mee shenn as s'garroo ta my chora, agh lurg dou ynsaghey diu y carr, foddey shiu goaill eh ny share er-nyn-son euish hene. T'eh enmyssit 'Beiyn Hostyn'."

Ren Shenn Vajor credal dy ghlenney e scoarnagh as ghow eh toshiaght er goaill arrane. Myr dooyrt eh, s'garroo va'n chora echey, agh ghow eh arrane mie dy liooar, as she carr greese v'ayn, red ennagh eddyr 'Clementine' as 'La Cucaracha'. Shoh va ny fockleyn:

Veiy Hostyn, veiy Nerin,
Veiy ass çheer erbee 'sy theihll,
Clasht-jee rish y çhaght'raght mie aym
Jeh tra share çheet, cur-jee geill.

Hig yn laa, nish ny fy yerrey,
Tra vees Dooinney currit mow,
Gyn tranlaase, bee magheryn Hostyn
Cur nyn droar son beiyn vraew.

Cha bee cullee er y ghreeym ain,
Cha bee fainey ayns y stroin,
Cha bee bealragh ny jialg vrasnee,

Cha jean kip dyn imman roin.

Erskyn credjue bee ny troaryn,
Curnaght, corkey, faiyr as oarn,
Shamrag, poanraghyn as mootyn,
Bee ad ain as ec nyn gloan.

S'gial bee magheryn eisht ayns Sostyn,
Nee ny glish roie sheese dy glen,
S'ooorey neesht nee flannyn sheidey,
Tra hig seyrsnys y laa shen.

Lhig dooin streeu, eisht, son y laa shen,
Ny geddyn baase ayns eab cho mooar.
Son nyn seyrsnys cheet ry cheilley,
Guiy as cabbyl, kiark as booa.

Veiy Hostyn, veiy Nerin,
Veiy ass cheer erbee 'sy theihll,
Clasht-jee rish y chaght'raght mie aym
Jeh tra share cheet, cur-jee geill.

As adsyn goaill yn arrane shoh, va ny beiy greesit ass myghin. Bunnys roish my daink Major gys y jerrey jeh, v'ad er n'ghoaill toshiaght er goaill yn arrane er-nyn-son hene. Va eer ny fir smelley er n'yinsaghey y carr as fockle ny ghaa, as adsyn as va aghtal, gollrish ny muckyn as ny moddee, va'n clane arrane oc ayns nyn gooinaghtyn cheusthie jeh minnid ny ghaa. As eisht, lurg kuse dy eabyn toshee, ren beiy ooilley y ghowaltys brishey magh lesh 'Veiy Hostyn' lesh un aigney. Ren yn ollagh eh y eam, as ny moddee eh y ghoanstyrnee, as ny kirree eh y vaaley, as ny cabbil eh y hutternee, as ny thunnagyn eh y whackal. Wheesh taitnys v'oc er yn arrane dy ren ad eh y ghoaill dy slane queig cheayrtyn ny yei y cheilley, as foddee dy jinnagh ad v'er hannaghtyn lesh goaill eh fud ny hoie er be dy ren red ennagh brishey stiagh orroo.

Dy neu-aighoil, ren y musthaa doostey Mnr. Jones, ren lheimmey magh ass y lhiabbee, as eh shickyr dy row shynnagh 'sy chlose. Ghow eh greim jeh'n ghunn va rieu ny hassoo ayns corneil e hamyr lhiabbagh, as ren eh lhiggey orraghey dy ghrineyn earroo 6 stiagh 'sy dorrhaghs. Ren ny grineyn towlaghey ad hene stiagh ayns boalley y toalt as ren y chaglym irree ass dy siyragh. Ren dy chooilley pheiyagh roie er chea gys y lhiaght cadlee echey hene. Ren ny eanlee lheimmey seose er ny slattyn oc, ren ny beiy lhie sheese 'sy choonlagh, as va'n slane gowaltys ny chadley ayns shallid.

Cabdil II

Three oiaghyn ny s'anmey hooar shenn Vajor baase dy sheeoil 'sy chadley echey. Va'n corp marroo echey oanluckit ec bun yn ooylagh.

Haghyr shoh moghey ayns Mee Vayrt. Ayns ny three meeaghyn lurg shen va palchey goll er jannoo dy follit. Va loayrtys Major er chur da beiy s'tushtee y ghowaltys toiggalys thalk noa er bea. Cha row fys oc er tra harragh yn Irree Magh hug Major faaishnys er, cha row oyr oc son smooinghtyn dy beagh eh ayns ny laghyn oc hene, agh hoig ad dy baghtal dy row

currym orroo jannoo aarloo er-e-hon. Ren yn obbyr dy ynsaghey as dy stiurey ny fir elley çheet dy dooghysaghey er ny muckyn, as enn oc dy cadjin myr ny fir s'aghtaley mastey ny beiyn. Ard-cheimnagh mastey ny muckyn va daa chollagh muck aeg enmyssit Snowball as Napoleon va Mnr. Jones troggal dy chreck. She collagh muck mooar Berkshire va Napoleon, yn un Verksire er y ghowaltys, as eh jeeaghyn dy ve beggan elgyssaghey, nagh row monney son loayrt, agh va goo echey dy row reddyn çheet rere yn aigney echey. Va Snowball ny chollagh muck smoo bioal na Napoleon, ny s'gastey 'sy loayrtys echey as ny smoo crootagh, agh va sleih smooïnaghtyn nagh row cho dowin va'n persoonid echey. She muckyn keish va ooilley ny collee vuc elley er y ghowaltys. Y fer share er enn ny mast'oc, she collagh muck beg roayr va enmyssit Squealer, feer phussaghey, as sooillyn meekey echey, lheitys gastagh, as coraa gheyre-ving. V'eh ny loayreyder yindyssaghey, as tra v'eh resooney magh cooish doillee ennagh va beoyn echey dy skibbylt veih çheu gy heu as dy scuitçhal y famman echey va feer vreigagh ayns agh ennagh. Dooyrt ny fir elley mychione Squealer dy voddagh eh çhyndaa doo dy ve bane.

Va'n troor shoh er hroggal er ynsaghey shenn Vajor dy ve slane coarys dy smooïnaghtyn, as v'ad gra rish Baagherys. Kuse dy oiaghyn 'sy çhiaghtin, choud's va Mnr. Jones ny chadley, v'ad cummal çhaglymyn follit 'sy toalt as ren ad soilshaghey magh bun-eieyn y Vaagherys da ny fir elley. Ec y toshiaght hooar ad mooarane dy volvaney as dy neu-hym. Loayr paart jeh ny beiyn mychione y churrym dy leighaltys rish Mnr. Jones, as adsyn cur "Ard Vainshtyr" er, ny dooyrt ad raaghyn bunnidagh gollrish "Ta Mnr. Jones fassaghey shin. Dy row eshyn ersooyl, yinnagh shin geddyn baase veih gortey." Ren fir elley cur lheid ny feyshtyn as "Cre'n fa lhisaghey shinyn ve boirit mychione ny vees taghyrt lurg dooinyn ve marroo?" ny "My hagherys yn Irree Magh shoh agh erbee, cre'n agh vees caghlaa dy ve jeant, vel shin streeu er-e-hon ny dyn?", as va doilleeid mooar ec ny muckyn cur orroo toiggal dy row shoh noi bun as bree y Vaagherys. Va ny feyshtyn s'bolvanee jeu ooilley goll er cur liorish Mollie, y laair vane. She'n eer chied eysht hug ee er Snowball: "Bee shugyr ayn foast lurg yn Irree Magh?"

"Cha bee," as Snowball dy lajer. "Cha nel saase erbee ain dy yannoo shugyr er y ghowaltys shoh. Marish shen, cha nel oo feme shugyr. Bee wheesh corkey as traagh ayd's as t'ou gearree."

"As bee eh foast lowit dou dy cheau rybbanyn ayns my wing?" vrie Mollie.

"Chumraag," as Snowball, "ta ny rybbanyn shen dauesyn t'ou wheesh currit ny chowrey dy vondiaght. Nagh vod oo toiggal dy vel seyrnsny feeu ny smoo na rybbanyn?"

Ren Mollie coardail, agh veih'n chora eck cha row ee jeant shickyr.

Va doilleeid eer ny strimmey ec ny muckyn dy chur bac er ny breagyn va goll er skeaylley ec Moses, y feeagh meen. Speeikar as tutler va Moses, as eshyn biggin er-lheh ec Mnr. Jones, agh s'aghtal v'eh my loayreyder neesht. V'eh gra dy row fys echey dy row çheer druiaghtagh ayn dy feer enmyssit Slieau Villish y Hugyr, as gys shen va dy ooilley vaagh goll tra v'ad geddyn baase. V'ee soit boayl ennagh heose 'sy speyr, beggan çheu hoal jeh ny bodjalyn, va Moses dy ghra. Ayns Slieau Villish y Hugyr she'n Doonaght v'ayn shiaght laghyn 'sy çhiaghtin, va shamrag ry gheddyn car ny bleeaney, as va crammanyn shugyr as berreenyn rass lieen gaase er ny cleighyn. Ren ny beiyn cur dwoaie da Moses er yn oyr dy row eh ny hutler as nagh row obbyr erbee jeant echey, agh va kuse jeu credjal ayns Slieau Villish y

Hugyr, as v'eh er ny muckyn arganey feer chreoi dy choyrlaghey daue nagh row lheid y voayl ayn.

She'n daa chabbyl cart, Boxer as Clover, va nyn ostyllyn s'leighalee. Va doilleeid mooar ec yn daa shoh ayns resooney magh cooish erbee er-nyn-son hene, agh cho leah as ren ad soiaghey jeh ny muckyn dy ve nyn vir-ynsee, ren ad goaill stiagh dy chooilley red va inshit daue, as ren ad cur shen reesht gys ny beyn elley trooid resoonaghyn neu-chramp. Cha ren ad rieu failleil dy ve kionefenish ny çhaglymyn follit 'sy toalt, as v'ad leeideil ayns goaill yn arrane 'Beyn Hostyn', leshyn va ny çhaglymyn rieu çheet gy kione.

Son shen as ooilley, myr haghyn eh, haink yn Irree Magh foddey ny s'moghey as foddey ny sasseyn na va peiagh erbee jerkal rish. Ayns ny bleeantyn roish shen va Mnr. Jones, ga dy row eh ny ard-vainshter creoi, er ve ny eirinagh fondagh, agh dy jeieanagh va drogh-hraa er jeet ersyn. Haink eh dy ve currit dy mooar ass cree lurg da coayl argid ayns cooish leigh, as ghow eh toshiaght er iu ny smoo na va mie er-e-hon. Rish kuse dy laghyn ny yei y cheilley yinnagh eh lieh-lhie 'sy chaair Windsor echey 'sy thie vooar, lhaih ny pabyryn naight, giu, as ny keayrtyn cur da Moses meeryn dy arran sooit lesh lhune. Va ny deiney echey litçheragh as mee-oney, va ny magheryn lane dy harkil, va ny troggalyn ayns feme jeh mulleeyn, va ny cleighyn jarroodit, as va ny beyn gyn bee dy liooar.

Haink mee veanagh y tourey as va'n traagh bunnys aarlooy dy ve buinnt. Oie'll Eoin, Jesarn myr v'eh, hie Mnr. Jones stiagh ayns Willingdon as haink eh dy ve cho scoorit 'sy Lion Jiarg nagh daink eh back derrey munlaa Jedoonee. Va ny deiney er vlieaun yn ollagh moghey 'sy voghrey as eisht v'ad er n'gholl magh dy hayrtyn conneeeyn, gyn ve boirit mychione fassaghey ny beyn. Tra haink Mnr. Jones back huitt eh ny chadley çhelleeragh er soaig y hamyr soie lesh y News of the World harrish yn eddin echey, myr shoh tra haink y fastyr beg, va ny beyn foast gyn beaghey. Fy yerrey cha nod ad surral eh ny sodjey. Ren fer jeh ny booaghyn brishey sheese dorrys y waag-stoyr lesh yn eairk eck as ghow ooilley ny beyn toshiaght er goaill bee er-nyn-son hene veih ny coir. Kiart er shen, ghooisht Mnr. Jones. Y nah hallid va eshyn as ny kiare deiney echey 'sy waag-stoyr lesh kippyn ayns nyn laueyn, scuitçhal mygeayrt dagh airt. Va shoh ny smoo na voddagh ny beyn accryssagh surral. Lesh un aigney, ga nagh row veg jeh'n lheid er ve plannit rolaue, cheau ad ad hene er ny torçheyderyn oc. Doaltattymagh hooar Jones as e gheiney magh dy row ad goll er puhtey as er brebbal veih dagh çheu. Va'n taghyrt dy bollagh ass nyn smaght. Cha row ad rieu er vakin beyn ymmyrkey ad hene myr shoh roish nish, as ren yn irree magh doaltattym shoh liorish cretooryn v'ad oayllagh rish bwoalley as drogh-ghellal roo ayns agh erbee v'ad gearree, cur ass ad bunnys dy bollagh lesh aggle. Lurg veg agh minnid ny ghaa ren ad scuirr veih cur eab er fendeil ad hene as hyndaa ad nyn greem dy roie ersooyl. Minnid ny s'anmey va ooilley ny queig jeu er roie er çhea dy bollagh sheese y vayr chart goll sheese gys y raad mooar, as ny beyn cloh orroo dy barriaghtagh.

Yeeagh Bnr. Jones magh ass uinnagh y hamyr lhiabbagh, honnick ee ny va taghyrt, dy siyragh ren ee ceau paart dy chooid ayns poagey troait, as ren ee snaue magh ass y ghowaltys liorish raad elley. Ren Moses clistal veih'n clat echey as ren eh bennalt ny jei, as eh cliogaraght dy ard. Ec y traa cheddin, va ny beyn er chloh er Jones as e gheiney magh er y raad as er woalley dooint y ghat queig-barryn nyn lurg. As myr shoh, bunnys roish my row fys oc er ny va taghyrt, va'n Irree Magh er ve jeant dy speideilagh: va Jones eebrit magh, as s'lhieusyn va Gowaltys y Vannor.

Rish kuse jeh ny minnidyn toshee s'goan oddagh ny beyn credjal yn aigh vie oc. Va'n chield immeeaght oc dy lhigey ooilley cooidjagh mygeayrt caglieeyn y ghowaltys, myr dy beagh ad jannoo shicky nagh row fer dooinnoil erbee follaghey boayl erbee ayns shen; eisht ren ad ratçhal back gys troggalyn y ghowaltys dy scrysey magh ny monnaghyn s'jerree jeh reill feohdit Jones. Va'n thie greienys ec jerrey ny stabylyn er ny vrishey foshlit; ny bealraghyn as ny fainaghyn stroinney as ny geulaghyn moddee as ny skynnyn dewil lhieusyn yinnagh Jones spoiyaghey ny muckyn as ny eayin, v'ad ooilley ceaut sheese y çhibbyr. Va ny cassyn-streaney as ny scaaghyn-sooilley, ny poagaghyn stroaney neareydagh, ceaut er aile yn orçh va lostey 'sy chlose. As ny kippyn myrgeeddin. Ren ny beyn ooilley lheimyragh lesh boggey tra honnick ad ny kippyn goll er stroie ec ny lossaghyn. Cheau Snowball er yn aile neesht ny rybbanyn lhieusyn va mwingyn as fammanyn ny cabbil er ve jesheenit dy cadjin laghyn y vargee.

" Lhisagh rybbanyn," as eshyn, "smooinit dy ve eaddeeyn, ta ny monnaghyn jeh fer dooinnoil. Lhisagh beyn ooilley goll rooisht."

Tra cheayll Boxer shoh ren eh cur lesh edd choonlee veg v'eh ceau 'sy tourey dy reayll ny carçuillagyn magh ass e chleayshyn, as cheau eh ee er yn aile lesh yn stoo elley.

Ayns traa feer ghiare ren ny beyn stroie dy chooilley red va cur ad ayns cooinaghtyn jeh Mnr. Jones. Ren Napoleon ad y leeideil back gys y waag-stoyr as hug eh magh towse dooblit dy arroo da dy chooilley pheigh, lesh daa vrishtag son dagh moddey. Eisht ghow ad 'Bein Hostyn' veih kione gy chione shiaght keayrtyn ass nyn geilley, as lurg shen ren ad goll dy lhie son yn oie as ren ad cadley myr nagh ren ad rieu cadley roish shen.

Agh ren ad doostey 'sy vadran 'syn agh cadjin, as doaltattymagh lesh cooinaghtyn oc er y red gloyroil ren taghyrt, ren ad ooilley ratçhal magh 'syn aber ry cheilley. Paart raad sheese yn aber va nab as reayrt veih harrish yn chooid smoo jeh'n ghowaltys. Ren ny beyn siyraghey gys y vullagh jeh as ren ad blakey mygeayrt-y-moo ayns soilshey cleir y voghrey. She, s'lhieusyn v'eh – dy chooilley red oddagh ad fakin, s'lhieusyn v'eh! 'Sy eunys jeh'n eie shen ren ad clistal mygeayrt as mygeayrt, cheau ad ad hene seose 'syn aer ayns lheimmaghyn mooarey dy ard-ghreesaghey. Ren ad rolley 'sy druiaght, ren ad goaill bolgumyn jeh faiyr villish y tourey, ren ad brebbal seose ceabyn yn ooir doo as stronnaghey y soar mea eck. Eisht hie ad turrys dy scrutaghey y clane gowaltys as ghow ad baght lesh yindys gyn fockle jeh'n thaloo jiarg, y woaillee hraagh, yn ooylagh, y loghan, y cheyll veg. V'eh myr nagh row ad rieu er n'akin ny reddyn shoh roie, as eer nish s'goan oddagh ad credjal dy by lhieusyn hene v'ad.

Eisht hie ad ayns straneyn back gys troggalyn y ghowaltys as haink ad gys stap dy tostid çheumooie jeh dorrays y thie eirinagh. S'lhieusyn va shen neesht, agh v'ad ro agglit dy gholl stiagh ayn. Agh lurg shallid, ren Snowball as Napoleon puhtey foshlit y dorrays lesh nyn geayltin as hie ny beyn stiagh ayn, fer as fer, as adsyn shooyl lesh ard-chiarail er aggle ny haggel dy jinnagh ad cur veg ass e voayl. Hie ad er baare nyn oardaagyn coshey veih çhamyr gy hamyr, goaill aggle noi loayrt ny syrjey na myr hannish as jeeaghyn lesh sorçh dy yindys er yn soaillid erskyn credjue, er ny lhiabbaghyn lesh ny mattressyn fedjag oc, er ny glessyn tuarastyl, er yn aashag gheaysh chabbil, er y vrat laare Brussels, er y lithograph jeh'n Ven-Rein Victoria erskyn boayrd çhymlee y hamyr soie. V'ad kiart er çheet neose ny greeishyn tra haink eh magh dy row Mollie caillt. Tra hie ad back, hooar ny fir elley magh dy row ee er hannaghtyn 'sy çhamyr lhiabbagh share. V'ee er n'ghoaill peesh dy rybban gorrym veih boayrd scaane Bnr. Jones, as v'ee cummal eh noi'n gheaylin eck as v'ee jannoo mooar j'eeish

hene 'sy ghless ayns aght feer volvaneagh. Ren ny fir elley cur oghsan jee dy geyre, as hie ad magh. Kuse dy yskidyn va croghey 'sy thie vooar, v'ad currit lhieu magh ry hoi oanlucky, as va'n stoandey dy lhune 'sy çhamyr nieeaghan brisht stiagh lesh breb veih ingin Boxer, agh er-lhimmey jeh shen cha row veg 'sy thie er ny venn. Va kiarail jeant lesh un aigney choud's v'ad 'sy voayl shen hene dy lhisagh y thie eirinagh ve freillt myr thie tashtee. V'ad ooilley coardail nagh nhegin da baagh erbee baghey ayns shen dy bragh.

Ghow ny beiy n yn anjeeal oc, as eisht ren Snowball as Napoleon cur eam orroo dy heet ry cheilley reesht.

"Chumraagyn," as Snowball, "t'eh lieh oor lurg shey as ta laa liauyr roin. Jiu ta shin goaill toshiaght er cur stiagh y traagh. Agh ta cooish elley as shegin jee ve goit ayns laue hoshiaght."

Nish ren ny muckyn insh daue dy row ad er n'ynsaghey daue hene ayns ny three meeaghyn shoh chaie dy lhaih as dy screeu veih shenn lioar lettraghey by lesh paitçhyn Mnr. Jones as va ceaut er y charnane trustyr. Ren Napoleon shirrey orroo son puit dy pheint doo as vane as ren eh leeideil ad sheese gys y ghiat queig-barryn va lhiggey magh da'n raad mooar. Eisht ren Snowball (er yn oyr dy nee Snowball eh va'n fer share ec screeu) goaill skeab eddyr daa uddane e chrubbane, ren eh peintal magh GOWALTYS Y VANNOR veih barr syrjey y ghiat as 'syn ynnyd jeh shen ren eh peintal GOWALTYS NY BEIYN. Bee shoh ennym y ghowaltys veih'n traah shoh maghey. Lurg shoh hie ad back gys troggalyn y ghowaltys, boayl ren Snowball as Napoleon shirrey orroo dy chur lhieu aarey as dy chur eh noi boalley hoal y toalt vooar. Ren ad soilshaghey magh, liorish ny studeyryssyn oc ayns ny three meeaghyn shoh chaie, dy row eh er jeet lesh ny muckyn sheeley bun-eieyn y Vaagherys dy yannoo Shiaght Annaghyn. Veagh ny Shiaght Annaghyn shoh nish scruiit er y voalley; yinnagh ad seose leigh gyn caghlaa, as rere yn ee shoh shegin da dagh ooilley vaagh er Gowaltys ny Beiy ceau ny laghyn oc lurg shoh dy bragh. Lesh paart dy ghoilleeid (er yn oyr nagh nee aashag eh son muck dy reayll corrym eh hene er aarey) ren Snowball drappal seose as ghow eh toshiaght er yn obbyr, as Squealer tesmad ny ghaa fosyn as eh cummal y pot peint. Va ny Annaghyn scruiit er y voalley va doo lesh terr ayns lettraghyn mooarey baney va ry lhaih jeih stundayrt as feed veih shen. V'ad myr shoh:

NY SHIAGHT ANNAGHYN

1. Cre erbee ta goll er daa lurgey, she noid eh.
2. Cre erbee ta goll er kiare lurgaghyn, ny ta skianyn echey, she carrey eh.
3. Cha jean baagh erbee ceau eaddeeyn.
4. Cha jean baagh erbee goll dy lhie ayns lhiabbee.
5. Cha jean baagh erbee giu jough meshtallagh.
6. Cha jean baagh erbee marroo baagh erbee elley.
7. S'corrym ta dy chooilley vaagh.

V'eh scruiit feer jesh, as er-lhimmey jeh "carrey" ve scruiit "carray" as fer jeh ny "S'yn" ve bun-ry-skyn, s'kiart va'n lettraghey trooid y clane peesh. Ren Snowball lhaih magh eh er ard er-son ny fir elley. Ren ooilley ny beiy snoggal as slane coardailys oc, as ghow ny fir s'aghtalley toshiaght çhelleeragh dy ynsaghey ny Annaghyn er ny çhengaghyn oc.

"Nish, chumraaghyn," deie Snowball, ceau sheese y skeab pheint, "gys y woaillee hraagh! Lhig dooin cur eh da'n onnor ain dy vel shin cur stiagh ny s'tappee na voddagh Jones as e gheiney jannoo eh."

Agh ec y traa shoh ren ny three booaghyn, va jeeaghyn dy ve neu-aashagh rish paart dy hraa v'er n'gholl shaghey, goaill toshiaght er eamagh er ard. Cha row ad er nyn mlieaun rish kiare ooryn as feed, as va ny ooghyn oc bunnys scoltey. Lurg beggan dy smooïnaghtyn, ren ny muckyn shirrey orroo son cruickyn as ren ad blieaun ny booaghyn speeideilagh dy liooar, as ny crubbaneyn oc cooie dy liooar da'n chiartag shoh. Dy Leah va queig cruickyn dy vainney keshag keyoil ayn, er ren shimmeey baagh jeeaghyn as sym mooar oc.

"Cre hig er ooilley y vainney shen?" vrie peiagh ennagh.

"Ny keayrtyn va Jones mestey paart jeh ayns y vee lahnit ain," as fer jeh ny kiarkyn.

"Jarrod-jee y bainney, chumraagyn!" dyllee Napoleon, as hug eh eh hene roish ny cruickyn blieaun. "Bee shen goit ayns laue. S'moo scanshoil ta'n cur stiagh. Nee Cumraag Snowball leeideil y raad. Nee'm eiyrt erriu ayns minnid ny ghaa. Er oaie, chumraagyn! Ta'n cur stiagh fuirraghtyn orrin."

Myr shoh ren ny beiy'n cruinnaghey sheese gys y woaillee hraagh dy ghoaill toshiaght er y chur stiagh, as tra haink ad back 'syn astyr v'eh ry akin dy row y bainney er ltheie ersooyl.

Cabdil III

Cre'n tooilleil as yn ollish v'oc dy chur stiagh y traagh! Agh va leagh currit da nyn eabyn, er yn oyr dy row y cur stiagh ny smoo speeideilagh eer na va treisht orroo dy beagh.

Ny keayrtyn, s'doillee va'n obbyr; va ny greienyn kiaddit son fir dooinnoil as cha nee son beiy'n, as she lhiettrymys mooar v'eh nagh voddagh baagh erbee ymyd y yannoo jeh greie erbee va croghey er ve ny hassoo er e lurgaghyn jerrey. Agh cho aghtallee va ny muckyn dy voddagh ad smooïnaghtyn er saase elley dy chur shaghey dagh doilleeid. Er son ny cabbil, va fys oc er dagh oarlagh y vagher, as dy feer v'ad toiggal yn obbyr ayns buinn as corlaigey foddey ny share na ren rieau Jones as e gheiney. Cha ren ny muckyn ayns firriny's obbraghey, agh ren ad stiurey as oaseirey ny fir elley. Lesh y tushtey share oc v'eh dooghysaghy dy jinnagh adsyn goaill orroo y leeideilys. Yinnagh Boxer as Clover kianglee ad hene rish y ghreie buinnee ny rish y chorlaig chabbil (cha row feme er bealraghyn ny er cassyn-streaney ny laghyn shoh, son shickyrys) as troagyraght dy rea mygeayrt y vagher lesh muck shooyl ny lurg as gyllagh magh, "Hup lhiat, chumraag!" ny "Woa lhiat, chumraag!", myr va cooie da'n chooish. As ren dy chooilley vaagh gys yn er sloo obbraghey ec çhyndaa y traagh as çhymysaghey stiagh ee. Ren eer ny thunnagyn as ny kiarkyn laboraght hugghey as veih feiy'n laa fo'n ghrian, gymmyrkey sappyn beggey dy hraagh ayns ny gib oc. Fy yerrey hug ad kione er y chur stiagh daa laa ny s'girrey na'n traa va ceaut dy cadjin ec Jones as e gheiney. Ny smoo na shen, she'n cur stiagh smoo va rieau ry akin 'sy ghowaltys. Cha row fooillagh erbee ayn; ren ny kiarkyn as ny thunnagyn lesh ny gobbyn birragh oc çhymysaghey seose yn eer stalk s'jerree. As cha ren baagh erbee 'sy ghowaltys geid wheesh as bolgum.

Car y touree shen, va obbyr y ghowaltys jeant cho rea as obbrinaght chlag. Va ny beiy'n maynrey ayns aght nagh row ad rieau smooïnaghtyn dy voddagh ad y ve. Va dagh bolgum dy vee ny haitnys feer jarroagh, nish dy by lhieusyn hene dy feer va'n bee, troarit oc hene as er-

nyn-son hene, cha nee rheynnit magh orroo liorish mainshtyr gortagh. As ny fir dooinnoil gyn feuid parasitagh ersooyl, va tooilley ec dy chooilley pheiaagh dy ee. Va tooilley soccar oc neesht, ga nagh row ny beyn oayllagh rish. Va ymmodee doilleeidyn rhymboo – myr sampleyr, ny s'anmey 'sy vlein, tra ren ad cur stiagh yn arroo, v'eh orroo sthampey magh eh ayns aght ny shenn traaghyn as sheidey ersooyl y choau lesh nyn ennal, er yn oyr nagh row mwyllin woallee ec y ghowaltys – agh va ny muckyn as yn aghtalys oc as Boxer lesh ny muskylyn feer vooarey echey rieu livrey ad. Va Boxer cur yindys orroo ooilley. V'eh ny laboragh jeean eer ayns lhing Jones, agh nish v'eh jeeaghyn dy ve myr three cabbil, shaghey nane; va laghyn as va slane obbyr y ghowaltys jeeaghyn dy ve ny lhie er e gheayltin braew niartal. Veih'n voghrey gys yn oie v'eh seiy as tayrn, v'eh rieu 'syn ynnyd va'n obbyr s'creoi goll er jannoo. Va'n reaghys jeant echey lesh fer jeh ny kellee dy chur eam ersyn dagh moghrey lieh oor ny s'leaie na fer erbee elley, as yinnagh eh chebbal y laboraght echey myr arryltagh dy choilleeney ny va smoo femoil, roish my ren obbyr cadjin y laa goaill toshiaght. Y freggyrt echey da dagh doilleeid, da dagh lhettrymys, va shen, "Nee'm obbraghey ny s'jeadee!" – ny ren eh glackey myr y motto persoonagh echey.

Agh ren dy chooilley pheiaagh obbraghey rere yn ablid echey. Myr sampleyr, ren ny kiarkyn as ny thunnagyn sauail queig tubbagyn dy arroo 'syn ouyr liorish jeeasaghey ny grineyn skeaylt. Cha ren peiaagh erbee geid veg, cha ren peiaagh erbee gaccan mychione y rheynn echey, va'n troiddey as greimmey as eadolys va jannoo seose aynyn cadjin y vioys oc ayns ny shenn laghyn bunnys ersooyl. Cha ren peiaagh erbee shaghey obbyr – ny bunnys cha ren. S'feer eh nagh row Mollie mie dy irree 'sy voghrey, as va beoyne eck dy scuirr veih'n obbyr dy moghey er yn oyr dy row clagh 'syn ingin eck. As beggan quaaagh va ymmyrkey y chayt. Va geill currit da dy Leah, tra va obbyr ry jannoo, nagh row y chayt rieu ry gheddyn. Yinnagh ee cheet dy ve ass shilley rish oor lurg oor, as eisht veagh ee ry akin reesht ec traaghyn lhongey, ny 'syn astyr lurg da'n obbyr ve jeant, myr nagh row veg ass cadjinys ayn. Agh va rieu lheid ny leshtalyn mie erskyn insh currit roish eck, as ren ee cronnanne as slane aigney cho mie eck, dy row eh neu-phossible dy chredjal nagh row kiarailyn mie eck. V'eh jeeaghyn dy row shenn Venjamin, yn assyl, gyn caghlau neayr's yn Irree Magh. Ren eh cooilleeney yn obbyr echey 'syn aght moal camlaagagh cheddin as v'eh jeant echey ayns lhing Jones, gyn shaghey agh gyn ve arryltagh son obbyr elley noadyr. Tra v'eh currit da, nagh row eh ny s'maynrey nish va Jones ersooyl, cha niarragh eh agh, "Ta assylyn tannaghtyn bio rish traa liauyr. Cha nel fer erbee jiu rieu er n'akin assyl marroo," as v'eh er ny fir elley ve booiagh lesh y reggyrt dorraghey echey.

Jedoonee cha row obbyr erbee ayn. Ghow ad anjeeal oor ny s'anmey na cadjin, as lurg anjeeal va cliaghtey goll er cooilleeney dagh shiaghtin gyn failleil. Hoshiaght haink yrjaghey y brattagh. Hooar Snowball 'sy thie greienys shenn aanrit boayrd geayney by lesh Bnr. Jones as ren eh peintal er ingin as eairk ayns peint vane. Va shoh er ny roie seose y chroan brattagh ayns garey y thie eirinagh dagh moghrey Jedoonee. Geayney va'n brattagh, ren Snowball soilshaghey magh, dy hassoo son magheryn glassey Hostyn, choud's va'n ingin as yn eairk cowraghey magh Pobblaght ny Beiyne ry heet, harragh dy ve ayn tra va kynney deiney fy yerrey currit mow. Lurg yrjaghey y brattagh va ooilley ny beyn cheet ry cheilley 'sy toalt vooar son co-chruinnaght cadjin v'ad gra rish y Çhaglym. Ayns shoh va'n obbyr 'sy çhiaghtin ry heet er ny phlannal as va kiarailyn currit roish as er nyn resooney magh. V'eh dy kinjagh ny muckyn hug roish ny kiarailyn. Va ny beyn elley toiggal yn aght dy cheau teiy, agh cha noddagh ad smooinghtyn rieu er kiarailyn er-nyn-son hene. She Snowball as Napoleon va ny s'gastey liorish foddey ayns ny resoonghtyn. Agh va geill currit da nagh row yn jees shoh rieu ayns coardail: cre erbee moylley va currit ec yn derrey yeh, veagh y jeh elley braew shickyr dy hassoo noi echey. Eer tra v'eh coardit – red ennagh er-e-hon hene nagh voddagh

peiagh erbee shassoo noi – dy reayll yn aaie veg çheu-hoal jeh'n ooylagh myr thie aash son beyn va shaghey obbyr, va resoonaught arganeagh mychione yn eash kiart ec dagh keint dy vaagh dy heet dy ve ny haau. Va'n Çhaglym rieuu çheet gy jerrey lesh goaill yn arrane 'Beyn Hostyn' as va'n fastyr currit da soccar.

Ren ny muckyn freayll y thie greienys myr kione-cherroo er-nyn-son hene. Ayns shoh, ayns ny fastyrn beggery, ren ad studeyrns jeh'n ghaauenys doo, jeh'n seyirsnys, as jeh' ellynyn femoil elley ass liaryn ren ad cur lhiu ass y thie eirinagh. Va Snowball cur tarrooghid ersyn hene liorish reaghey ny beyn elley dy yannoo seose ny v'eh çheet er myr Bingyn Baagh. V'eh gyn skeeys jannoo shoh. Hug eh er bun y Ving Vrey Oohyn son ny kiarkyn, y Commeeys Fammanyn Glenney son yn ollagh, y Ving Aa-Ynsaghey Cumraagyn Feie (va'n dean jeh shoh dy veeinaghey ny roddanyn as ny conneeyn), y Ghleashaght Olley S'baney son ny kirree, as caghlaaghyn fer elley, chammah's cur er chosh brastylyn cour lhaih as screeu. Loayrt trooid as trooid, ren ny shaleeyn shoh failleil. Ren yn eab dy veeinaghey ny cretooryn feie, myr sampleyr, brishey sheese bunnys çhelleeragh. Ren ad tannaghtyn lesh ymmyrkey son y chooid smoo myr v'ad roie, as tra v'ad goll er cur rish lesh feoilty, cha row ad agh goaill vondeish jeh. Haink y chayt dy ve ny oltey jeh'n Ving Aa-Ynsaghey as va feer ghashtey aynjee rish kuse dy laghyn. V'ee ry akin laa dy row, ny soie er y vullagh as loayrt rish kuse dy sperriu va beggan ass e roshtyns. V'ee ginsh daue dy row ooilley ny beyn nish nyn gumraagyn as dy voddagh sparroo erbee va reih eh çheet as goaill aash er e maaig; agh ren ny sperriu tannaghtyn foddey dy liooar voee.

Agh feer speeideilagh va ny brastylyn cour lhaih as screeu. Liorish yn ouyir va bunnys dagh baagh 'sy ghowaltys lettyroil fo ny harrish.

Er son ny muckyn, oddagh adsyn lhaih as screeu dy glen hannah. Ren ny moddee ynsaghey dy lhaih mie dy liooar, agh cha row sym oc er lhaih veg er-lhimmey jeh ny Shiaght Annaghyn. Oddagh Muriel, y ghoayr, lhaih beggan ny share na ny moddee, as ny keayrtn yinnagh ee lhaih er ard da ny fir elley 'syn astyr beg veih meeryn jeh pabyr naight hooar ee 'sy charnane trustyr. Oddagh Benjamin lhaih cho mie as muck erbee, agh cha ren eh rieuu ymmyd jeh'n ablid echey. Choud's va fys echey, as eshyn, cha row veg feeu lhaih. Dynsee Clover y clane abbyrlhit, ach cha nod eh cur cooidjagh fockleyn. Cha dod Boxer cosney ny sodjey na'n lettyr D. Oddagh eh tayrn magh A, B, C, D, 'sy joan lesh yn ingin feer vooar echey, as eisht veagh eh ny hassoo blakey er ny lettyryn as ny cleayshyn echey nyn lhie ergooyl, ny keayrtn craa y tappag echey, as eh geabay lesh e clane niart dy chooinaghtyn er ny veagh 'sy nah ynyd agh cha ren eh rieuu çheet lesh. Kuse dy cheayrtn, dy jarroo, dynsee eh E, F, G, H, agh liorish y traa va fys echey orroosyn, v'eh rieuu çheet magh dy row A, B, C, D, jarroodit echey. Fy yerrey ren eh reaghey dy ve booiagh lesh ny kiare lettyryn toshee, as yinnagh eh screeu sheese ad keayrt ny ghaa dagh laa dy aa-niartaghey e chooinaght. Ren Mollie gobbal ynsaghey veg agh ny shey lettyryn va fockley magh yn ennym ecksh hene. Yinnagh ee ad y chiaddey dy feer jesh ass meeryn dy huig, as eisht yinnagh ee ad y yesheenaghey lesh blaa ny ghaa as shooyl mygeayrt-y-moo cur yindys orroo.

Cha dod fer erbee jeh ny beyn elley 'sy ghowaltys cosney ny sodjey na'n lettyr A. Haink eh magh neesht dy row ny beyn sloo cheeyllagh, gollrish ny kirree, ny kiarkyn, as ny thunnagyn, gyn ablid dy ynsaghey ny Shiaght Annaghyn er ny çhengaghyn oc. Lurg palçhey smooinghtyn ren Snowball fograghey magh dy voddagh ny Shiaght Annaghyn dy fondagh ve jeant ayns un raa keeyllagh, as shen dy ghra: "Kiare lurgaghyn mie, daa lurgey sie." Va shoh, as eshyn, goaill stiagh bun-eie lane-femoil y Vaagherys. Quoi erbee va toiggal shoh dy bollagh, veagh eh sauçhey veih pooaraghyn deiney. Ren yn eanlee shassoo noi ec y

hoshiaght, er yn oyr dy row eh jeeaghyn daue dy row daa lurgey ocsyn neesht, agh ren Snowball prowal daue nagh row shen yn aght.

"Skian ushag, chumraagyn," as eshyn, "she olt ee ry hoi gleashaghey as cha nee ry hoie laueaghey. Myr shoh, lhisagh ee goll er toiggal dy ve ny lurgey. She'n LAUE ta cowraghey magh dooinney, as lheeish t'eh jannoo ooilley yn jeeill echey."

Cha row yn eeanlee toiggal fockleyn liauyrey Snowball, agh ren ad soiaghey jeh'n soilshaghey magh echey, as ren ooilley ny beyn sloo goaill toshiaght er yn obbyr dy ynsaghey y raa keeayllagh noa er ny çhengaghyn oc. Va KIARE LURGAGHYN MIE, DAA LURGEY SIE scruit er boalley hoal y toalt, erskyn ny Shiaght Annaghyn as ayns lettyryn smoo. Cho Leah's v'eh er ny çhengaghyn oc, haink y raa keeayllagh shoh dy ve feer taitnyssagh da ny kirree, as dy mennick choud's v'ad nyn lhie 'sy vagher yinnagh ad ooilley goaill toshiaght er maaley, "Kiare lurgaghyn mie, daa lurgey sie! Kiare lurgaghyn mie, daa lurgey sie!" as tannaghtyn lesh shen rish oor lurg oor, gyn rieuu çheet ve skee jeh.

Cha row sym erbee ec Napoleon er bingyn Snowball. Dooyrt eh dy row ynsagh ny fir aegey ny smoo scanshoil na veg oddagh ve jeant er-nyn-son va lane-aasit hannah. Haghyr eh dy ren Jessie as Bluebell neesht brey quallianyn traa giare ny yei y chur stiagh hraagh, as va nuy quallianyn tramylt breyit eddyr oc. Cho Leah's v'ad er nyn jarbaa, ghow Napoleon ad ersooyl veih ny moiraghyn oc, gra dy jinnagh eh goaill ersyn hene y currym son yn ynsagh oc. Ren eh ad y ghoaill stiagh ayns lout as yn aght ynrican dy roshtyn eh lesh aarey woish y thie greienys, as ayns shen dreill eh ad wheesh ass raad dy ren fir elley y ghowaltys jarrood dy Leah dy row ad ayn.

Va'n folliaght mychione raad hie y bainney feayslit dy Leah. V'eh mestit dagh laa 'sy lahney muickey. Va ny ooyllyn moghey nish çheet dy ve appee, as va faiyr yn ooyllagh skeaylt harrish lesh troar lhiaggit. Va ny beyn sheiltyn 'syn aght cadjin dy beagh adsyn rheynnit magh dy corrym; agh laa dy row, hie sarey magh dy beagh ooilley y hroar lhiaggit er ny hymzaghey as currit gys y thie greienys son ymyd ny muckyn. Er shoh ren paart jeh ny beyn elley tallaghey, agh ayns fardail. Va ooilley ny muckyn ayns slane coardailys er y chooish shoh, eer Snowball as Napoleon. Va Squealer currit dy yannoo ny soilsheydee femoil da ny fir elley.

"Chumraagyn!" dyllee eh. "Ta treisht orrym nagh vel shiu sheiltyn dy vel shinyn ny muckyn jannoo shoh lesh aigney currit da sondid as ard chield. Ta ymmodee jin dy firrinagh as cha mie lhien bainney as ooyllyn. Cha mie lhiam's hene ad. Ta'n un oyr ain ayns goaill ny reddyn shoh dy chummal seose y claynt ain. Ayns bainney as ooyllyn (as shoh er ny phrowal liorish Sheanse, chumraagyn) ta stooghyn lane femoil son foays muickey. She obbreyn inçhynagh ta shinyn ny muckyn. Ta'n slane stiurey as oardaghey y ghowaltys shoh croghey orrin. Oie as laa ta shin freayll arrey son yn oays eu. She er coontey EUIISH dy vel shin giu y bainney shen as gee ny ooyllyn shen. Vel fys eu er cre haghyrys dy row shinyn ny muckyn failleil 'sy churrym ain? Yinnagh Jones çheet back! Yinnagh, yinnagh Jones çheet back! Son shickyrys, chumraagyn," deie Squealer, bunnys dy pleadeilagh, as eh skibbylt veih çheu gy heu as scuitçhal y famman echey, "son shickyrys, cha nel fer erbee ny mast'eu as t'eh gearree Jones dy heet back, vel?"

Dyn y wooise da cooishyn elley, va cooish er-lheh ayn as va ny beyn lane-shickyryr mychione eck, as shen nagh row ad gearree Jones reesht. Tra v'eh currit daue 'syn aght shoh, cha row veg elley dy ghra. Cronnal erskyn ooilley va'n scansh jeh freayll ny muckyn ayns slaynt vie.

Myr shoh v'eh coardit gyn tooilley argane dy lhisagh y bainney as ny ooyllyn lhiaggit (as troar smoo ny ooyllyn tra haink ad dy ve appee), freillt son ny muckyn ynrican.

Cabdil IV

Liorish anmagh 'sy tourey va'n naight mychione ny haghyr ayns Gowaltys ny Beiyn er skeaylley magh harrish lieh-ayrn y chountee. Dagh laa hug Snowball as Napoleon magh skyollyn dy chalmaneyn as saraghyn oc dy heiy ad hene mastey ny beiyn ayns gowaltysyn naboo, dy insh daue skeeal yn Irree Magh, as dy ynsaghey daue y carr da 'Beiyn Hostyn'.

Ren Mnr. Jones ceau yn chooid smoo jeh'n traa shoh ny hoie ayns shamyronney y Lion Jiarg ayns Willingdon, gaccan da peiagh erbee yinnagh eaishtagh rish mychione y vee-chairys feer agglagh ren eh surranse liorish ve currit magh ass y çhellooderys echey liorish co-heshaght dy veiy gyn-y-vie. Va erreeish ec ny eirinee elley bentyn rish y vun-eie, agh cha ren ad cooney monney leshyn ec y hoshiaght. Va cagh gindys dy follit 'sy chree echey row vondeish ry gheddyn dasyn hene ayns aght ennagh ass drogh-aigh Jones. S'aighoil v'eh dy row drogh-ennaghtyn beayn eddyr shellooderyn y ghaa ghowaltys lhiattaghey Gowaltys ny Beiyn. She gowaltys mooar naggyr shenn-emshiragh va fer jeu, va enmyssit Foxwood, as thaloo keylley brishey stiagh er, lesh ooilley ny aberyn echey skee as boght as ny cleighyn echey ayns stayd scammyltagh. Va'n shellooder jeh, Mnr. Pilkington, ny ghooiney seyr soccaragh dy eirinagh va ceau yn chooid smoo jeh'n traa echey ayns yn eeastagh as 'sy çhelg rere yn imbagh v'ayn. Sloo va'n gowaltys elley, va enmyssit Pinchfield, as cummit seose ayns stayd share. She Mnr. Frederick va'n shellooder, va ny ghooiney creoi gyere-chooishagh, va dy kinjagh co-chianglt rish cooishyn leigh as va ambee echey son jannoo bargane creoi. Ny neesht jeu shoh, wheesh va cagh cur feoh da'n dooinney elley dy row eh doillee daue coardail er veg, eer dy choadey ny cooishyn oc hene.

Ny yei shen as ooilley, v'ad ny neesht jeu agglit ass dy bollagh liorish yn irree magh ayns Gowaltys ny Beiyn, as v'ad feer jeean dy chur lhietrymys er ny beiyn oc hene feddyn magh rour my-e-chione. Hoshiaght ren ad lliggey orroo dy yannoo faghid jeh'n eie dy voddagh beiyn stiurey gowaltys er-nyn-son hene. V'ad gra dy beagh y clane chooish jeant as harrish ayns kegeesh. Ren ad cur mygeayrt faaue dy row ny beiyn ayns Gowaltys y Vannor (v'ad shassoo er gra Gowaltys y Vannor rish; cha noddagh ad surral yn ennym "Gowaltys ny Beiyn") dy kinjagh caggey ny mast'oc hene as dy row ad ayns raad y vaaish, goaill neeu veih accyrys. Tra hie traa shaghey as s'cronnal v'eh nagh row ny beiyn er n'ghoaill baase veih accyrys, ren Frederick as Pilkington caghlaa ny skeealyn oc as ghow ad toshiaght er loayrt mychione yn olkys feohdagh va bishaghey ayns Gowaltys ny Beiyn. Va faaue currit mygeayrt dy row y cannibalaght goll er jannoo ec ny beiyn ayns shen, dy row ad torçhaghey y cheilley lesh croughyn cabbil jiarg-çheh, as dy row ny beiyn woirrin cummit oc son ooilley jeu dy gheddyn maroo. Shoh va'n eiyrtys jeh irree magh noi leighyn yn Najoor, va Frederick as Pilkington dy ghra.

Agh cha row slane credjue rieu currit da ny skeealyn shoh. Ren faaueyn jeh gowaltys yindyssagh, raad va ny fir dooinoil er ve currit magh ass as va ny beiyn stiurey ny cooishyn oc hene, tannaghtyn lesh goll mygeayrt ayns vershoonyn neu-chronnal as gammagh, as car ny bleeaney shen va tonn dy vee-viallys roie trooid y çheer. Haink terriu va rieu biallagh roish shen dy ve elgyssagh, ren kirree brishey sheese cleighyn as dee ad shamrag, ren booaghyn lhieggal lesh breb y chruick, ren cabbil feieys gobbal dy lheimmey harrish faalyn as ren ad ceau ny markee oc harrish gys y çheu elley. Erskyn ooilley, va fys er y charr as eer er ny fockleyn da 'Beiyn Hostyn' ayns dy chooilley voayl. V'eh er ny skeaylley magh lesh bieauid

yindyssagh. Cha noddagh ny fir dooinnoil cummal sthie y eulys oc tra cheayll ad yn arrane shoh, ga dy row ad lhiggey orroo nagh row eh veg agh bolvaneagh. Cha noddagh ad toiggal, v'ad dy ghra, yn aght oddagh eer beyn surreal dy ghoail lheid y voghtynid faghidagh. My va baagh erbee goit choud's v'ad dy ghoail, v'ad goll er bwoalley çhelleeragh. Ny yei, cha nod ad cur stap er yn arrane. Ren ny lhonyn eh yn eddanagh ayns ny cleighyn, ren ny calmaneyn eh y chauaigey ayns ny lhiouanyn, chossin eh stiagh ayns feiyr ny keirdee as ayns bingys ny cluig chillagh. As tra ren ny fir dooinnoil eaishtagh rish, dy follit v'ad er creau, clashtyn aynsyn faaishnys yn erree oc ry heet.

Dy moghey Jerrey Fouyir, lurg da'n arroo v'eh buinnt as sthackit as va paart jeh er ve bwoailt hannah, haink skyoll dy chalmaneyn bennalt trooid yn aer as haink ad gys y thaloo ayns close Gowaltys ny Beiy as y greesaghey smoo orroo. Va Jones as ooilley e gheiney, marish lieh-ghussan elley veih Foxwood as Pinchfield, er jeet stiagh ec y ghat queig-barryn as va çheet neese y chassan cart fo raad gys y ghowaltys. V'ad ooilley gymmyrkey maidjaghyn, er-lhimme jeh Jones, va troagyraght rhymboo lesh gunn ayns ny laueyn echey. S'cronnal v'eh dy row ad er-çhee cur eab er cosney reesht y gowaltys.

Va shoh jerkit rish foddey, as va dy chooilley red er ve jeant aarloo. Er Snowball, v'er n'yannoo studeyrys jeh shenn lioar mychione troddanyn Julius Caesar hooar eh 'sy thie eirinagh, va'n currym son ny obbraghyn coadee. Hug eh magh ny saraghyn echey dy bieau, as ayns cubbyl dy vinnidyn va dy chooilley vaagh 'syn ynyd echey.

Choud's va ny fir dooinooil çheet gys troggalyn y ghowaltys, ren Snowball lhunney e chield soiaaghey er. Ren ooilley ny calmaneyn, as va queig-jeig as feed jeu, etlagh hugghey as veih erskyn king ny deiney as ren ad keck orroo veih heose 'syn aer; as choud's va ny deiney cur rish shoh, ren ny guoiee, va nyn lhie follit çheu-chooylloo jeh'n chleigh, roie magh ass as ren ad spulgey dy dewil ec ny bolganeyn oc. Agh cha row shoh agh ny clink eddrym streeuee, as yn dean eck dy yannoo paart dy vusthaa, as ren ny deiney imman ersooyl ny guoiee dy aashagh lesh ny maidjaghyn oc. Nish ren Snowball lhunney nah strane e hoiaaghey er. Ren Muriel, Benjamin as ooilley ny kirree, lesh Snowball 'sy toshiaght, roie er oaie as ren ad seiyr as puhtey ny deiney er dy chooilley heu, as hyndaa Benjamin mygeayrt as ren eh ad y vrebball lesh ny yngnyn beggey echey. Agh keayrt elley va ny deiney, lesh nyn maidjaghyn as ny bootsyn treinit oc, ro niartal er-nyn-son; as dy doaltattym, er scragh veih Snowball, va ny chowrey dy ghoill ergooyl, ren ooilley ny beyn çhyndaa as roie ad er çhea trooid y ghat gys y chlose.

Ren ny deiney lhiggey magh eam dy varriaght. Honnick ad, myr v'ad sheiltyn, ny noidyn oc roie er çhea, as ren ad roie nyn lurg dy mee-reiltagh. Shoh kiart myr va fo Snowball. Cho Leah's v'ad ooilley çheusthie jeh'n chlose, ren ny three cabbil, ny three booaghyn as ny muckyn elley, va nyn lhie cooyl-chlea 'sy thie ollee, çheet-rish doaltattymagh çheu-chooylloo jeu, dy row ad er nyn gruinnaghey stiagh. Nish hug Snowball y cowrey ry-hoi soiaaghey orroo. Ren eshyn hene roie dy jeeragh er Jones. Honnick Jones dy row eh çheet, hrog eh neese e ghunn as ren eh lhiggey. Ren ny grineyn gilbey rimmeigyn fuilltagh harrish dreeym Snowball as huitt keyrrey feayr marroo. Gyn scuirr eer shallid, cheau Snowball ny queig claghyn jeig dy hrimmid echey noi lurgaghyn Jones. Va Jones ceaut stiagh ayns pollag dy ghaer as dettyl y gunn echey magh ass e laueyn. Agh y reayrt s'agglagh jeu ooilley va Boxer, as eh girree er ny cassyn jerree echey as scuitçhal magh lesh ny yngnyn mooarey yiarnit echey gollrish collagh. Haink yn chield vuilley echey sheese er bollag guilley cabbil ass Foxwood as hug eh eh sheeynt gyn bioys 'sy laagh. Ec y reayrt, ren kuse dy gheiney lhiggey da ny maidjaghyn oc tuittym as hug ad eab er roie ersooyl. Haink atçhim orroo, as 'sy nah

tullagh va ooilley ny beyn cooidjagh cloh ad mygeayrt as mygeayrt y chlose. V'ad er nyn sei, er nyn mrebbal, va greimmyn goit jeu, v'ad er nyn sthampey fo chosh. Cha row baagh 'sy ghowaltys nagh ren goaill cooilleen orroo rere yn aght echey hene. Eer y chayt, ren lheimmey dy doaltattym veih clea er geayltin dooinney baa as ren ee sei ny croagyn eck 'sy wannal echey, as er shen dyllee eh magh dy agglagh. Ayns thootch as va'n doarlish gyn lhiittal urree, va ny deiney maynrey dy liooar dy roie magh ass y chlose as dy roie er chea gys y raad mooar. As myr shoh cheusthie jeh queig minnidyn neayr's yn ruegey stiagh oc v'ad roie er chea dy neareydagh rish yn un vollagh as v'ad er jeet, lesh skyoll dy ghuoiee jannoo thassane nyn lurg as spulgey ny bolganeyn oc y clane raad.

Va ooilley ny deiney ersooyl er-lhimmey jeh nane. Heose ayns shen 'sy chlose va Boxer maaigey lesh yn ingin echey y guilley cabbil va ny lhie lesh yn eddin echey sheese 'sy laagh, cur eab er çhyndaa eh. Cha ren y guilley gleashaghey.

"T'eh marroo," as Boxer dy seagnagh. "Cha row eh foym shen y yannoo. Yarrood mee dy row mee ceau croughyn cabbil yiarn. Quoi vees dy my chredjal nagh ren mee shoh jeh yioin?"

"Gyn meiyghid, chumraag!" dyllee Snowball, as veih ny lhottyn echey va'n fuill foast drige. "She cagey t'ayn. Yn ynrican fer dooinnoil mie t'ayn, shen fer ta marroo."

"Cha nel mee gearree goaill bioys, eer bioys fer dooinnoil," as Boxer reesht, as va ny sooillyn echey lane dy yeir.

"C'raad ta Mollie?" dyllee magh peiagh ennagh.

Ayns rieughid va Mollie caillt. Rish shallid va musthaa mooar ayn; va aggle oc dy voddagh ny deiney er n'yannoo jeeill jee ayns aght ennagh, ny eer er n'yymyrkey ersooyl ee marroo. Agh fy yerrey v'ee feddynit dy ve follaghey 'sy stholl eck lesh e kione seiyt stiagh 'sy traagh 'sy vanjoor. V'ee er roie er chea cho Leah's va'n gunn lhiggit. As tra haink ny fir elley back veih jeeaghyn er-e-son, hooar ad magh dy row y guilley cabbil, nagh row dy feer agh currit gyn mioyr, er chouyral as er chosney roish.

Va ny beyn nish er jeet cooidjagh reesht as y greesaghey s'keoiey jannoo orroo, as cagh cur coontey reesht jeh'n treanid echey hene ec ard e ching. Va ard-eailley impromptu er ny chummal çhelleeragh. Va'n brattagh er ny yrjaghey as va 'Bein Hostyn' er ny ghoail reygyryn dy cheayrtyn, eisht va sharmaneys arrymagh jeant son y cheyrrey va marrooit, as va thammag ghrineagh cuirrit er yn oaie eck. Ec oirr yn oaie ren Snowball oraid beg, cur trimmid er dy row feme ec dy chooilley vaagh ve aarlooy dy gheddyn baase son Gowaltys ny Bein dy beagh shen ymyrçhagh.

Ren ny beyn reaghey lesh un aigney dy chur er bun boyn chaggee, "Baagh Feniaghtagh, jeh'n Chied Rang", va er ny stowal kiart er shen er Snowball as Boxer. She boyn prash v'ayn (dy feer shenn vrashyn cabbil v'ad, va feddynit 'sy thie greienys), dy ve ceaut Jedoonee as laghyn seyrey. Va "Baagh Feniaghtagh, jeh'n Nah Rang" currit er bun neesht, va er ny stowal lurg e baase er y cheyrrey varroo.

Va moorarane coloayrtys mychione ny lhisagh ad gra rish y chah. Fy yerrey, v'eh enmyssit Cah y Thie Ollee, er yn oyr dy row shen y voayl v'ad nyn lhie fo-chlea roish my ren ad lheimmey magh. Va gunn Mnr. Jones er ny gheddyn ny lhie 'sy laagh, as va fys oc dy row

cooid dy rollagyn grine 'sy thie eirinagh. V'eh reaghit dy beagh y gunn currit ec bun y Chroan Brattagh, myr gunn caggee, as dy lhiggey eh daa cheayrt 'sy vlein – y derrey cheayrt y nah laa jeig Jerrey Fouyir, laa bleaney Cah y Thie Ollee, as y cheayrt elley Feaill' Eoin, laa bleaney yn Irree Magh.

Cabdil V

Choud's va'n geurey cheet faare, haink Mollie dy ve ny smoo as ny smoo boiraneagh. V'ee anmagh son obbyr dagh moghrey as v'ee shirrey leshtal liorish gra dy ren ee cadley ro anmagh, as v'ee gaccan mychione pianyn neu-hoiggalagh, ga dy row ee foast feer vie dy ee. Lesh dy chooilley leshtal v'ee lhiggey urree, yinnagh ee roie ersooyl veih'n obbyr as goll gys y logh-uyll, boayl veagh ee ny shassoo, blakey dy bolvaneagh er y scaan j'eeish hene 'syn ushtey. Agh va faaueyn neesht jeh red ennagh ny strimmey. Laa dy row choud's va Mollie talkal dy gennal stiagh 'sy chlose, scuitchal mygeayrt y famman liauyr eck as caigney er stalk straue, hug Clover ee ry lhiattee.

"Vollie," as ish, "ta red ennagh feer trome-chooishagh aym dy ghra rhyt. Moghrey jiu honnick mee oo jeeaghyn harrish y chleigh ta scarrey Gowaltys ny Beiyn veih Foxwood. Va fer jeh deiney Mnr. Pilkington ny hassoo er cheu elley y chleigh. As – va mee foddey veih, agh ta mee bunnys shicky dy vaik mee shoh – v'eh loayrt rhyt as v'ou lhiggey dasyn strooge dy stroin. Cre ta'n bun jeh shen, Vollie?"

"Cha ren eh! Cha row mee! Cha nee feer eh!" dyllee Mollie, goaill toshiaght er lheimyragh mygeayrt as scrabey y thaloo.

"Vollie! Jeeagh orrym dy jeeragh ayns my eddin. Vel oo cur dou dy ockle nagh row y dooinney shen strooge dy stroin?"

"Cha nee feer eh!" dooyrt Mollie reesht, agh cha noddagh ee jeeaghyn er Clover dy jeeragh 'syn eddin eck, as y nah hallid hyndaa ee dy doaltattym as ren ee lhiggey ersooyl as stiagh 'sy vagher.

Haink ourys er Clover. Gyn veg y ghra da ny fir elley, hie ee gys stholl Mollie as hyndaa ee harrish y choonlagh lesh yn ingin eck. Follit fo'n choonlagh va pollag veg dy hugyr crammanagh as kuse dy ghossanyn dy rybbanyn jeh caghlaaghyn daah.

Three laghyn ny sanmey cha row Mollie ry gheddyn boayl erbee. Rish kuse dy hiaghteyn cha row fys erbee er y voayl v'ee ayn, eisht hug ny calmaneyn coontey dy ren ad ish y akin er cheu hoal Willingdon. V'ee eddyr luiryn cart voddee yesh peintit jiarg as doo, va ny shassoo cheumooie jeh thie oast. Va dooinney rouyr jiarg-ghrooishagh, as eh ceau breechyn breck as gaiteryn, as va jeeaghyn dy ve ny oasteyr, strooge e stroin as dy fassaghey lesh shugyr. Va'n sheh eck noa-baarit as v'ee ceau rybban scarleod mygeayrt e tappag. V'ee jeeaghyn dy row ee goaill soylley jeh, rere ny calmaneyn. Cha ren fer erbee jeh ny beiyin imraa Mollie reesht.

Jerrey Gheuree haink emshyr gheyre chreoi ayn. Va'n thaloo gollrish yiarn, as cha noddagh veg ve jeant ayns ny magheryn. Va ymmodde chaglymyn er nyn gummal 'sy toalt vooar, as ren ny muckyn ceau yn traa oc plannal obbyr yn imbagh shoh cheet. V'eh er jeet magh myr nhee v'ad soiaghey jeh, dy lhisagh ny muckyn, as by vaghtal eh dy row ad ny s'aghtalley na ny beiyin elley, jannoo briwnys er ooilley ny feyshtyn bentyn rish polasee eirinagh, ny yei dy row feme er ny reaghysyn oc goll er shickyraghey liorish teiy y chooid vooar. Oddagh y

saase shoh er ve speeideilagh agh son ny arganeyn eddyr Snowball as Napoleon. Va'n jees shoh neu-choardail er dagh poynt oddys neu-choardail ve ayn. Dy jinnagh y derrey yeh coyrlaghey cuirr acyrys smoo lesh oarn, shickyr v'eh dy jinnagh y jeh elley hirrey acyrys smoo dy hoggyll, as dy niarragh y derrey yeh dy row y magher shoh ny'n magher shen lane-chooie son caayl, yinnagh y jeh elley fograghey magh dy row eh neu-yymydoil son veg agh glassreeyn fraueagh. Va eiyrtyssee ec cagh, as va resoonaghtyn elgyssagh ayn. Ayns ny Çhaglymyn ren Snowball dy mennick cosney er y chooid smoo lesh ny oraidyn yindyssagh echey, agh va Napoleon ny share ec shirrey er sleih dy phohlldal eh eddyr ny traaghyn shen. Haink eh rish er-lheh mastey ny kirree. Dy jeieanagh va ny kirree er n'ghoail toshiaght er maaley, "Kiare lurgaghyn mie, daa lurgey sie", row eh traaoil ny dyn, as dy mennick v'ad brishey stiagh er y Çhaglym lesh shoh. Va geill currit da dy by smoo lickly eh dy jinnagh ad goaill toshiaght er "Kiare lurgaghyn mie, daa lurgey sie" ec traaghyn ard scanshoil ayns oraidyn Snowball. Va Snowball er n'yannoo studeyrys kiarailagh jeh reygyryn dy henn earrooy n y 'Farmer and Stockbreeder' hooar eh 'sy thie eirinagh, as v'eh lane dy phlannyn son noaidyn as foayssyn. Loayr eh dy mie-ynsit mychione jeeigyn magheragh, sailys as slag bunneydagh, as ren eh reaghey skeim cramp ry-hoi ooilley ny beyn lhiggey y keck oc dy jeeragh er ny magheryn, ayns boayl elley dagh laa, dy chur shaghey yn obbyr dy ymyrkey eh. Cha dug Napoleon roish skeim erbee va reaghit echey hene, agh yiarragh eh dy kiune nagh jig veg vouesyn ec Snowball, as v'eh jeeaghyn dy ve fuirraghtyn er y traay ry heet. Agh mastey ooilley ny arganeyssyn oc, cha row fer erbee cho sharroo as fer haghyr er coontey y wyllin gheayee.

'Syn aber liauyr, nagh row foddey veih troggalyn y ghowaltys, va nappan beg ayn, as eh boayl syrjey y ghowaltys. Lurg da goaill towshan jeh'n thaloo, dooyrt Snowball dy row shoh y boayl share son mwyllin gheayee, oddagh ve currit dy obbraghey dynamo yinnagh cur bree lectragh da'n ghowaltys. Yinnagh shoh cur soilshey da ny sthollyn as çhiow ad 'sy gheurey, as yinnagh eh cur bree neesht son saae kiarkylagh, son giarreyder coau, son slisseyder napin as son greie blieaun lectragh. Cha geayll ny beyn rieau mychione red erbee y lheid shoh (er yn oyr dy nee shenn emshiragh va'n gowaltys as nagh row veg agh greienyn bunneydagh ayn), as v'ad geaishtagh as yindys orroo choud's ren Snowball jallooy n focklagh jeh greienyn erskyn credjue oddagh cooilleeney nyn obbyr er-nyn-son choud's v'ad fassaghey as goaill aash ayns ny magheryn ny lhasaghey ny inçhyn oc trooid lhaih ny coloayrtys.

Çheusthie jeh kuse dy hiaghteyn va plannyn Snowball son y wyllin gheayee jeant dy slane. Haink ny myn-phoyntyn obbrinagh son y chooid smoo ass three liaryn by lesh Mnr. Jones – 'Thousane Red Ymmydoil dy Yannoo 'sy Thie', 'Dagh Dooiney ny Vreekeyder Hene' as 'Lectraghys son Toshiaghteyryn'. Myr shamyr studeyrys ren Snowball ymyd jeh bwaane, ayn keayrt dy row va guirreyder as va laare rea foiee echey, cooie dy hayrn er. V'eh dooney eh hene ayns shen rish ooryn ass y cheilley. Lesh ny liaryn echey er nyn gummal foshlit lesh clagh, as lesh peesh dy chelk greimmit eddyr uddaneyn e chrubbane, yinnagh eh gleashaghey dy bieau huggey as veih, tayrn stiagh linney er linney as lhiggey magh eamyn beggey dy ghreesaghey. Beggan er veggan haink ny plannyn dy yannoo seose moorarane co-chast dy cham-lauraghan as dy wheeylyn feeacklagh va skeaylt magh harrish lieh-ayrn y laare, as ny beyn elley jeeaghyn orroo myr ve dy bollagh erskyn toiggalys agh feer yindyssagh. Haink eer ny kiarkyn as ny thunnagyn, as v'ad goaill kiarail nagh jinnagh ad cur nyn gassyn er ny cowraghyn kelk. Cha nee agh Napoleon ren tannaghtyn veih. Dooyrt eh dy row eh noi y wyllin gheayee veih'n toshiaght. Agh laa dy row haink eh dy neu-yerkit dy scrutaghey ny plannyn. Hooyl eh dy trome mygeayrt y waane, jeeaghyn dy geyre er dagh myn-phoynt ny plannyn as ren eh stronaghey orroo keayrt ny ghaa, eisht v'eh ny hassoo rish tammylt goaill

baght orroo ass jerrey e hooilley; eisht doaltattymagh hrog eh seose e lurgey, ren eh mooin harrish ny plannyn as hooyl eh magh ass gyn fockle erbee y ghra.

Va'n clane gowaltys scarrit dy dowin bentyn rish cooish y wyllin gheayee. Cha ren Snowball gobbal dy beagh obbyr doillee eh, ee y hroggal. Veagh feme er ymmyrkey claghyn as troggal seose ad dy yannoo boallaghyn, eisht veagh feme er jannoo ny shiaullyn as lurg shen veagh feme er dynamo-yn as caabhil. (Cre'n aght veagh adsyn er nyn gionnaghey, cha ren Snowball gra.) Agh ren eh shassoo er dy voddagh eh ve jeant dy bollagh ayns blein. As lurg shen, dooyrt eh, veagh wheesh obbyr er ny spaarail nagh beagh feme er ny beiyn obbraghey agh rish three laghyn 'sy çhiaghtin. Er çheu elley y skeeal, ren Napoleon arganey dy row feme mooar y traa shen er bishaghey troaryn bee, as dy jinnagh ad jummal traa er y wyllin gheayee, yinnagh ad ooilley geddyn baase veih accyrts. Ren ny beiyn reaghey ad hene ayns daa chologe as ny sloganyn oc, "Reih Snowball as y çhiaghtin three laa", as "Reih Napoleon as y manjoor lane". She Benjamin va'n un vaagh nagh ren pohlldal yn derrey heu ny'n çheu elley. Ren eh jiooldey dy chredjal eddyr dy darragh bee dy ve ayns palçhys smoo, ny dy jinnagh y wyllin gheayee spaarail obbyr. Mwyllin gheayee ny dyn, as eshyn, yinnagh y vea tannaghtyn lesh goll 'syn un aght ren eh rieu – shen dy ghra, dy olk.

Chammah's arganeyn mychione y wyllin gheayee, va'n chooish ayn bentyn rish coadey y gowaltys. V'eh goll er toiggal dy slane, ny yei dy row ny fir dooinnoil er ve currit fo haart ayns Cah y Thie Ollee, dy voddagh ad jannoo eab elley stroshey dy ghoail y gowaltys reesht as dy chur er ash Mnr. Jones. Va oyr eer ny smoo oc dy yannoo shen er yn oyr dy row y naight mychione y taartys oc er ny skeaylley magh er y çheer as hug eh er ny beiyn ayns ny gowaltysyn naboo ve eer ny streeuailtee na v'ad rieu. 'Syn aght cadjin, va Snowball as Napoleon ayns mee-choardail. Rere Napoleon, ny va er ny beiyn jannoo, shen dy chionnaghey gunnyn as dy hraenal ad hene 'syn aght dy yannoo ymmyd jeu. Rere Snowball, v'eh orroo cur magh tooilley calmaneyn as brasnaghey yn aigney dy irree magh mastey ny beiyn ayns ny gowaltysyn elley. Ren yn derrey yeh arganey, mannagh noddagh ad fendeil ad hene, gyn ourys dy beagh ad currit fo, yn jeh elley, dy beagh irree magh ayns dy chooilley voayl, nagh beagh feme er fendeil ad hene. Ren ny beiyn eaishtagh hoshiaght rish Napoleon, eisht rish Snowball, as cha noddagh ad jannoo briwnys ayns nyn aigney er ny va kiart; dy jarroo, v'ad dy kinjagh feddyn magh dy row ad ayns coardail rish quoi erbee jeu va loayrt ec y traa shen.

Fy yerrey haink yn laa tra va kione currit er plannyn Snowball. Ayns y Çhaglym y nah Jedoonee veagh y feysht, row ad dy ghoail toshiaght er obbyr er y wyllin gheayee ny dyn, currit roish son teiy. Tra ren ny beiyn cruinnaghey 'sy toalt vooar, hass Snowball seose as, ga dy row eh er ny vrishey stiagh er eisht as nish liorish maaley ny kirree, ren eh soilshaghey magh ny oyrn echey son coyrlaghey troggal y wyllin gheayee. Eisht hass Napoleon seose dy chur freggyrt. Dooyrt eh dy slane feagh dy nee boghtynid va'n wyllin gheayee as dy row eh coyrlaghey nagh lhisagh peiagh erbee ceau teiy ayns foayr j'ee, as çhelleeragh hoie eh sheese reesht; s'goan v'eh loayrt rish mysh jeh shallidyn as feed, as v'eh jeeaghyn dy ve gyn sym er yn eiyrtys va jeant echey. Er shoh ren Snowball lheimmey ny hassoo, as liorish yllagh magh ny syrjey na ny kirree, v'er n'ghoail toshiaght er maaley reesht, ghow eh toshiaght doaltattym er aghin lane jeean ayns foayr jeh'n wyllin gheayee. Derrey nish va ny beiyn scarrit dy corrym, bunnys, ayns ny barellyn oc, agh ayns tullogh v'ad currit fo drualtys liorish loayrtys jesh Snowball. Ayns raaghyn yindys ren eh tayrn jaloo jeh Gowaltys ny Beiyn myr dy beagh eh tra va obbyr sollagh er ny hroggal jeh dreeminyn ny beiyn. Va'n sheiltynys echey er skeaylley magh nish foddey ny sodjey na giarreyderyn coau as slisseyderyn napin. Oddagh lectragh, v'eh dy ghra, obbraghey mwyllinyn bwoallee, keeaghtyn, cleaiyn, rolleyderyn,

greienyn buinnee as kianglee, chammah's cur ayns dagh stholl er-e-son hene soilshey lectragh, ushtey çheh as feayr as çhiasseyder lectragh. Liorish y traah hug eh kione er loayrt, cha row dooyt erbee er ny veagh eiyrtys y teiy. Agh kiart ec y traah shen hass Napoleon seose as, ceau shilley quaaagh er Snowball ass corneil e hooill, lhig eh magh sogh gheyre jeh sorçh nagh row peiagh erbee er chlashtyn eh lhiggey magh roie.

Er shoh va feiy agglagh dy ghullal çheumooie, as ren nuy moddee feer vooar va ceau coillaryn as taggady prash ayndaue çheet lheimyracht stiagh 'sy toalt. Ren ad roie dy jeeragh er Snowball, as dobbyr da lheimmey veih'n ynyd echey ayns traah dy haghney ny cabbyn greimmey oc. Ayns tullogh v'eh magh ass y dorrys as v'ad geiyrt er. Ro thanvaneit as ro agglit dy loayrt, ren ooilley ny beiy cruinnaghey magh ass y dorrys dy yeeaghyn er y chloh. Va Snowball siyragh harrish yn aber liauyr va goll gys y raad. V'eh roie myr nagh voddagh agh muck roie, agh va ny moddee faggys da ny boynyn echey. Dy doaltattym ren eh skirrey as v'eh jeeaghyn dy ve lane shickyr dy beagh eh goit ocsyn. Eisht seose lesh reesht, as v'eh roie ny s'tappee na v'eh rieau, eisht va ny moddee berraghtyn ersyn reesht. Ren fer jeu bunnys dooney ny cabbyn echey mygeayrt famman Snowball, agh ren Snowball scuitçhal seyr eh kiart dy traaoil. Eisht va driss er-lheh ersyn as, liorish veg agh oarlagh ny ghaa, ren eh scapail trooid towl 'sy chleig as cha row eh ry akin reesht.

Nyn dost as agglit ass, ren ny beiy snaue stiagh reesht 'sy toalt. Lurg tammylt beg haink ny moddee lheimyracht back. Ec y toshiaght cha noddagh peiagh erbee sheiltyn cre woish haink ny cretooryn shoh, agh dy Leah va'n cront oc er ny eaysley: she ny quallianyn v'ad, ren Napoleon goaill ersooyl veih nyn moiraghyn as ren eh troggal seose dy follit. Ga nagh row ad foast lane-aasit, v'ad nyn moddee feer vooar, as jeeaghyn cho elgyssagh as moddee oaldehy. V'ad tannaghtyn faggys da Napoleon. Va geill currit da dy row ad craa ny fammanyn oc ersyn 'syn agh cheddin as va ny moddee elley jannoo er Mnr. Jones.

Nish ren Napoleon, as ny moddee geiyrt ersyn, drappal seose er ard troggit y laare boayl va Major ny hassoo dy chur yn oraid echey. Ren eh fogrey magh, maghey nish, dy beagh jerrey currit er Çhaglymyn moghrey Jedoonee. V'ad neu-yymyrçhagh, v'eh dy ghra, as v'ad jummal traah. 'Sy traah ry heet veagh feyshtyn ooilley bentyn rish stiurey y gowaltys reaghit liorish bing er-lheh dy vuckyn, as eshyn reill harree. Yinnagh adsyn çheet nyn guaiyl fo chlea as ny s'anmee yinnagh ad insh da ny fir elley ny briwnyssyn oc. Yinnagh ny beiy foast çheet ry cheilley moghrey Jedoonee dy chur ooashley da'n vrattagh, dy ghoaill 'Beiy Hostyn' as dy gheddyn ny saraghyn oc son y çhiaghtin; agh cha beagh resoonaght erbee elley ayn.

Ga dy row greain currit orroo liorish eebirtys Snowball, va ny beiy currit ass ec yn ogrey shoh. Veagh plaiynt er ve jeant ec kuse jeu dy beagh ablid er ve oc ayns cur roish ny resoonyn kiart. Va eer Boxer boirit ayns agh. Hug eh ergooyl ny cleayshyn echey, ren eh craa e happag kuse dy cheayrtyr as va eab moor jeant echey dy chur ayns oardagh ny smooinghtyn echey; agh fy yerrey cha noddagh eh smooinghtyn er veg dy ghra. Agh va shiartanse jeh ny muckyn hene smoo flaaail. Ren kiare muckyn keish 'sy chie roa lhiggey magh scraghyn geyrey dy neu-choardailys, as ren ooilley ny kiare jeu lheimmey nyn shassoo as ghow ad toshiaght er loayrt ec yn un traah. Agh doaltattymagh ren ny moddee va nyn soie mygeayrt Napoleon lhiggey magh gyrnal dowin baggyrtagh as haink ny muckyn dy ve nyn dost as hoie ad sheese reesht. Eisht ren ny kirree brishey magh dy feer vooar lesh maaley, "Kiare lurgaghyn mie, daa lurgey sie!", ren tannaghtyn ayn rish bunnys kerroo-oor as hug jerrey er caa erbee son resoonaght.

Ny s'anmee va Squealer currit mygeayrt y ghowaltys dy hoilshaghey magh ny reaghysyn noa da ny fir elley.

"Chumraagyn," as eshyn, "ta treisht orrym dy vel dy chooilley vaagh ayns shoh toiggal ny vees goll er coayl ec yn Chumraag Napoleon, goaill ersyn hene yn obbyr elley shoh. Ny jean-jee sheiltyn, chumraagyn, dy vel leeideilys jannoo seose taitnys! Dy bollagh noi shen, she currym down trome eh. Cha nel peiagh erbee credjal ny s'jeeaney na'n Cumraag Napoleon dy nee corrym ta dy chooilley vaagh. Veagh eh lane-vaynrey lhiggey diu reaghysyn y jannoo er-nyn-son euish hene. Agh ny keayrtyrny foddee dy jinnagh shiu ny reaghysyn neu-chiart, chumraagyn, as eisht cre harrys orrin? Abbyr-jee dy row shiu er reaghey dy eiyrt er Snowball, lesh y vranlaadys eche mychione mwyljyn geayee – Snowball, as, myr ta fys ain nish, nagh row veg ny share na kimmeeagh?"

"Ren eh caggey dy dunnal ayns Cah y Thie Ollee," as peiagh ennagh.

"Dunnalys, cha nel shen dy liooar," as Squealer. "Smoo scanshoil ta leighaltys as biallys. As bentyn rish Cah y Thie Ollee, ta mee credjal dy jig traa as nee mayd feddyn magh dy row paart Snowball ayn er ny voadaghey dy mooar. Smaght, chumraagyn, smaght shickyry! Shen fockle arrey yn laa t'ayn jiu. Yn chield varranys ain, as veagh ny noidyn ain orrin. Son shickyrys, chumraagyn, cha nel shiu gearree Jones dy heet back, vel?"

Keayrt elley cha row freggyrt erbee da'n argane shoh. Son shickyrys cha row ny beiyng gearree Jones dy heet back; dy beagh cummal resoonaghtyn moghrey Jedoonee cur ad ayns gaue jeh cur-lesh back eh, eisht shegin da kione ve currit er ny resoonaghtyn. Ren Boxer, as liorish nish va traa eche dy smoinaghtyn er reddyn, loayrt son y chooid smoo jeu ayns gra, "My vees Cumraag Napoleon gra eh, gyn ourys t'eh kiart." As maghey shen ren eh glackey y maxim, "Ta Napoleon kiart dy kinjagh," chammah's y motto preevaadjagh echey, "Nee'm obbraghey ny s'jeadee."

Liorish y traa shoh va'n emshyr er chaghlaa as va toshiaght er ny ghoail er traau y arree. Va'n waane aynjee ren Snowball tayrn ny plannyn echey son y wyllin gheayee er ve dooint as v'ad sheiltyn dy row ny plannyn er ve scryssit magh veih'n laare. Dagh moghrey Jedoonee ec jeh er y chlag ren ny beiyng co-chruinnaghey 'sy toalt vooar dy gheddyn ny saraghyn oc son y çhiaghtin. Va bollagh shenn Vajor, nish glen veih feill, cleiyt neese veih'n ooylagh as currit er kiap ec bun y chroan brattagh, liorish y ghunn. Lurg da'n vrattagh ve er ny yrjaghey, v'eh er ny beiyng shooyl ayns strane shaghey y vollagh ayns agh arrymagh roish my jagh ad stiagh 'sy toalt. 'Sy lhing shoh cha row ad ooilley soie sheese cooidjagh myr ren ad ayns ny shenn laghyn. Veagh Napoleon, marish Squealer as muck elley enmyssit Minimus, as va schlei yindyssagh echey ayns screeu arraneyn as daanyn, nyn soie ec toshiaght yn ardan troggit, as ny nuy moddee aegey jannoo seose lieh-chiarkyl mygeayrt-y-moo, as ny muckyn elley nyn soie nyn jei. Veagh ny beiyng elley nyn shassoo ayns ayn smoo y toalt. Yinnagh Napoleon lhaih magh ny saraghyn son y çhiaghtin ayns agh garroo gollrish sidoor, as lurg daue goaill 'Beiyng Hostyn' un cheayrt, yinnagh ooilley ny beiyng faagail.

Y trass Jedoonee lurg eebirtys Snowball, va beggan dy yindys er ny beiyng tra cheayll ad Napoleon fograghey magh dy row y wyllin gheayee dy ve troggit ny yei ooilley. Cha dug eh oyr erbee son y chaghlaa aigney echey, veg agh cur raue da ny beiyng dy jinnagh y chiartagh elley shoh cur orroo obbyr feer chreoi, as foddee dy beagh feme er jannoo ny sloo y towse dy vee oc. Agh va ny plannyn ooilley jeant, gys y vyn-phoynt sloo. Va bing er-lheh dy vuckyn er

ve obbraghey dy chooilleeney ad ayns ny three shiaghteeyn shoh chaie. Dy hroggal y wyllin gheayee, lesh caghlaaghyn foays elley, v'ad jerkal rish daa vlein v'eh ceaut er shen.

Y fastyr beg shen ren Squealer soilshaghey magh dy preevaadjagh da ny beyn elley nagh row Napoleon rieu ayns rieughid noi'n wyllin gheayee. Dy bollagh noi shen, she eshyn ren coyrlaghey ee hoshiaght, as y plan ren Snowball tayrn er laare bwaane y ghuirreyder, va shen geidit veih mastey pabyryn Napoleon. Cre'n fa, eisht, vrie peiagh ennagh, ren eh loayrt cho lajer noi eck? Er shoh va Squealer jeeaghyn feer skeetagh. Shen, as eshyn, va croutys y Chumraag Napoleon. V'eh JEEAGHYN dy ve noi'n wyllin gheayee, agh ynrican myr aght dy gheddyn rey rish Snowball, va ny pheccah danjeyragh as cleayney gys olkys. As Snowball ass y raad nish, oddagh y plan goll er oaie gyn eshyn brishey stiagh er. Shoh, as Squealer, va red ennagh enmyssit yn aghtallys cluigagh. Dooyrt eh shen harrish kuse dy cheayrtyn, "Aghtallys cluigagh, chumraagyn, aghtallys cluigagh!" as eh corlheimeraght dy skibbyltagh mygeayrt as scuitchal y famman ehey lesh gear boggoil. Cha row ny beyn shickyre va bun y raa, agh loayr Squealer ayns aght va wheesh dyn mreigeey, as ren ny three moddee, as haghyn eh dy row ad marish, gynal cho baggyrtagh, dy ren ad soiaghey jeh'n soilshaghey magh ehey gyn tooilley feyshtyn.

Cabdil VI

Car ny bleaney shen ren ny beyn obbraghey gollrish sleabyn. Agh v'ad maynrey 'syn obbyr oc; cha ren ad moaraghey da eab erbee ny veg jeant gyn unnysup, as toiggaly's mie oc dy row dy chooilley red va jeant oc jeh vondeish dauesyn hene as dauesyn jeh'n chynney oc yinnagh cheet nyn jei, as cha nee da possan dy ir dooinnoil litcheragh vraddagh.

Car yn arree as car y touree v'ad gobbraghey shiaghtin dy three feed oor, as Mee Luanistyn ren Napoleon fograghey magh dy beagh obbyr ry yannoo fastyr Jedoonee neesht. Lane arryltagh va'n obbyr shoh, agh dy row baagh erbee tannaghtyn assaarah veih, veagh y towse bee ehey jeant ny sloo liorish y lieh ayn. Ny yei shen as ooilley, hooar ad magh dy row feme oc faagail shiartanse dy chiartagyn neu-chooilleenit. Va'n fouyr beggan ny sloo speeideilagh na v'eh 'sy vlein roish shen, as va daa vagher, as lhisagh ad er ve cuirrit lesh glassreeyn fraueagh dy moghey 'sy tourey, neu-chuirrit er-yn-oyr nagh row kione currit er traue ad moghey dy liooar. Oddagh faaishnys ve jeant dy beagh y geurey shoh cheet creoi dy liooar.

Va'n wyllin gheayee cur-lesh doilleeidyn neu-yerkit. Va quarral vie dy chlagh eayil ec y ghowaltys, as va palchey geinnagh as cement er ny gheddyn ayns fer jeh ny bwaaneyn, myr shoh va ooilley yn stoo ry-hoi troggal ry laue. Agh y doilleeid nagh voddagh ny beyn cur reaghys er hoshiaght, va shen yn aght dy vrishey ny claghyn ayns peeshyn jeh moodays cooie. V'eh jeeaghyn nagh row aght erbee dy yannoo shoh agh lesh speiyghyn as craiunyn, jeusyn nagh voddagh baagh erbee jannoo ymmyd, er yn oyr nagh voddagh baagh erbee shassoo seose er ny lurgaghyn jerree ehey. Cha nee agh lurg shiaghteeyn dy eabyn ayns fardail v'eh dy daink yn eie kiart gys peiagh ennagh – shen dy ghra, dy yannoo ymmyd jeh niart y hrimmid downagh. Va claghyn feer vooar, foddey ro vooar son ymmyd dy ve jeant jeu 'syn aght myr v'ad, nyn lhie ooilley harrish bun y wharral. Ren ny beyn filley teady mygeayrt-y-moosyn shoh, as eisht ooilley cooidjagh, booaghyn cabbil, kirree, baagh eerbee oddagh goaill greim jeh'n tead – ren eer ny muckyn ny keayrtyn goaill ayn ec traaghyn neu-hickyre – ren ad tayrn ad lesh mellid debejagh seose yn ughtagh gys baare y wharral, boayl v'ad er ny lhieggal harrish yn oirr, dy vrishey ayns peeshyn hoal wass. Arraghey y chlagh lurg da ve brisht, va shen aashagh dy liooar. Ren ny cabbil ymmyrkey ersooyl ee ayns

lughtyn cart, ren ny kirree tayrn kiapyn fer as fer, ren eer Muriel as Benjamin cur ad hene fo ghreienys lesh shenn chart-ven-ynsee as ren ad y chooid oc hene. Liorish anmagh 'sy tourey va stoyr dy liooar dy chlagh er ny haglym, as eisht haink toshiaght er troggal, fo oaseirys ny muckyn.

Agh she obbyr voal tooilleilagh v'ayn. Dy mennick va slane laa dy eabyn jeeigeyragh goll er ceau dy hayrn un chiap gys baare y wharral, as ny keayrtyrn tra v'eh seiyr harrish yn oirr cha ren eh brishey. Cha beagh veg er jeet lhieu gyn Boxer, as y niart echey jeeaghyn dy ve corrym rish shen ec cooid elley ny beyn currit ry cheilley. Tra yinnagh y chlagh vooar goaill toshiaght er skirrey as veagh ooilley ny beyn gyllagh magh dy debejagh tra dennee ad dy row ad goll er hayrn sheese y liargagh, she Boxer va rieuu chionney eh hene noi'n tead as cur stap er y chlagh vooar. As dy chooilley pheigh fakin eh tooilleil seose yn ughtagh oarlagh er oarlagh, yn ennal echey goll er tayrn dy bieau, baareyn ny yngnyn echey greimmey ec y ghrunt as ny lhiatteeny mooarey echey pohllit lesh ollish, v'ad ooilley cur yindys mooar ersyn. Yinnagh Clover cur raue da ny keayrtyrn dy ve kiarailagh gyn cur harrish e niart, agh cha jinnagh Boxer rieuu eaishtagh ree. Va'n daa slogan echey, "Nee'm obbraghey ny s'jeadee," as "Ta Napoleon kiart dy kinjagh," jeeaghyn dy yannoo seose freggyrt dy liooar da dy chooilley ghoilleeid. Va reaghys jeant echey rish y chellagh dy chur eam ersyn three kerrooyrn yn oor ny s'leae 'sy voghrey, ayns ynnyd jeh lieh-oor. As ayns ny shallidyn seyrey echey, jeusyn nagh row monney 'sy lhing shoh, ragh eh ny lomarcen gys y wharral, yinnagh eh chymsaghey lught dy chlagh vrisht as tayrn sheese eh gys ynnyd y wyllin gheayee gyn cooney erbee.

Cha row ny beyn ayns stayd ro olk car y touree, dyn y woise da'n obbyr oc cho creoi. Mannagh row bee oc ny smoo na v'oc ayns traa Jones, ny yei cha row ny sloo oc. Cha nee agh dauesyn hene v'ad kiarail bee, gyn ve orroo neesht cummal seose queig fir dooinnoil vaaralagh, as wheesh va'n vondeish jeh dy beagh feme er failleil dy mennick dy ve ny strimmey na shen. As ayns ymmodde aghtyn va saase ny beyn ayns jannoo reddyn ny s'fondde as ren eh spaarail yn laboraght. Oddagh kiartagyn y lheid as gartlan, myr sampleyr, ve jeant trooid as trooid ayns agh va neu-possible da fir dooinnoil. As reesht, er yn oyr nagh row baagh erbee nish geid veg, cha nee ymmyrchagh v'eh dy hroggal faal dy scarrey yn aber veih thaloo arroo, ren spaarail ram obbyr ayns cummal seose ny cleighyn as giattyn. Agh son shen as ooilley, choud's va'n sourey goll shaghey, haink toshiaght er caghlaaghyn tiarkaght neu-yerkit dy yannoo orroo. Va feme oc er ooil paraffin, er treinaghyn, er streng, er brishtagyn moddee, as er yiarn son ny croughyn cabbil, as cha noddagh fer erbee jeh ve jeant 'sy ghowaltys. Ny s'anmee veagh feme oc neesht er rassyn as toarrey ellynagh, chammah's caghlaaghyn greie as, fy yerrey, yn jeshaght son y wyllin gheayee. Cre'n agh oddagh ad shoh ve kionnit oc, cha noddagh peiagh erbee sheiltyn.

Moghrey Jedoonee dy row, tra ren ny beyn co-chruinnaghey dy gheddyn ny saraghyn oc, ren Napoleon fograghey magh dy row eh er reddaghey polasee noa. Maghey nish, yinnagh Gowaltys ny Beyn goaill ayns ayns dellal rish ny gowaltysyn naboo; cha nee, son shickyrys, son oyr traghtee erbee, agh ynrican dy gheddyn shiartanse dy stooghyn va shirrit myr preis. Myr shoh v'eh reaghey dy chreck creagh hraagh as paart jeh baair curnaght ny bleeaney shoh, as ny s'anmee, dy beagh feme er tooilley argid, veagh eh orroo lhieneey y varney liorish creck oohyn, er-nyn-son va rieuu margey ayns Willingdon. Lhisagh ny kiarkyn, as Napoleon, oltaghey y coayl shoh myr y toyrtys er-lheh ocsyn hene da troggal y wyllin gheayee.

Keayrt elley ghow ny beyn tastey jeh neu-aash neu-vaghtal oc. Gyn cur rish rieuu rish fir dooinnoil, gyn goaill ayns rieuu ayns dellal, gyn jannoo ymmyd rieuu jeh argid – nagh row

adsyn mastey ny kiarailyn s'moghey coardit ec yn chield Çhaglym barriaghtagh shen lurg da Jones ve eebrit magh ass? Ren ooilley ny beyn cooinaghtyn er coardail rish lheid ny kiarailyn: ny, ec y chooid sloo, v'ad smooïnaghtyn dy row cooinaghtyn oc er shen. Ny kiare muckyn aegey ren plaiynt tra ren Napoleon geddyn rey rish ny Çhaglymyn, ren ad yrjaghey ny coraaghyn oc dy faitagh, agh v'ad jeant nyn dost çhelleeragh liorish gynnal feer vooar ec ny moddee. Eisht, 'syn agh cadjin, ren ny kirree brishey magh lesh "Kiare lurgaghyn mie, daa lurgey sie!" as va'n neu-aashid shallidagh jeant rea. Fy yerrey hrog Napoleon seose e chrubbane son tostid as ren eh fograghey magh dy row ooilley ny reaghysyn jeant echey hannah. Cha beagh feme er baagh erbee jeu çheet quail fir dooinnoil, as s'baghtal v'eh dy beagh shen feer neu-yeareeoil. V'eh fosyn goaill ersyn hene y clane errey. Va Mnr. Whymper, as eh ny hurneyr va cummal ayns Willingdon, er choardail rish aghtey myr sheealtagh eddyr Gowaltys ny Beyn as yn seihll mooie, as harragh eh gys y ghowaltys dagh moghrey Jelune dy gheddyn ny saraghyn echey. Hug Napoleon kione er yn oraid echey lesh yn eam cadjin, "Gowaltys ny Beyn Aboo!" as lurg da ny beyn goaill 'Beyn Hostyn' va ny beyn currit ersooyl.

Ny lurg shen hie Squealer garrey mygeayrt y ghowaltys as hug eh fea er aigney ny beyn. Ren eh shickyraghey ad nagh row y kiarail noi goaill ayn ayns dellal as jannoo ymyyd jeh argid rieu er ve coardit, ny eer currit roish. Cha nee agh sheiltynys v'ayn, as s'cosoylagh v'eh dy jinnagh ad geddyn magh dy daink toshiaght er ayns ny breagyn currit mygeayrt ec Snowball. Va kuse dy veyn foast gennaghtyn beggan ourysshagh, agh vrie Squealer jeu dy glick, "Vel shiu shickyragh vel shoh red ennagh ren oo dreamal, chumraagyn? Vel recortys eu jeh lheid y chiarail? Vel eh scruiit sheese boayl ennagh?" As er yn oyr dy row eh firrinagh son shickyrys nagh row veg jeh'n lheid shen scruiit sheese, va ny beyn jeant booiagh dy row ad fo marranys.

Dagh Jelune harragh Mnr. Whymper da'n ghowaltys 'syn agh reaghit. V'eh ny ghooinney beg as cummey skeetagh ersyn as faasaag lieckanagh echey, turneyr as agh dellal feer veg echey, agh gyere dy liooar dy hoiggal ny s'leaie na peiagh erbee elley dy jinnagh Gowaltys ny Beyn feme creckeyder as dy beagh eh feeu cosney yn foilliu. Va ny beyn jeaghyn ersyn çheet as goll as sorçh dy aggle oc, as v'ad shaghney eh wheesh as oddagh shen ve jeant. Ny yei shen, va'n reayrt jeh Napoleon, er ny kiare lurgaghyn echey, cur saraghyn da Whymper, va ny hassoo er daa lurgey, broddey y voyrn oc as ayns paart cur orroo soiaghey jeh'n reaghys noa. Cha row ny cochianglyssyn oc rish kynney deiney dy bollagh cosoyley roosyn myr v'ad roie. Cha row dwoaie sloo ec ny fir dooinnoil er Gowaltys ny Beyn nish dy row eh çheet lesh; dy jarroo, va dwoaie ny smoo oc er na va rieu. Va dagh fer dooinnoil credjal myr banglane e chredjue dy darragh y gowaltys dy ve brisht ec y vank ny s'leaie ny ny s'anmee, as, erskyn ooilley, dy jinnagh y wyllin gheayee failleil. Yinnagh ad meeiteil ayns thieyn-oast as prowal, yn derrey yeh da'n jeh elley, trooid diagrammin, dy row eh shickyragh dy jinnagh y wyllin gheayee tuittym sheese, ny, dy jinnagh ee tannaghtyn ny shassoo, nagh jinnagh ee rieu obbraghey. Agh foast, noi'n aigney oc, ren ad lhiggey da paart dy arrym troggal seose ayndaue son fondid ny beyn ayns reirey ny cooishyn oc hene. Un vonney jeh shoh, ghow ad toshiaght er çheet er Gowaltys ny Beyn rere yn ennym kiart echey as ren ad scuirr veih lhiggey er dy row eh enmyssit Gowaltys y Vannor. Ren ad geddyn rey neesht rish cur Jones er y hoshiaght, lurg da coayl jerkalys erbee jeh goaill y gowaltys echey reesht as hie eh dy chummal ayns ard elley ny çheerey. Er-lhimmey jeh trooid Whymper, cha row choud's nish cochianglys erbee eddyr Gowaltys ny Beyn as y seihll mooie, agh va faueyn ayn dy kinjagh dy row Napoleon er çhee goaill ayn ayns coardailys dellal shickyragh eddyr rish Mnr. Pilkington Foxwood ny rish Mnr. Frederick Pinchfield – agh gyn rieu, va geill currit da, rish ny neesht jeu ec yn un tra.

V'eh mysh y traa shoh dy ren ny muckyn dy doaltattym scughey stiagh 'sy thie eirinagh as ghow ad nyn aaght ayns shen. Reesht v'eh jeeaghyn da ny beyn dy row cooinaghtyn oc dy row kiarail coardit noi shoh ayns ny laghyn toshee, as reesht haink eh lesh Squealer shickyraghey ad nagh row shen myr v'eh. V'eh lane-femoil dy bollagh, as eshyn, dy row boayl kiune ec ny muckyn, va lught inçhynagh y ghowaltys, ayn dy obbraghey. V'eh ny s'cooie neesht da ooashlid y Leeideilagh (as er y gherrid v'eh er n'ghoail toshiaght er çheet er Napoleon liorish yn ennym, "Leeideilagh") dy chummal ayns thie na ayns muclagh injil. Ny yei shen, va kuse jeh ny beyn boirit tra cheayll ad, cha nee ynrican dy row ny muckyn goaill nyn lhongaghyn 'sy thie vooar as jannoo ymmyd jeh'n çhamyr soie cour soccar as cloie, agh chammah's shen v'ad goll dy lhie ayns ny lhiabbaghyn. Ren Boxer lhiggey lesh 'syn agh cadjin lesh "Ta Napoleon kiart dy kinjagh!", agh ren Clover, as v'ee smooïnaghtyn dy row cooinaghtyn eck er reill shickyry noi lhiabbaghyn, goll gys kione y toalt as hug ee eab er toiggal ny Shiaght Annaghyn va scruit ayns shen. Tra hooar ee magh nagh dod ee toiggal veg agh dagh lettyr er-lheh, fer as fer, ren ee cur-lesh Muriel.

"Vuriel," as ish, "lhaih dou y Chiaroo Anney. Nagh vel eh gra red ennagh mychione gyn goll dy lhie arragh ayns lhiabee?"

Lesh paart dy ghoilleid ren Muriel lettraghey magh eh.

"T'eh gra, 'Cha jean baagh erbee goll dy lhie ayns lhiabee lesh brelleeïnyn,'" ren ee fograghey magh fy yerrey.

By whaagh dy liooar eh, cha row cooinaghtyn ec Clover dy row y Chiaroo Anney gimraa brelleeïnyn, agh er yn oyr dy row eh ayns shen er y voalley, gyn ourys shen myr v'eh. As va caa da Squealer, as haghyr eh dy row eh goll shaghey ec y traa shoh, as ghaa ny three moddee marish, cur toiggalys kiart er y chooish.

"Ta shiu er chlashtyn, eisht, chumraagyn," as eshyn, "dy vel shinyn ny muckyn goll dy lhie nish ayns ny lhiabbaghyn 'sy thie eirinagh? As cre'n fa nagh? Cha row shiu sheiltyn, son shickyrys, dy row rieu reill noi lhiabbaghyn? Lhiabee, cha nel shen agh boayl dy ghoil dy lhie. Ta carnane choonlee ny lhiabee, my vees shiu jeeaghyn urree dy chiart. Va'n reill noi brelleeïnyn, as yn eie er-nyn-son cummit ec fir dooinnoil. Ta shin er n'ghoail ny brelleeïnyn jeh lhiabbaghyn y thie eirinagh, as ta shin nyn gadley eddyr lhuishagyn. As lhiabbaghyn lane-souyr t'ad neesht! Agh cha nel ad ny souyrey na ta shin feme, foddym insh diu, chumraagyn, lesh ooilley yn obbyr inçhynagh ta shin dy chooilleeney 'sy lhing shoh. Cha nel shiu son cummal voin nyn vea, vel, chumraagyn? Cha nel shiu son cur orrin ve ro skee dy chooilleeney ny curymyn ain? Cha nel fer erbee jiu dy feer gearree fakin Jones back, vel?"

Ren ny beyn aa-hickyraghey eh çhelleeragh mychione y chooish shen, as cha row veg elley grait mychione ny muckyn goll dy lhie ayns lhiabbaghyn y thie eirinagh. As tra haink fogrey, laa ny ghaa ny s'anmee, maghey nish dy jinnagh ny muckyn irree oor ny s'anmee 'sy voghrey na ny beyn elley, cha row plaiynt er ny yannoo mychione shen noadyr.

Liorish yn ouyr va ny beyn skee agh maynrey. Va blein chreoi er ve oc, as lurg creck paart jeh'n traagh as jeh'n arroo, cha row ny stoyryn bee son y gheurey ayns palçhid, er chor erbee, agh va'n wyllin gheayee cooilleeney son dy chooilley red. V'eh bunnys lieh-troggit nish. Lurg yn ouyr va traa dy emshyr chleeir çhirrym ayn, as ren ny beyn tooilleil ny s'jeadee na ren ad rieu, as adsyn smooïnaghtyn dy row eh lane feeu troagyraght huggey as veih feiy'n laa lesh

kiappyn dy chlagh dy voddagh ad, liorish shen y yannoo, troggal seose ny boallaghyn liorish trie elley. Yinnagh Boxer eer cheet magh 'syn oie as obbraghey rish oor ny ghaa ny lomarcan fo re-hollys vooar yn ouyir. Ayns ny shallidyn seyrey oc yinnagh ny beiyn shooyl mygeayrt as mygeayrt y wyllin lieh-jeant, jannoo mooar jeh niart as jeerid ny boallaghyn eck as goaill yindys dy row rieu yn ablid oc dy hroggal veg cho ooasle. Cha nee agh shenn Venjamin va gobbal cheet dy ve greesit mychione y wyllin gheayee, agh, 'syn aght cadjin, cha jinnagh eh gra veg er-lhimmey jeh'n raa do-hoiggalagh dy row assylyn tannaghtyn bio rish traa foddey.

Haink Mee Houney, lesh geayaghyn freaynagh neear-ass. Va feme er scuirr veih troggal er yn oyr dy row eh ro fliugh nish dy vestey y cement. Fy yerrey haink oie as cho rastagh va'n gaal dy row troggalyn y ghowaltys leaystey er nyn undinyn as va kuse dy lhic sheidit veih mullagh y toalt. Ren ny kiarkyn doostey as v'ad scoylgernee lesh atchim er yn oyr dy ren ad ooilley dreamal ec yn un traa jeh clashtyn gunn goll er orraghey 'syn oddid. 'Sy voghrey haink ny beiyn magh ass nyn mwaagyn dy gheddyn magh dy row y croan brattagh er ve sheidit sheese as dy row billey lhiouan ec bun yn ooylagh er ve pluggit neese gollrish rahgyl. V'ad kiart er n'ghoaill tastejeh shen tra v'ish eam dy ghrogh-hreiys magh ass scoarnagh dagh baagh. S'agglagh va'n reayrt roish nyn sooilyn. Va'n wyllin gheayee jeant tholtanagh.

Lesh un aigney ren ad roie gys y voayl. Ren Napoleon, as s'an-vennick v'eh dy row eh jannoo ny smoo na shooyl, roie rouesyn. She, ayns shen v'ee ny lhie, eiyrtys yn laboraght oc ooilley, jeant rea rish ny undinyn eck, as ny claghyn va brisht as ymmyrkit cho tooilleilagh oc nyn lhie skeaylt ooilley mygeayrt. Gyn ablid oc dy loayrt hoshiaght, v'ad nyn shassoo as jeeaghyn dy dobberanagh er cooid skeaylt ny claghyn lhieggit. Ren Napoleon keimeragh huggey as veih dy tostagh, eisht as nish stonnaghey ec y thalloo. Va'n famman echey er jeet dy ve reen as v'eh scuitchal dy geyre veih cheu gy heu, va ny chowrey aynsyn dy obbyr trome inchnagh. Doaltattymagh ren eh scuirr veih myr dy beagh briwnys jeant echey.

"Chumraagyn," as eshyn dy kiune, "vel fys euish quoi ec ta'n foill son shoh? Vel fys eu er y noid t'er jeet 'syn oie as er lhieggal y wyllin gheayee ain? SNOWBALL!" dy doaltattym ren eh buirrooghey lesh coraa myr taarnagh. "Snowball eh t'er n'yannoo y red shoh! Ass slane elgys, jerkal rish cur y drogh er ny plannyn ain as dy chooilleeney eh hene son yn eebirtys neareydagh echey, ta'n traitoor shoh er snaue stiagh fo v'reid ny hoie as er stroie yn obbyr ain jeh bunnys blein. Chumraagyn, ayns shoh as kiart nish ta mee fograghey magh dy vel deyre baaish ec Snowball. 'Baagh Feniaghtagh jeh'n Nah Rang' as lieh hubbag dy ooyl da baagh erbee ta cooilleeney y cairys. Lane tubbag da peiagh ennagh ta goaill bio eh!"

Va greain erskyn towse ec ny beiyn dy chlashtyn dy voddagh Snowball ve kyndagh rish lheid y yannoo. Va eam dy ymmoose, as ghow dy choilley pheigh toshiaght er jannoo magh aghtyn dy hayrtyn Snowball dy jinnagh eh rieu cheet back. Bunnys chelleeragh va cowraghyn coshey muickey feddynit 'syn aiyr beggan veih'n nappan. Cha noddagh ad goll er lorgey agh rish stundayrt ny ghaa, agh v'eh jeeaghyn dy row ad goll gys doarlish 'sy chleigh. Ren Napoleon stonnaghey oc dy dowin as dooyrt eh dy row ad jeant ec Snowball. Hug eh myr e varel dy by chosoylagh eh dy daink Snowball veih'n ard va Gowaltys Foxwood ny lhie.

"Gyn cumrailyn elley, chumraagyn!" dyllee Napoleon lurg da ny cowraghyn coshey goll er nyn scrutaghey. "Ta obbyr ry yannoo. Y moghrey shoh hene ta shin goaill toshiaght er aahroggal y wyllin gheayee, as nee mayd troggal feiy'n clane geurey, vel fliaghey ayn ny soilshey ny greiney. Nee mayd soilshaghey magh da'n traitoor treih shoh nagh voddagh eh geddyn rey rish yn obbyr ain dy aashagh. Er-oaie lhien, chumraagyn! Y wyllin gheayee aboo! Gowaltys ny Beiyn aboo!"

Cabdil VII

Sharroo va'n geurey. Lurg yn emshyr sterrymagh haink sniaghtey as sniaghtey bog, as eisht rio lheeah creoi nagh ren brishey derrey foddey ayns Toshiaght Arree. Hannee ny beyn cho mie as oddagh ad lesh aa-hroggal y wyllin gheayee, as fys mie oc dy row y seihll mooie jeeaghyn orroo, as dy jinnagh ny fir dooinnoil trooagh goaill boggey as jannoo gannidys mannagh row kione currit er y wyllin gheayee dy traaoil.

Ass goanlys, ren ny fir dooinnoil lhiggey orroo nagh row ad credjal dy nee Snowball eh ren stroie y wyllin gheayee: dooyrt ad dy row ee er duittym sheese er yn oyr dy row ny boallaghyn ro cheyl. Va fys ec ny beyn nagh row shen myr v'eh. Ny yei, v'eh reaghit dy jinnagh ad troggal ny boallaghyn three trieyn er çheeid y cheayrt shoh, shaghey hoght oarleeyn jeig myr v'ad roë, as hug shen orroo çhymstaghey towseyn foddey ny smoo dy chlaghyn. Rish tammylt va'n wharral lane dy niaghtey sheebit as cha row veg ry yannoo. Hie reddyn er oaie ayns paart 'syn emshyr çhirrym rioeeagh haink ny lurg, agh she obbyr dewil v'ayn, as cha noddagh ny beyn gennaghtyn cho treishteilagh my-e-chione as v'ad gennaghtyn roish shen. V'ad dy kinjagh feayr, as son y chooid smoo accryssagh neesht. Cha nee agh Boxer as Clover nagh ren rieuu coayl cree. Ren Squealer oraidyn lane vie mychione boggey y hirveish as ooaslid y laboraght, agh va ny beyn geddyn bree smoo ayns niart Boxer as yn eam gyn scuirr echey, "Nee'm obbraghey ny s'jeadee!"

Jerrey Geuree haink bee dy ve goan. Va'n rheynn dy arroo jeant foddey ny sloo, as va fogrey dy beagh rheynn elley dy phraase currit dy chooilleeney son shen. Eisht haink eh magh dy row cooid smoo ny praaseyn thallooin er ve riojit ayns ny clampyn, nagh row coodit lesh çheeid dy liooar. Va ny praaseyn er jeet dy ve bog as y daah jeu millit, as cha nee agh fer ny ghaa va mie dy liooar dy ee. Rish laghyn er laghyn cha row veg ec ny beyn dy ee agh coau as napinyn. V'eh jeeaghyn nagh row veg çheu nyn meealoo agh goaill neeu veih accryys.

S'lane-femoil v'eh dy cheiltyn y nhee shoh veih'n theihll mooie. As adsyn jeant daaney liorish tuittym y wyllin gheayee, va ny fir dooinnoil croo breagyn noa mychione Gowaltys ny Beyn. Keayrt elley va faaue goll mygeayrt dy row ooilley ny beyn ayns raad y vaais veih gortey as çhingys, as dy row ad dy kinjagh cagey ny mast'ocsyn as v'ad goaill toshiaght er y channibalaght as dunverys clienney. Va fys mie ec Napoleon er ny drogh-eirytyssyn oddagh çheet rish dy beagh toiggaly ry gheddyn mychione ny nheeghyn feer bentyn rish stayd y vee, as ren eh reaghey dy yannoo ymyd jeh Mnr. Whymper dy skeaylley mygeayrt skeeal slane noi shen. Choud's nish s'goan v'eh, ny cha ren eh rieuu taghyrt, dy daink ny beyn quail Whymper tra v'eh çheet dagh shiaghtin: agh nish va sarey currit da kuse dy veiy reiht, son y chooid smoo nyn girree, dy ghra myr ayn y choloayrtys oc dy row rheynnyn bee er nyn mishaghey. Chammah's shen, hug Napoleon sarey dy row ny coir bunnys follym 'sy waane stoyr dy ve lhieent bunnys gys yn oirr lesh geinnagh, eisht va shen coodit lesh ny va er-mayrn jeh'n arroo as jeh'n veinn. Rere leshtal cooie ennagh, va Whymper er ny leeideil trooid y waane stoyr, dy row eh lowit dy gheddyn shilley beg jeh ny coir. V'eh mollit, as hannee eh lesh insh da'n theihll mooie nagh row genney dy vee ayns Gowaltys ny Beyn.

Son shen as ooilley, çheet gys jerrey Jerrey Geuree haink eh dy ve baghtal dy beagh feme er kionnaghey paart elley dy arroo veih boayl ennagh. Ny laghyn shoh, s'anvennick va Napoleon ry akin dy foshlit, agh ren eh ceau ooilley e hraa 'sy thie eirinagh, as arrey goll er freayll ec dagh dorrys jeh liorish moddee va jeeaghyn elgyssagh. Tra yinnagh eh çheet magh ass, v'eh ayns agh jesh-chliaghtagh, lesh sheshaght as shey moddee aynjee ren cruinnaghey

dy çhionn mygeayrt-y-mysh as ren gyrnal dy row peiagh ennagh çheet ro faggys da. Dy mennick cha row eh çheet rish eer moghrey Jedoonee, agh hug eh magh ny saraghyn echey trooid fer elley jeh ny muckyn, dy cadjin Squealer.

Moghrey Jedoonee dy row ren Squealer fograghey magh dy row eh er ny kiarkyn, va kiart er n'ghoailt toshiaght er breh reesht, livrey seose ny oohyn oc. Va Napoleon er hoiaghey jeh conaant, trooid Whymper, er kiare cheead ooh 'sy chiaghtin. Yinnagh y prios orroosyn eeck son arroo as meinn dy liooar dy reayll obbraghey y gowaltys derrey harragh y sourey as derrey veagh y stayd oc ny sassey.

Tra cheayll ny kiarkyn shoh, va eam as yllagh agglagh jeant oc. Va raaue currit daue ny s'leaie foddee dy beagh feme er y choayl shoh, agh cha row ad credjal dy jinnagh eh taghyrt ayns rieughid. V'ad kiart er jannoo aarloo ny aailyn oc son guirr yn arree, as ren ad gaccan, as ny oohyn goll er goaill ersooyl nish, dy beagh dunverys eh. Son y chield cheayrt neayr's eebyrtys Jones, va red ennagh gollrish irree magh ayn. As three earragyn Minorcagh Doo leeideil ad, ren ny kiarkyn eab lane-chiarit dy chur gys veg yeeareeyn Napoleon. Va'n saase oc dy etlagh seose gys ny riblassyn as breh ny oohyn oc ayns shen, ren smoashal ayns peeshyn er y laare. Ren Napoleon aghtey dy bieau as dy neu-vyghinagh. Hug eh sarey dy chur stap er rheynn bee ny kiarkyn, as ren eh oardagh dy beagh deyrey baaish er baagh erbee hug wheesh as beark da kiark. Ren ny moddee shickyrt dy row bree currit da ny saraghyn shoh. Rish queig laghyn ren ny kiarkyn cummal rish, eisht ren ad cur seose as hie ad back gys ny kishtaghyn edd oc. Eddyrt yn daa hraa, hooar nuy kiarkyn baase. Va ny kirp oc oanluckit 'syn ooylagh, as va fys currit mygeayrt dy dooar ad baase er-coontey coccidiosis. Cha geayll Whymper veg jeh'n chooish, as va ny oohyn livreit dy cooie, lesh van y ghroseyr goll er imman seose gys y ghowaltys un cheayrt 'sy çhiaghtin dy ghoailt ersooyl ad.

Ooilleyn yn traa shoh cha row shillee erbee jeh Snowball. Va faaue ayn dy row eh keiltyn ayns fer jeh ny gowaltysyn naboo, eddyrt Foxwood ny Pinchfield. Liorish y traa shoh va Napoleon beggan ny s'caarjyssee rish ny eirinee elley na v'eh roie. Haghyr eh dy row 'syn uhllin carnane fuygh va er ny eekey ayns shen jeih bleaney ny s'leaie tra va keyll veg dy viljyn faih er ny lhieggal. V'eh mie-çhirmit, as ren Whymper coyrlaghey da Napoleon dy chreck eh; va Mnr. Pilkington as Mnr. Frederick neesht jean dy chionnaghey eh. Va Napoleon leaystey eddyrt yn jees jeu, as cha noddagh eh reih eddyrt oc. Va geill currit da, traa erbee v'eh jeeaghyn dy ve er çhee reaghey coardail rish Frederick, dy row eh fogrit magh dy row Snowball follaghey ayns Foxwood, agh, tra v'eh goll er cleayney gys Pilkington, dy row eh goll er gra dy row Snowball ayns Pinchfield.

Doaltattymagh, dy moghey 'syn arragh, va red atçhimagh er ny gheddyn magh. Dy follit, va Snowball taaghey y gowaltys 'syn oie! Va ny beiynt cho boirit, s'goan oddagh ad cadley ayns ny sthollyn oc. Dagh oie, rere faaue, v'eh snaue stiagh ayn fo vroid y dorraghys as ren eh dy chooillee horçh dy ghrogh-yannoo. Ren eh geid yn arroo, ren eh lhieggal ny cruickyn blieaun, vrish eh ny oohyn, ren eh sthampey harrish ny immyryn resh, ren eh caigney y roost jeh ny biljyn messoil. Traa erbee va red ennagh goll fragym haink eh dy ve cadjin dy chur gys lieh Snowball eh. Dy row uinnag brisht ny va jeeig plooghit, shickyrt v'eh dy niarragh peiagh ennagh dy row Snowball er jeet 'syn oie as ren eshyn eh, as tra va ogher y waane stoyr caillt, va dy chooillee vaagh shickyrt dy ren Snowball ee y cheau sheese y çhibbyr. S'quaagh dy liooar v'eh, hannee ad lesh credjal shoh eer lurg da'n ogher chaillt v'er ny geddyn fo sack meinn. Ren yn ollagh gra lesh un aigney dy jinnagh Snowball snaue stiagh ayns ny sthollyn oc as ad y vlieaun choud's v'ad nyn gadley. Va ny beiynt gra neesht dy row ny roddanyn, va boiraneagh y geurey shen, jannoo seose cologe rish Snowball.

Ren Napoleon fograghey magh dy lhisagh slane scrutaght ve jeant jeh jannoo Snowball. As ny moddee marish ghow eh toshiaght as ren eh turrys kiarailagh dy scrutaghey troggalyn y ghowaltys, lesh ny beyn elley geiyrt ersyn ec foddid arrymagh. Lurg dagh kesmad ny ghaa yinnagh Napoleon sthappal as stronaghey y thaloo son lorgyn dy chowraghyn coshey Snowball, as eshyn gra dy voddagh eh ad y chronaghey liorish y soar. Ren eh stronaghey ayns dagh corneil, 'sy toalt, 'sy thie ollee, ayns ny thieyn kirkey, 'sy gharey losseragh, as hooar eh lorgaghyn Snowball ayns bunnys dy chooilley voayl. Verragh eh y stroin echey gys y thaloo, yinnagh eh stronaghey stiagh dy downin kuse dy cheayrtyn, as yllagh magh ayns coraa agglagh, "Snowball! V'eh ayns shoh! Foddym soaral eh dy baghtal!" As ec yn ockle, "Snowball," yinnagh ooilley ny moddee lhiggey magh gyrnal lane atchimagh as ren ad soilshaghey magh ny feeackley oc er dagh çheu.

Va ny beyn lane agglit ass. V'eh jeeaghyn dauesyn dy nee sorçh ennagh dy niart neu-akinagh va Snowball, lhieneey stiagh yn aer mygeayrt-y-moo as baggyrt orroo lesh dy chooilley horçh dy ghaue. 'Syn astyr hug Squealer eam orroo dy chruinnaghey, as lesh gruaie dy aggle 'syn eddin echey dinsh eh daue dy row naight trome-chooishagh echey dy insh daue.

"Chumraagyn!" dyllee Squealer, as corlheimeraghtyn beggey imneagh goll er jannoo echey, "ta red feer agglagh er ny gheddyn magh. Ta Snowball er chreck eh hene da Frederick, Gowaltys Pinchfield, as eh kiart nish jannoo aarloo dy hoiaghey orrin as dy ghoail y gowaltys ain voin! Snowball eh nee eh y leeideil tra ta'n soiaghey er n'ghoail toshiaght. Agh red ennagh eer ny smessey na shen eh. Va shin smooinghtyn dy row irree magh Snowball jeant ynrican er coontey e chorvian as e vooaralys. Agh va shin neu-chiart, chumraagyn. Vel fys eu er yn oyr firrinagh? Va Snowball co-obbraghey rish Jones veih'n eer hoshiaght! Jantagh follit Jones v'eh, ooilley yn traa. Shoh ooilley er ny phrowal liorish docmadyn ren eh faagail ny lurg as ny ta shin er n'gheddyn magh, cha nee agh kiart nish. Da'n aigney aym, shoh soilshaghey magh mooarane, chumraagyn. Nagh vaik shin er-nyn-son hene yn aght hug eh eab – dy aighoil gyn speideilys – er jannoo shickyr dy beagh shin currit fo haart as stroit ayns Cah y Thie Ollee?"

Va ny beyn jeant thollvaneagh. Va shoh olkys foddey ny smessey na Snowball stroie y wyllin gheayee. Agh hie minnid ny ghaa shaghey roish my voddagh ad toiggal y clane skeeal. Va cooinaghtyn oc ooilley, ny v'ad smooinghtyn dy row cooinaghtyn oc, er yn aght honnick ad Snowball roie stiagh rouesyn er y noid ayns Cah y Thie Ollee, er yn aght ren eh ad y aa-chruinnaghey as y ghreinnaghey ooilley'n traa, as er yn aght nagh ren eh farkiaght rish shallid eer tra ren grineyn veih gunn Jones lhottey e ghreym. Hoshiaght v'eh beggan doillee dy hoiggal yn aght va shoh freggyrtagh dasyn cooney lesh Jones. Eer Boxer, as s'goan va eshyn cur feyshtyn, va eshyn currit fud y cheilley. Ren eh lhie sheese, ren eh filley ny yngnyn toshee echey fosyn, as lesh eab doccaragh haik eh lesh e smooinghtyn y chur ayns oardagh.

"Cha nel mee credjal shen," as eshyn. "Ren Snowball caggey dy dunnal ayns Cah y Thie Ollee. Honnick mee eh er-my-hon hene. Nagh dug shin dasyn 'Baagh Feniaghtagh jeh'n Chied Rang' çhelleeragh ny lurg shen?"

"Shen va'n marranys ain, chumraag. Er yn oyr dy vel fys ain nish – t'eh ooilley scruit sheese ayns ny docmadyn follit hooar shin – dy row eh ayns rieughid cur eab er miolaghey shin gys nyn stroialtys."

"Agh v'eh lhottit," as Boxer. "Honnick shin ooilley eh coodit lesh fuill va roie magh ass."

"Shen va paart jeh'n reaghys!" dyllee Squealer. "Cha ren orraghey Jones agh screebey eh. Oddin's soilshaghey magh diu shoh scruiit lesh y laue echey hene, dy voddagh shiu lhaih eh. Va'n chialg dy jinnagh Snowball, 'sy traa smoo gaueagh, cur cowrey dy roie er çhea as lhiggey da'n noid goaill yn ynnyd shen. As dobbyr da çheet lesh – yiarrin, chumraaghyn, dy beagh eh er jeet lesh er-be dy row nyn Leeideilagh feniaghtagh, y Cumraag Napoleon, ayn. Nagh vel cooinaghtyn euish er, kiart ec y traa ren Jones as e gheiney cosney stiagh 'sy chlose, dy ren Snowball çhyndaa dy doaltattym as ren eh roie er çhea, as ren ymmodee beiyn geiyrt ersyn? As nagh vel cooinaghtyn euish neesht dy row eh kiart ec y traa shen as aggle skeaylley magh as va dy chooilley red jeeaghyn dy ve caillt, dy ren y Cumraag Napoleon lheimmey er oaie lesh slogan, "Baase da Fir Dooinnoil!" as ren eh sei y ny feeackleyn echey stiagh ayns lurgey Jones? Gyn ourys, ta cooinaghtyn euish er SHEN, chumraagyn," deie Squealer, as eh corlheimeraght veih çheu gy heu.

Nish tra va coontey cho baghtal as jalloo jeant ec Squealer, v'eh jeeaghyn da ny beiyn dy row cooinaghtyn oc er. Ec y chooid sloo, va cooinaghtyn oc ec traa smoo gaueagh y chah dy ren Snowball çhyndaa dy roie er çhea. Agh va Boxer foast beggan neu-aashagh.

"Cha nel mee credjal dy row Snowball ny hraitoor veih'n toshiaght," as eshyn fy yerrey. "Ny t'er ve jeant echey neayr's shen, shen red elley. Agh ta mee credjal, ayns Cah y Thie Ollee, dy row eh ny chumraag mie."

"Ta'n Leeideilagh ain, y Cumraag Napoleon," ren Squealer fograghey magh, as eh loayrt feer voal as dy çhionn, "er n'ghra dy shicky – dy shicky, chumraag – dy nee jantagh Jones va Snowball veih'n eer hoshiaght – she, as veih foddey roish my row smooiinaghtyn rieu currit da'n Irree Magh."

"Ah, shen red elley!" as Boxer. "My vees y Cumraag Napoleon gra shen, shen kiart gyn ourys."

"Shen yn aigney chiart, chumraag!" dyllee Squealer, agh va geill currit da, dy ren eh ceau shilley doo er Boxer lesh ny sooillyn beggey soilsheanaagh echey. Hyndaa eh dy ghoill, eisht ren eh leaystey as dooyrt eh neesht dy monneydagh, "Ta mee cur raue da dy chooilley vaagh 'sy ghowaltys shoh dy reayll ny sooillyn echey foshlit feer llean. Son ta oyr ain smooiinaghtyn dy vel shiartanse dy yantee folliaghtagh Snowball nyn lhie gyn yss ny mast'ain ec y traa shoh!"

Kiare laghyn ny s'anmey, dy anmagh 'syn astyr, hug Napoleon sarey da ooilley ny beiyn dy heet ry cheilley 'sy chlose. Haink Napoleon magh ass y thie eiryns, as v'eh ceau yn daa voyn echey (er yn oyr dy dug eh dasyn hene er y gherid "Baagh Feniaghtagh jeh'n Chied Rang" as "Baagh Feniaghtagh jeh'n Nah Rang"), lesh ny nuy moddee feer vooar echey corlheimeraght mygeayrt-y-mysh as lhiggey magh gynnal ren cur er creau craueyn-drommey ny beiyn ooilley. Ren ad ooilley cruetçal dy tostagh ayns ny buill oc, as v'eh jeeaghyn dy row fys oc rolaue dy row red ennagh atçhimagh er çhee taghyrt.

Va Napoleon ny hassoo dy groamagh jeeaghyn er e lught-eaishtee, eisht ren eh lhiggey magh sogh ving gheyre. Çhelleeragh ren ny moddee lheimmey er oaie, ghow ad kiare jeh ny muckyn liorish y chleaysh as hayrn ad ad, as adsyn screeagh lesh pian as aggle, gys cassyn Napoleon. Va cleayshyn ny muckyn lhiggey fuill, va blass ny folley ec ny moddee as rish shallid ny ghaa v'ad jeeaghyn dy ve slane ass nyn geeayll. As yindys ec dy chooilley pheiaagh,

ren three jeu ceau ad hene er Boxer. Honnick Boxer dy row ad çheet as hug eh magh yn ingin vooar echey, ghow eh moddey heose 'syn aer as ren eh cummal sheese eh er y thaloo. Ren y moddey screeagh magh son myghin as ren yn jees elley çhea as ny fammanyn oc eddyr nyn lurgaghyn. Yeeagh Boxer er Napoleon dy gheddyn magh row eh dy vroom gy baase eh ny dy lhiggey seyr eh. V'eh jeeaghyn dy daink gruaie elley er eddin Napoleon, as doardee eh dy gyere Boxer dy lhiggey seyr y moddey, as er shen dirree seose Boxer e ingin as ren y moddey snaue ersooyl, broojit as gullal.

Lurg tammylt ren y musthaa injillaghey. Va ny kiare muckyn fuirraghtyn, er creau, lesh kyndid ry akin ayns dagh craplag nyn eddinyn. Nish hug Napoleon eam orroo dy ghoail-rish ny loghtyn oc. She adsyn va ny kiare muckyn cheddin as va plaiynt oc tra ren Napoleon geddyn rey rish ny Çhaglymyn Jedoonee. Gyn brod erbee elley ren ad goail-rish dy row ad dy follit er hannaghtyn lesh loayrt rish Snowball kiart neayr's yn eebirtys echey, dy ren ad co-obbraghey rishyn ayns stroie y wyllin gheayee as dy row coardailys er ve jeant oc marish dy chur Gowaltys ny Beiyngys Mnr. Frederick. Dooyrt ad neesht dy ren Snowball goail-rish kiongooyrt roosyn dy preevaadjagh dy row eh er ve jantagh folliaghtagh Jones rish bleentyn roish shen. Tra hug ad kione er goail-rish nyn loghtyn, ren ny moddee çhelleeragh raipay magh ny scoarnee oc, as ayns coraa atçhimagh vrie Napoleon dy baggyrtagh row veg dy ghoail-rish ec baagh erbee elley.

Nish ren ny three kiarkyn, va nyn leedeilee 'syn irree magh hug ad eab er bentyn rish ny oohyn, çheet er oaie as dooyrt ad dy daink Snowball rish dauesyn ayns ashlish as ren eh greinnaghey ad dy ve neu-viallagh da saraghyn Napoleon. V'adsyn, neesht, buitçhoorit. Eisht haink guiy er oaie as ren ee goail-rish dy ren ee follaghey shey jeeassyn arroo 'syn ouyir nurree as er nee ad 'syn oie. Eisht ren keyrrey goail-rish dy ren ee mooin 'sy logh-uyll – as ish er ny greinnaghey dy yannoo shoh, myr dooyrt ee, liorish Snowball – as ren daa cheyrrey elley goail-rish dy row dunverys jeant oc, marroo shenn rea, va ny eirytyssagh jeean er-lheh jeh Napoleon, liorish cloh eh mygeayrt as mygeayrt çheinjean tra v'eh surranse liorish moughane. V'ad ooilley marrooit 'sy voayl shen. As myr shoh ren yn skeeal dy ghoail-rish as dy chur gy baase goll er, derrey va carnane dy chirp varroo nyn lhie mygeayrt cassyn Napoleon as trome va'n aer lesh soar ny folley, nagh nhione daue ayns shen neayr's eebirtys Jones.

Tra v'eh ooilley jeant as harrish, ren ny beiyngys elley, er-lhimmey jeh ny muckyn as ny moddee, snaue ersooyl ooilley cooidjagh. V'ad currit er creau as lhag-chreeagh. Cha row fys oc er ny va ny s'atçhimee – traitoorys ny beiyngys ren cologagh rish Snowball, ny'n cooilleeney dewil v'ad kiart er n'akin. Ayns ny shenn laghyn va dy mennick reayrtys dy gheayrtey folley kiart cho agglagh as shen, agh v'eh jeeaghyn dauesyn ooilley dy row eh foddey ny smessey nish dy row eh taghyrt nyn mast'oc hene. Neayr's ren Jones faagail y gowaltys, derrey yn laa v'ayn shen, cha ren baagh marroo baagh erbee elley. Cha row eer roddan currit gy baase. Hie ad rhyboo gys y nappan beg, ayn va'n wyllin gheayee lieh-jeant ny shassoo, as lesh un aigney ren ad ooilley lhie sheese myr dy beagh ad nyn lhie jingit ry cheilley dy chur çhiow dauesyn hene – Clover, Muriel, Benjamin, yn ollagh, ny kirree as slane possan dy ghuoiee as dy chiarkyn – dy chooilley pheiyagh, dy jarroo, er-lhimmey jeh'n chayt, ren lhei'e ersooyl doaltattymagh kiart roish my ren Napoleon cur sarey er ny beiyngys dy heet cooidjagh. Rish tammylt liauyr dy liooar cha ren peiyagh erbee loayrt. Cha nee agh Boxer hantee ny hassoo. Ren eh foosterey huggey as veih, scuitçhal y famman liauyr doo echey noi ny lhiatteeyn echey as eisht as nish yinnagh eh lhiggey magh shutternee beg dy yindys. Fy yerrey dooyrt eh:

"Cha nel mee toiggal eh. Cha neign's er chredjal dy voddagh nyn lheid shen taghyrt 'sy ghowaltys ain. Cha nod eh ve agh er coontey fout ennagh ainyn. Ta'n freggyrt, choud's ta mish fakin eh, shen dy obbraghey ny s'jeadee. Maghey shoh nee'm irree slane oor ny s'moghey 'sy voghrey."

As hie eh roish, dridal dy trome dy gholh gys y wharral. Lurg da roshtyn y voayl shen, ren eh çhymysaghey daa laad dy chlagh ass nyn geilley as hayrn eh ad sheese gys y wyllin gheayee roish my ren eh goll dy lhie son yn oie.

Va ny beyn nyn lhie jingit ry cheilley mygeayrt Clover, gyn loayrt. Va'n nappan ayn v'ad nyn lhie cur daue reayrt lheap harrish y çheer. Va chooid smoo Gowaltys ny Beyn ayns nyn shilley – yn aber liauyr va sheeyney magh sheese gys y raad mooar, y woaillee hraagh, y cheyll veg, y logh uyll, ny magheryn traueit ayndaue va'n curnaght aeg mea as glass, as mulleeyn ruy troggalyn y ghowaltys lesh y jaagh cassey neese veih ny çhimleeyn. She fastyr beg cleir yn arree v'ayn. Va'n faiyr as ny cleighyn booghagh jeant myr airh liorish goullyn rea ny greiney. Cha row rieu y gowaltys – as lesh sorçh dy yindys va cooinaghtyn oc dy by lhiusyn hene va'n gowaltys, dagh oarlagh jeh y shellooderys oc hene – jeeaghyn da ny beyn dy ve ny voayl as cho mooar va'n mian oc er. Choud's yeeagh Clover sheese y lhiargagh ren ny sooilyn eck lhieneey lesh jeir. Dy beagh ablid er ve eck dy chur fockleyn da'n smooinght eck, veagh shen dy ghra nagh row shoh va'n dean oc tra ren ad cur ad hene bleeantyn er dy henney dy obbraghey dy chur fo haart ny fir dooinnoil. Cha row ny reayrtyn shoh dy atçhim as dy vuitçhoorys ny v'ad jerkal rish yn oie shen tra ren shenn Vajor greinnaghey ad hoshiaght dy irree magh. Dy beagh jalloo erbee er ve ecksh jeh'n traay ry heet, veagh shen er ve jeh co-voodeeys dy veiynt jeant seyr veih accyrys as veih'n chip, ooilley co-chorrym, cagh obbraghey rere yn ablid echey, ny fir lajer coadey ny fir annoon, 'syn agh ren ish coadey aail caillt ny ein hunnagh lesh e lurgey toshee yn oie ren Major yn oraid echey. Ayns ynyd jeh shen – cha row fys eck er yn oyr – v'ad er jeet gys traay as cha b'loys da peiagh erbee gra dy jeeragh ny va'n barel echey, tra va moddee elgyssagh gyrnal roauail dy chooilley voayl, as tra v'eh ort's jeeaghyn er choud's va ny cumraagyn ayd's raipit ayns peeshyn lurg daue goaill-rish loghtyn agglagh. Cha row eie dy irree magh ny dy vee-viallys 'sy chione eck. Va fys eck, eer myr va reddyn goll, dy row y stayd oc foddey ny share na v'oc ayns laghyn Jones, as dy row feme, roish dy chooilley red elley, er cur lhietrymys er ny fir dooinnoil çheet er-ash. Cre erbee haghryagh, yinnagh ee tannaghtyn firrinagh, obbraghey dy creoi, goaill ayns laue ny saraghyn va currit j'ee as soiaghey jeh leeideilys Napoleon. Agh ny yei shen as ooilley, cha row eh son shoh dy ren ish as ooilley ny beyn elley cur nyn dreisht as dy ren ad obbraghey. Cha row eh son shoh dy ren ad troggal y wyllin gheayee as dy ren ad shassoo noi bulladyn gunn Jones. Shoh va'n smooinghtyn eck, ga nagh row ny fockleyn eck dy hoilshaghey magh eh.

Fy yerrey, as ish gennaghtyn dy row shoh ayns agh ennagh red elley cooie ayns ynyd jeh ny fockleyn nagh voddagh ee feddyn, ghow ee toshiaght er goaill 'Beyn Hostyn'. Ren ny beyn elley va nyn soie mygeayrt-y-moe goaill ayren ayn as ren ad goaill eh three keayrtyn ass y cheilley – feer ving, agh dy moal as dy dobberanagh, ayns agh nagh ren ad rieu goaill eh roish shen.

V'ad kiart er chur kione er goaill yn arrane son y trass cheayrt tra haink Squealer daue, as daa voddey marish, as yn aeraght echey jeh peiagh ennagh as red scanshoil echey dy ghra. Ren eh fograghey magh, liorish sarey er-lheh y Chumraag Napoleon, dy row 'Beyn Hostyn' er ny scryssey magh. Maghey nish va lhietrymys er goaill yn arrane shen.

Va yindys currit er ny beyn.

"Cre'n fa?" deie Muriel.

"Cha nel foast feme er, chumraag," as Squealer dy çhionn. "She arrane yn Irree Magh va 'Beyn Hostyn'. Agh ta'n Irree Magh er ny chooilleeney nish. Va cur gy baase ny traitooryn fastyr jiu jannoo seose yn ayn jerrinagh jeh. Ta'n noid, eddyr çheumooie as çheusthie, er ve currit fo haart. Ayns 'Beyn Hostyn' ren shin soilshaghey magh y mian ain son co-voodeeys share ayns ny laghyn ry heet. Agh ta'n co-voodeeys shen nish er ve currit er bun. S'baghtal eh nagh vel oyr erbee er mayrn son yn arrane shoh."

Ga dy row ad goaill aggle, foddee dy beagh shiartanse jeh ny beyn er n'yannoo plaiynt, agh ec y tra shoh ren ny kirree goaill toshiaght er y vaaley cadjin oc, "Kiare lurgaghyn mie, daa lurgey sie", ren tannaghtyn ayn rish kuse dy vinnidyn as hug shen kione er y choloayrtys.

Myr shoh cha row 'Beyn Hostyn' ry chlashtyn reesht. 'Syn ynnyd jeh shen ren Minimus, y bardagh, screeu arrane elley, ren goaill toshiaght:

Ghowaltys ny Beyn ta'n boayl dou share.
Cha jeanyrn arragh assee da!

as v'ad goaill shoh dagh moghrey Jedoonee lurg yrjaghey y brattagh. Agh ayns aght ennagh cha row ny fockleyn ny'n carr noadyr jeeaghyn da ny beyn dy ve cho mie as 'Beyn Hostyn'.

Cabdil VIII

Laa ny ghaa ny s'anmey, tra va'n atçhim er coontey y cur gy baase er lhaggaghey, va cooinaghtyn ec shiartanse jeh ny beyn – ny v'ad smooïnaghtyn dy row cooinaghtyn oc er – dy row y Sheyoo Anney goardaghey, "Cha jean baagh erbee marroo baagh erbee elley". As ga nagh row peiagh erbee son çheet er ayns eaishtagh ny muckyn ny ny moddee, va'n ennaghtyn ayn nagh row y cur gy baase ren taghyrt freggyrtagh da shoh. Ren Clover briaght jeh Benjamin dy lhaih jee y Sheyoo Anney, as tra dooyrt Benjamin, 'syn aght cadjin, dy row eh gobbal dy chur stiagh ayns cooishyn nyn lheid shen, hie ee dy chur lesh Muriel. Ren Muriel lhaih yn Anney er-e-son. V'eh gra: "Cha jean baagh erbee marroo baagh erbee elley GYN OYR." Ayns aght ennagh ny aght elley, va'n daa ockle jerrinagh er skirrey magh ass cooinaghtyn ny beyn. Agh honnick ad nish nagh row aggair jeant da'n Anney; son s'baghtal v'eh dy row oyr mie son marroo traitooryn ren cologe jeusyn hene marish Snowball.

Car ny bleaney ren ny beyn obbraghey eer ny s'creoi nagh ren ad 'sy vlein roish shen. Aa-hroggal y wyllin gheayee, lesh boallaghyn daa cheayrt cho çhiu as v'ad roie, as cur kione er liorish y date pointit, chammah's obbyr cadjin y ghowaltys, she laboraght feer vooar dy jarroo v'ayn. Haink keayrtyn tra v'eh jeeaghyn da ny beyn dy row ad gobbraghey ooryn ny s'lhiurey as dy row bee currit daue nagh row veg ny share na va'n aght ayns lhing Jones. Moghrey Jedoonee, yinnagh Squealer, as eh cummal sheese peesh liauyr dy phabyr lesh y chrubbane echey, lhaih magh daue rollaghyn dy ysseree va prowal dy row y troar jeh dagh keint dy vee er vishaghey liorish daa cheead per cent, three cheead per cent ny queig cheead per cent, ny cre erbee myr dy beagh eh. Cha row ny beyn toiggal oyr erbee gyn credjal eh, as er-lheh er yn oyr nagh row cooinaghtyn ro chronnal oc liorish nish er cre gollrish yn stayd v'ayn roish yn Irree Magh. Ny yei shen as ooilleey, va laghyn ayn as v'ad gennaghtyn dy bare lhieu geddyn fysserree sloo as bee smoo.

Va ooilley ny saraghyn nish fogrit magh liorish Squealer ny liorish fer jeh ny muckyn elley. Cha row Napoleon hene ry akin roish y theay cho mennick as un cheayrt ayns kegeesh. Tra v'eh cheet rish, cha nee ynrican sheshaght ny moddee va marish agh kellaagh doo ren marchal roish as va gaghtey myr sorçh dy chayrneyder, as eh lhiggey magh "cock-a-doodle-doo" er ard roish my row Napoleon loayrt. Eer 'sy thie eirinagh, v'ad gra, va Napoleon cummal ayns shamyrn elley scarrit veih ny fir elley. V'eh goaill bee ny lomarcán, lesh daa voddey shirveishagh er, as v'eh rieu gee veih'n sett jinnairagh Crown Derby va roish shen er ve 'sy chubbyrt glonney 'sy çhamyr hoie. Va fogrey neesht dy beagh y gunn lhiggit dagh blein laa ruggyree Napoleon, chammah's y daa laa bleeaney elley.

Nish cha row Napoleon imraait rieu ynrican myr "Napoleon". V'eh dy kinjagh imraait rere ennym formoil myr "nyn Leeideilagh, y Cumraag Napoleon", as s'mie lesh ny muckyn va croo enmyn er-e-hon gollrish Ayr ny Beiyin Ooilley, Custheyr ny Fir Doooinoil, Fendeilagh ny Fank, Carrey ny Ein Hunnag as nyn lheid myr shen. Ayns ny oraidyn echey, yinnagh Squealer loayrt, as jeir rolley sheese e lhieckanyn, mychione creeney Napoleon, mychione mieys e chree as mychione y ghraih dowin v'echey er beiyin ooilley, dy chooilley voayl, eer as er-lheh er ny beiyin neu-vaynrey va foast baghey 'syn almorys as fo vondiaght ayns gowaltysyn elley. She red cadjin v'eh dy chur moylley da Napoleon son dy chooilley ard-nee speeideilagh as son aigh vie erbee v'ayn. Yinnagh oo clashtyn dy mennick y derrey chiark gra rish fer elley, "Fo stiurey nyn Leeideilagh, y Chumraag Napoleon, ren mee breh queig oohyn ayns shey laghyn"; ny yinnagh daa vooa, va goaill taitnys jeh iu ec y logh uyll, yllagh magh, "Bwooise da leeideilys y Chumraag Napoleon, cre cho mie erskyn insh ta blass yn ushtey!" Va barel cadjin y ghowaltys er ny hoilshaghey magh dy mie ayns daan jeh'n ennym, 'Y Cumraag Napoleon', va scrut ec Minimus, as va myr shoh:

Carrey daue ta gyn ayr!
T'eh cur dooin maynrys share!
Çhiarn cruick y chooid muickey! T'eh ny fer oayllee, yn
Ard er ta greinnaghey
Mish, as cre t'eh agh myr
Grian ghial soilsheanagh, y
Cumraag Napoleon!

She uss ta cur dooin, eisht,
Dagh nhee ain myr vondeish,
Bolg lane daa cheayrt 'sy laa, coonlagh dy rolley ayn;
Ta dagh baagh, moor as beg,
Cadley dy mie, as veg
Ass dty gheill, shickyr as creg,
Y Chumraag Napoleon!

Dy row aym muck aeg dy liooar
Roish my daase eh cho moor
As poht pynt ny rollian fuinne cooie dy rolley yn
Teayst, bee mie-ynsit eh,
Leighoil dhyt shickyr dy ve,
E chied sheean, yinnagh eh gra,
"Y Cumraag Napoleon!"

Ren Napoleon soiaghey jeh'n daan shoh as doardyr eh eh dy ve scrut er boalley y toalt vooar, ec yn chione elley j'ee veih ny Shiaght Annaghyn. Er-e-skyn va jalloo jeh Napoleon, veih'n çheu, jeant ec Squealer ayns peint bane.

Eddyr yn daa hraa, trooid jantys Whymper, va Napoleon goaill ayns laue barganaghyn cramp rish Frederick as Pilkington. Va'n carnane fuygh foast neu-chreckit. Jeh ny jees jeu, va Frederick smoo jeean dy gheddyn eh, agh cha noddagh eh çhebbal leagh resoonagh. Ec yn un traa va faaueyn jeant reesht dy row Frederick as e gheiney gaarlaghey plan dy hoiaghey er Gowaltys ny Beiyen as dy stroie y wyllin gheayee, ren yn speideilys oc ayns troggal ee cur wheesh eadolys elgyssagh er. Va fys dy row Snowball foast shnoagyraght mygeayrt ayns Gowaltys Pinchfield. Ayns mean y touree va ny beiyen fo aggle dy chlashtyn dy ren three kiarkyn çheet roish dy ghoail-rish, as cree currit ayndae liorish Snowball, dy row ad er n'ghoail ayn ayns cologe dy yannoo dunverys er Napoleon. V'ad currit gy baase çhelleeragh, as va saaseyn noa dy reayll arrey er sauçhys Napoleon currit er bun. Ren kiare moddee freayll arrey er e lhiabbee 'syn oie, fer ec dagh corneil, as va'n currym currit er muck aeg enmyssit Pinkeye dy ghoail blass jeh ooilley y vee echey roish my ren eshyn ee eh, er aggle dy beagh nieu ayn.

Mysh y traa cheddin, v'eh fogrit magh dy row Napoleon er reaghey dy chreck y carnane fuygh da Mnr. Pilkington; v'eh fosyn neesht cur toshiaght er reaghys reiltagh dy vaylartey shiartanse dy hroaryn eddyr Gowaltys ny Beiyen as Foxwood. Va ny cochianglyssyn eddyr Napoleon as Pilkington, ny yei dy row ad goll er jannoo ynrican trooid Whymper, nish bunnys caarjoil. Va mee-hreishteil ec ny beiyen er Pilkington, myr fer dooinnoil, agh bare lhiusyn eshyn na Frederick, jeh v'ad goaill aggle chammah's cur feoh da. Choud's hie yn sourey shaghey, as va'n wyllin gheayee çheet faggys dy ve jeant, haink ny faaueyn jeh soiaghey er traitooragh er çhee ve jeant dy ve ny stroshey as ny stroshey. V'eh fo Frederick, v'eh goll er gra, cur lesh noi oc feed dooinney as gunnyn oc ooilley, as v'ad gra dy row eh er hollaghey laue ny fo-vriwynyn as ny meoiryn shee, nagh jinnagh ad, dy row eh rieu goaill greim ayns ny laueyn echey jeh bargane screeuee Gowaltys ny Beiyen, cur feysht erbee mychione y chooish. Ny smoo na shen, va skeealyn atçhimagh goll er sheeley magh ass Pinchfield mychione ny dewilyssyn jeant ec Frederick da ny beiyen echey. Ren eh bwoalley gy baase shenn chabbyl, v'eh roie neeu yn ollagh, ren eh marroo moddey liorish ceau eh ayns furnish, v'eh goaill taitnys ny fastyryn beggey liorish cur er kellee cagey lesh skirragyn dy vloddy baaree kianglt rish ny spuirryn oc. Va ny beiyen çheet dy ve corree agglagh tra cheayll ad mychione nyn lheid shoh va goll er jannoo da nyn gumraagyn, as ny keayrtyn ren ad feiyral magh dy ve lhiggit magh ooilley cooidjagh as dy hoaiaghey er Gowaltys Pinchfield, dy ebyrt magh ny fir dooinnoil as dy lhiggey seyr ny beiyen. Agh ren Squealer coyrlaghey daue dy haghney jantyssyn gyn tort as dy chur treisht ayns strateish y Chumraag Napoleon.

Son shen as ooilley, va ennaghtyn noi Frederick foast ayn dy mooar. Moghrey Jedoonee dy row haink Napoleon rish 'sy toalt as ren eh soilshaghey magh daue nagh row eh rieu er smooinghtyn mychione creck y carnane fuygh da Frederick; v'eh smooinghtyn dy row eh fo'n voaralys echey, v'eh dy ghra, dy ghellal rish mooidjeenyn jeh'n sorçh shen. Va lhietrymys er ny calmaneyn, va foast goll er cur magh dy skeaylley magh fys mychione yn Irree Magh, çheet gys y thalloo boayl erbee ayns Foxwood, as va sarey currit daue neesht dy gheddyn rey rish y slogan v'oc roish shen, "Baase da Fir Doooinnoil" ayns foayr jeh "Baase da Frederick". Dy anmagh 'sy touree va fer elley jeh clinkyn croutagh Snowball jeant baghtal. Va baair y churnaght lane-sarkyllagh, as haink eh magh, tra haink eh keayrt dy row 'syn oie, dy ren Snowball mestey rassyn far-chail rish yn arroo correy. Ren kellaigh guiy as va fys

currit da mychione y chialg goaill-rish y kyndid echey kiongoyrt rish Squealer as çhelleeragh ren eh dunverys hene liorish sluggey sheese berrishyn lus y vaaish. Ren ny beyn ynsaghey nish nagh ren Snowball rieu – myr va ymmodde jeu credjal roish nish – geddyn yn oardyr, "Baagh Feniaghtagh jeh'n Chied Rang". Cha row shoh agh far-skeal va er ny skeaylley magh tammylt lurg Cah y Thie Ollee liorish Snowball hene. Foddey veih cosney aundyr, va oghsan currit da dy ren eh aghtey myr coward 'sy chah. Reeshtagh cheayll kuse jeh ny beyn shoh as v'ad currit beggan fud y cheilley, agh haink eh lesh Squealer dy Leah dy hickyraghey ad nagh row agh marranys eh 'sy chooinaghtyn oc.

'Syn ouyr, liorish eab feer voar tooilleilagh – er yn oyr dy row feme er cur stiagh ny troaryn ec bunnys yn un traa – va kione currit er y wyllin gheayee. Va'n jeshaghtys foast dy ve currit stiagh ayn, as va Whymper barganey dy chionnaghey eh, agh va'n strughtoor jeant dy slane. Noi dagh doilleid, ny yei an-oayllys, greienyn bunneydagh, drogh aigh as traitoorys Snowball, va kione currit er yn obbyr dy traaoil gys y laa hene! Skee er troggloo agh moyrnagh, hooill ny beyn mygeayrt as mygeayrt yn ard-obbyr oc, va jeeaghyn dy ve eer ny s'aaley ayns nyn sooilyn na'n traa v'ee troggit yn chied cheayrt. As harrish shen, va ny boallaghyn daa cheayrt cho çhiu as v'ad roie. Cha noddagh veg agh poodyr gunn ad y lhieggal y cheayrt shoh! As tra smooinee ad er yn aght ren ad tooilleil, cre ny lhiettalysyn groamey orroosyn ghow ad mainshtyraght as er y chaghlaa feer voar harragh er y vea oc tra veagh ny shiaullyn cassey mygeayrt as va ny dynamo-yn roie – tra smooinee ad er ooilley ny reddyn shoh, ren y skeeys oc faagail ad as ren ad corlheimeraght mygeayrt as mygeayrt y wyllin gheayee, as ren ad lhiggey magh eamyn dy varriaght. Ren Napoleon hene dy personagh cur moylley as soylley da ny beyn er ny va jeant oc, as ren eh fograghey magh dy beagh y wyllin gheayee enmyssit Mwyllin Gheayee Napoleon.

Daa laa ny s'anmey va ny beyn er nyn hymney dy heet cooidjagh son çhaglym er-lheh 'sy toalt. V'ad jeant balloo lesh yndys tra ren Napoleon fograghey magh dy row y carnane fuygh creckit echey da Frederick. Laa ny vairagh yinnagh wagonyn Frederick çheet as goaill toshiaght jeh ymmyrkey ersooyl eh. Trooid y clane traa as v'eh jeeaghyn dy ve caarjyssagh rish Pilkington, dy feer va Napoleon ayns coardailys follit rish Frederick.

Va dy chooilley chochianglys rish Foxwood er ny vrishey; va çhaghteraghtyn faghidagh er nyn goyrt gys Pilkington. Va sarey currit da ny calmaneyn dy haghney Gowaltys Pinchfield as dy chaghlaa y slogan oc veih "Baase da Frederick" gys "Baase da Pilkington". Ec y traa cheddin ren Napoleon shickyraghey ny beyn dy row ny skeealyn jeh soiaghey er Gowaltys ny Beyn va er çhee taghyrt slane neu-firrinagh, as dy row ny skeealyn mychione dewilys Frederick rish e veyn hene er ve mooadit dy mooar. Dy by chosoylagh eh dy daink ooilley ny faaueyn shoh veih Snowball as ny jantee echey. V'eh jeeaghyn nish nagh row Snowball, lurg ooilley va grait, follaghey ayns Gowaltys Pinchfield, as dy jarroo cha row eh rieu ayns shen 'sy vea echey: v'eh cummal – ayns mooarane sollyssid, v'eh dy ghra – ayns Foxwood, as ayns rieuaghid v'eh goaill aaght rish Pilkington rish ymmodde bleeantyn v'er n'gholl shaghey.

Va ny muckyn goaill ard-eunys ass croutys Napoleon. Liorish jeeaghyn dy ve caarjyssagh rish Pilkington, hug eh er Frederick yrjaghey y çheb echey liorish daa phunt jeig. Agh va mieys syrjey inçhyn Napoleon, as Squealer, goll er soilshaghey magh 'syn aght nagh row eh treishteil ayns peiagh erbee, cha nee eer ayns Frederick. Va Frederick gearree eeck son y fuygh lesh red ennagh enmyssit sheck, as va shen, v'eh jeeaghyn, meer dy phabyr as gialdyn dy eeck scrutit er. Agh va Napoleon ro aghtal er-e-hon. Ren eh shirrey eekys lesh noteyn rieuagh queig punt, dy ve currit dasyn roish my row y fuygh scughit. Hannah va Frederick er

n'eeck y feeagh; as va'n sym eeckit echey kiart dy liooar dy chionnaghey y jeshaghtys son y wyllin gheayee.

Eddyr y daa hraa va'n fuygh goll er arraghey dy braew bieau. Tra v'eh ooilley ersooyl, va çhaglym er-lheh elley er ny chummal 'sy toalt dy voddagh ny beyn scrutaghey noteyn banc Frederick. As eh mongey myr noo, as ceau yn daa aundyr echey, va Napoleon ny lhie ayns lhiabbee dy choonlagh er yn ardan, as yn argid liorishyn, currit dy jesh ayns dash er moggaid dy obbyr chray ass thie vooar y thie eirinys. Ren ny beyn shooyl shaghey dy moal ayns strane, as ren cagh jeeaghyn er derrey va'n saie echey. As hug Boxer e stroin dy stronaghey ny noteyn banc, as ren ny nheeghyn feoisagh baney gleashaghey as moostrey roish yn ennal echey.

Three laghyn ny s'anmey va musthaa agglagh ayn. Haink Whympers, yn eddin echey cho neel as baase, ratçhal seose y chassan er y daawheeyl echey, cheau eh sheese eh 'sy chlose as roie eh dy jeeragh stiagh 'sy thie eirinagh. Y nah hallid ren garveig plooghit dy eulys feiyral magh ass shamyrn Napoleon. Ren y naight jeh ny ren taghyrt skeaylley magh dy bieau mygeayrt y ghowaltys gollrish aile ass smaght. Foalsey va ny noteyn banc! Va Frederick er n'gheddyn y fuygh er veg!

Ren Napoleon symney ry cheilley ny beyn çhelleeragh as ayns coraa atçhimagh ren eh fograghey magh deyrey baaish er Frederick. Tra veagh eh goit oc, as eshyn, va Frederick dy ve currit bio dy ghol er broie. Ec y traa cheddin hug eh raue dy row ad, lurg y jannoo traitooragh shoh, dy yerkal rish yn aghtey smessey. Foddee dy jinnagh Frederick as ny deiney echey, myr va jerkit rish foddey, soiaghey orroo traa erbee. Va arreyderyn currit ec ooilley ny entreilyssyn da'n ghowaltys. Chammah's shen, va kiare calmaneyn currit gys Foxwood lesh çhaghteraght sheoilagh, ayns jerkallys dy jinnagh shen cur er bun reesht cochianglyssyn miey rish Pilkington.

Yn eer moghrey er-giyn haink yn soiaghey er. Va ny beyn goaill anjeeal tra haink ny arreyderyn as adsyn roie stiagh ayn lesh y naight dy row Frederick as ny eiyrtyssee echey er jeet stiagh hannah trooid y ghat queig-barryn. Daaney dy liooar ren ny beyn goll magh nyn guail, agh y cheayrt shoh cha row y varriaght aashagh oc myr v'oc ayns Cah y Thie Ollee. Va queig deiney jeig ayn, lesh lieh-dussan dy ghunnyn eddyr oc, as ren ad goaill toshiaght er lhiggey cho Leah's chosn ad çheusthie jeh jeh stundayrtyn as daeed. Cha noddagh ny beyn shassoo roish ny poltyn agglagh as ny grineyn guinnagh, as dyn y wooise da eabyn liorish Napoleon as Boxer dy aa-ghreinnaghey ad, dy Leah v'ad immanit er-nyn-gooyl. Va kuse jeu as va lhottyn oc hannah. Ghow ad kemmyrk ayns troggalyn y ghowaltys as ren ad keekal dy twoaieagh ass scoltyn as tuill cayr. S'lesh y noid va ooilley yn aber vooar, goaill stiagh y wyllin gheayee. Ec y traa shen va eer Napoleon jeeaghyn dy ve gyn eie. Ren eh troagyr seose neose gyn fockle, y famman echey reen as scuitçhal. Va shillaghyn dy yeearee ceaut 'syn ard va Foxwood. Dy jinnagh Pilkington as ny deiney echey cooney lhieu, foddee dy jinnagh eh foast çheet lhieu y laa shen. Agh ec y traa shoh ren ny kiare calmaneyn, va currit magh y laa roish shen, çheet back, as va fer jeu gymmyrkey meer dy phabyr woish Pilkington. Er shoh va scrut lesh penn leoie ny fockleyn: "Diu myr ta shiu toilliu."

Ec y traa shoh haink Frederick as e gheiney gys sthap mygeayrt y wyllin gheayee. Yeeagh ny beyn orroo as va tallagh dy chontaartys ny mast'oc. Ghow magh daa jeh ny deiney craiu as oard trome. V'eh foue lhieggal y wyllin gheayee.

"Neu-possible!" dyllee Napoleon. "Va ny boallaghyn eck troggit ain ro çhiu son shen. Cha noddagh ad lhieggal ee ayns shiaghtin. Creeaght, chumraagyn!"

Agh va Benjamin freayll shilley geyre er gleashaghtyn ny deiney. Va'n piyr as yn oard as y craiu oc farrar towl faggys da bun y wyllin gheayee. Dy moal, as bunnys lesh cummey yn aittys er, ren Benjamin snoggal y cab liauyr echey.

"Va mee smooïnaghtyn dy row," as eshyn. "Nagh vel shiu fakin ny t'ad dy yannoo? Minnid elley as nee ad pronney poodyr gunn stiagh 'sy towl shen."

Agglit, ren ny beyn fieau. V'eh neu-possible nish dy chosney magh ass fastee ny troggalyn. Lurg minnid ny ghaa va ny deiney ry akin as adsyn roie dy chooilley ard. Eisht va buirrooghey bouyragh ayn. Ren ny calmaneyn irree dy chassey 'syn aer, as ren ooilley ny beyn, er-lhimmey jeh Napoleon, ceau ad hene sheese er ny builg oc as coodaghey nyn eddinyn. Tra dirree ad reesht, va bodjal feer vooar dy yaagh doo croghey harrish y voayl va'n wyllin gheayee er ve ayn. Dy moal ren y fynneraght sheidey ersooyl eh. Va'n wyllin gheayee er scuirr veih ve ayn!

As y reayrt shoh oc, haink creeaght ny beyn stiagh ayndaue reesht. Va'n aggle as lhag-chreeys dennee ad shallid roish shen baiht fo'n eulys oc noi'n drogh yannoo faghidagh shoh. Dirree eam feer vooar son cooilleeney, as gyn fuirraghtyn er saraghyn elley ren ad roie rhyboo ooilley cooidjagh as hie ad dy jeeragh noi'n noid. Y cheayrt shoh cha dug ad geill da ny grineyn dewil ren skeabey harrystoo gollrish sniaghtey garroo. She cah keoie gyere v'ayn. Ren my deiney lhiggey orroo reesht as reesht, as, tra haink ny beyn faggys daue, ren ad scuitçhal mygeayrt lesh ny maidjaghyn as lesh ny bootsyn tromey oc. Va booa, three kirree as daa ghuiy marrooit, as va bunnys dy chooilley pheigh lhottit. Eer Napoleon, va stiurey cooishyn veih'n çheu-chooylloo, va baare yn amman echey scolbit ec grine. Agh cha daink ny deiney veih gyn skielley noadyr. Va troor jeu as va nyn ging brisht liorish buillaghyn veih yngnyn Boxer; va fer elley er ny heiy 'sy volg liorish eairk vooa; va fer elley as va ny troosyn bunnys raipit veih liorish Jessie as Bluebell. As tra ren ny nuy moddee jeh gard kirpey Napoleon, hug eshyn sarey daue dy ghoil combaase keillit ec y chleigh, çheet rish dy doaltattym ec çheu ny deiney, as v'ad gullarnee dy fergagh, haink sevrain orroo. Honnick ad dy row ad ayns gaue veih çheet dy ve er nyn gruinnaghey mygeayrt-y-moo. Deie Frederick er ny deiney echey dy chosney magh ass choud's va foast caa daue shen y yannoo, as y nah hallid va'n noid cowartagh roie er çhea son nyn mioys meen. Ren ny beyn cloh ad kiart sheese gys bun y vagher, as hug ad daue breb jerrinagh ny ghaa choud's ren ad seiyrhyboo trooid y chleigh ghrineagh.

Va laue y varriaght oc, agh v'ad skee as v'ad lhiggey folley. Dy moal ghow ad toshiaght er shooyl dy baccagh gys y ghowaltys. Ren yn shilley jeh ny cumraagyn marroo oc skeayllt magh er yn aiyr cur er kuse jeu dy lhiggey jeir. As rish tammylt beg haink ad gys sthap ayns tostit treih 'syn ynnyd va'n wyllin gheayee ny shassoo keayrt dy row. She, v'ee ersooyl; va bunnys monney s'jerree y tooilleil oc ersooyl! Va eer yn undin er ny stroie ayns paart. As ayns aa-hroggal ee, cha noddagh ad, y cheayrt shoh, myr ren ad roie, ymyd y yannoo jeh ny claghyn va er nyn duittym. Y cheayrt shoh va ny claghyn ooilley ass shilley neesht. Ren niart y pholt ad y cheau rish cheeadyn dy stundayrtyn ayns foddid. V'eh myr nagh row y wyllin gheayee rieu ayn.

Choud's v'ad çheet faare y ghowaltys, haink Squealer, va assaaragh gyn yss cre'n fa choud's va'n caggey ayn, corlheimeraght nyn guail, as eh scuitçhal y famman echey as mongey as

jeant magh leshyn hene. As cheayll ny beyn, veih ard troggalyn y ghowaltys, buirrooghey trome-chooishagh gunn.

"Cre'n fa ta'n gunn shen goll er lhiggey?" vrie Boxer.

"Dy yannoo ard-eailley jeh'n varriaght ain!" dyllee Squealer.

"Cre'n varriaght shen?" as Boxer. Va ny glioonyn echey lhiggey folley, va crou cabbil caillt echey as va'n ingin scoltit echey, as va dussan dy ghrineyn nyn lhie seiyt stiagh 'sy lurgey jerrinagh echey.

"Cre'n varriaght, chumraag? Nagh vel shin er imman y noid veih'n thaloo ain – thaloo casherick Gowaltys ny Beyn?"

"Agh ren ad stroie y wyllin gheayee. As va shin gobbraghey dy hroggal ee rish daa vlein!"

"Cre er shen? Nee mayd troggal mwyllin gheayee elley. Nee mayd troggal shey mwylljyn geayee my vees shen nyn yeearree. Cha nel oo toiggal, chumraag, y red niartal va jeant ain. Va'n noid cummal yn eer thaloo shoh ersyn ta shin nyn shassoo. As nish – bwooise da leeideilys y Chumraag Napoleon – ta shin er chosney reesht dagh oarlagh jeh!"

"Eisht ta shin er chosney ny v'ain roie," as Boxer.

"Shen y varriaght ain," as Squealer.

Hooill ad dy baccagh stiagh 'sy chlose. Va ny grineyn fo crackan lurgey Boxer guinney dy piandagh. Honnick eh roishyn ooilley y laboraght trome, as eh aa-hroggal y wyllin gheayee veih'n undin, as hannah 'sy heiltynys echey ren eh niartaghey eh hene son yn obbyr. Agh son y chied cheayrt haink eh da dy row eh un vlein jeig dy eash as foddee nagh row ny muskyllyn mooarey echey kiart myr v'ad keayrt dy row.

Agh tra ren ny beyn fakin y brattagh geayney bennalt as cheayll ad y gunn goll er lhiggey reesht – shiaght keayrtyn v'eh er ny lhiggey ooilley cooidjagh – as cheayll ad yn oraid jeant ec Napoleon, cur moylley as soyllay dauesyn er yn ymmyrkey oc, v'eh jeeaghyn daue ny yei shen as ooilley dy row ad er chosney barriaght vooar. Va shirveish trome-chooishagh ny merriu jeant son ny beyn va marrooit 'sy chah. Hayrn Boxer as Clover y wagon va goll er ymmydey myr couçh ny merriu, as ren Napoleon hene shooyl ec kione yn arbyl. Va slane daa laa currit son jannoo ard-eailley. Va arraneyn, oraidyn as lhiggey elley y ghunn, as va gioot er-lheh jeh oooyl currit da dagh baagh, lesh daa awnse arroy ec dagh ushagh as three brishtagyn ec dagh moddey. V'eh fogrit magh dy beagh y cah enmyssit Cah y Wyllin Gheayee, as dy row Napoleon er chroo aundyr noa, Oardyr y Vrattagh Geayney, hug eh dasyn hene. Ayns ny gienseyn cadjin va cooish donney ny noteyn banc er ny jarrood.

She laa ny ghaa ny s'anmey na shoh dy daink ny muckyn er kishtey dy ushtey bea ayns sellaryn y thie eirinagh. Cha vaik peiagh erbee eh ec y traas va'n thie hoshiaght goll er cummal ayn. Yn oie shen haink veih'n thie eirinagh yn sheean dy arrane goll er goaill dy ard, as aynsyn, va cur yindys er dy chooilley pheigh, va clinkyn 'Bein Hostyn' er nyn mestey. Mysh lieh oor lurg nuy va Napoleon, as eh ceau shenn edd bowler Mnr. Jones, ry akin dy baghtal cheet magh ass dorrys ny cuillagh, lhiggey dy bieau mygeayrt y chlose as ersooyl leshyn stiagh cheusthie reesht. Agh 'sy voghrey va tostit dowin croghey erskyn yn thie

eirinagh. V'eh jeeaghyn nagh row muck erbee er chosh. V'eh bunnys nuy er y chlag tra va Squealer ry akin, as eh shooyl dy moal as dy lhag-chreeagh, dullyr ny sooillyn echey, y famman echey croghey sheese dy faase ny chooyl, as ayns dagh cummey v'eh jeeaghyn dy ve çhing dy trome. Ren eh symney ry cheilley ny beyn as dinsh eh daue dy row naight agglagh echey dy hoilshaghey magh. Va'n Cumraag Napoleon ayns raad y vaaish!

Hrog seose bardoon. Va coonlagh currit sheese çheumooie jeh dorryssyn y thie eirinagh as hie ny beyn er baare ny cassyn oc. Lesh jeir ayns nyn sooillyn vrie yn derrey vaagh jeh baagh elley cre yinnagh ad dy row nyn Leeideilagh currit ersooyl voue. Hie faaue mygeayrt dy ren Snowball, fy yerrey hoal, er reaghey dy chur nieu stiagh ayns bee Napoleon. Ec nane-jeig er y chlag haink Squealer magh dy yannoo fogrey elley. Myr yn jannoo jerrinagh echey 'sy theihll, ren yn Cumraag Napoleon fograghey magh sarey trome: dy darragh deyrey baaisht veih giu jough meshtallagh.

Agh liorish yn astyr beg va Napoleon jeeaghyn dy ve beggan ny share, as y moghrey er-giyn oddagh Squealer insh daue dy row eh fo raad dy mie dy chouyr. Liorish fastyr y laa shen va Napoleon gobbraghey reesht, as y laa er-giyn va fys ry gheddyn dy row sarey currit echey da Whymper dy chionnaghey ayns Willingdom kuse dy liorany mychione imbyl as sheeley. Shiaghtin ny s'anmey hug Napoleon saraghyn dy beagh y paddag veg çheu-hoal jeh'n ooylagh, as v'eh foue roish shen cur ee ry lhiattee myr aber son beyn va shaghey y vea obbyr oc, dy ve currit fo'n cheeaght. V'eh currit mygeayrt dy row yn aber ceaut as va feme er cur rassyn aynjee reesht; agh dy Leah haink fys daue dy row eh fo Napoleon cuir lesh oarn ee.

Mysh y traa shoh haink taghyrt quaagh as s'goan va peiagh erbee dy hoiggal. Oie dy row mysh daa-yeig er y chlag va tharmane ard 'sy chlose, as ren ny beyn siyragey magh ass ny sthollin oc. She oie as va rehollis ayn. Ec bun y voalley ec kione y toalt vooar, raad va ny Shiaght Annaghyn scruit, va aarey ny lhie brisht ayns daa veer. Va Squealer, jeant neal dy shallidagh, ny lhie skeaylt magh lioree, as faggys da va londeyr ny lhie, as skeaban pheint as pohtt er ny hilgey harrish dy pheint vane. Ren ny moddee çhelleeragh cochruinnaghey mygeayrt Squealer as ren ad goll marish back gys y thie eirinagh cho Leah's va ablid echey shooyl. Cha noddagh fer erbee jeh ny beyn cur bun ny baare er shoh, er-lhimmey jeh shenn Venjamin, ren snoggal e chab liauyr echey lesh aghtys tushtagh, as v'eh jeeaghyn dy row eh toiggal, agh row eh arryltagh dy ghra veg.

Agh laa ny ghaa ny s'anmey ghow Muriel tastey, choud's v'ee lhaih jee hene ny Shiaght Annaghyn, dy row fer elley jeu as va marranys 'syn agh va cooinaghtyn er ec ny beyn. V'ad smooinghtyn dy row y Wheigoo Anney, "Cha jean baagh erbee iu jough meshtallagh," agh va daa ockle jarroodit oc. Ayns firrinys va'n Anney ry lhaih: "Cha jean baagh erbee iu jough meshtallagh ASS TOWSE."

Cabdil IX

Hie traa liauyr shaghey choud's va ingin scoltit Boxer couyr. Ren ad toshiaght y ghoail er aa-hroggal y wyllin gheayee y laa lurg da ard-eaillaghyn y varriaght v'er jeet gy kione. Ren Boxer gobbal scuirr veih obbyr eer rish laa as myr cooish onnorail dasyn hene cha ren eh lhiggey da peiagh erbee fakin dy row eh ayns pian. Ny fastyrin beggey yinnagh eh goaill rish dy preevaadjagh rish Clover dy row yn ingin boirey ersyn dy mooar. Ren Clover cur lthees da'n ingin lesh glabbagyn dy lussyn ren ee aarlaghey liorish ad y chaigney, as ren ish chammah's Benjamin guee er Boxer dy obbraghey sloo creoi. "Cha nel scowanyn cabbil tannaghtyn ayn dy braght," as ish rishyn. Agh cha jinnagh Boxer eaishtagh roo. Cha row

echey, v'eh dy ghra, agh un dean er mayrn – dy akin y wyllin gheayee fo raad dy mie roish my daink eh da'n eash dy ve ny haau.

Ec yn toshiaght, tra va leighyn Gowaltys ny Beiynd currit ayns fockleyn y chield cheayrt, va'n eash cour scuirr reaghit ec daa bleeaney jeig son cabbil as muckyn, ec kiare bleeaney jeig son booaghyn, ec nuy bleeaney son moddee, ec shiaght bleeaney son kirree as ec queig bleeaney son kiarkyn as guoiee. Va coardail er ny chur rish pensionyn feoiltagh son shanstyryn. Choud's nish cha ren baagh erbee ayns rieughid er jeet dy ve ny haau as pension echey, agh er y gherrid va'n chooish goll er loayrt mychione ny smoo as ny smoo. Nish va'n magher beg çheu-hoal jeh'n ooylagh currit dy ve aarloo son oarn, va faue ayn dy beagh cleigh troggit mygeayrt uillin yn aber vooar as jeant ny ard gyndyr son beiynd va roie ayns eash. Son cabbyl, v'eh goll er gra, veagh pension queig punt dy arroo dagh laa as, 'sy gheurey, queig pint jeig dy hraagh, lesh carrage ny foddee ooyl laghyn seyrey theayagh. Harragh nah laa ruggyree jeig Boxer dy anmagh 'sy tourey 'sy vlein lurg shen.

Son y traa v'ayn s'creoi va'n vea. Va'n geurey cho feayr as va'n fer s'jerree, as eer ny s'coan va bee. Keayrt elley va rheynnyn bee ooilley jeant ny sloo, er-lhimmey jeusyn son ny muckyn as ny moddee. Yinnagh cormid ro reen ayns rheynnyn bee, ren Squealer soilshaghey magh, goll noi bun-eieyn y Vaagherys. Son shen as ooilley, cha row doilleeid erbee echey ayns prowal da ny beiynd elley NAGH ROW ayns rieughid genney dy vee ocsyn, cre erbee va reddyn jeeaghyn dy ve. Son y traa v'ayn, son shickyrys, va feme er jeet dy ve ayn dy aa-chiartaghey ny rheynnyn bee (va Squealer rieu çheet er shoh myr "aa-chiartaghey", gyn rieu çheet er "jannoo ny sloo"), agh cosoyley rish ny laghyn as va Jones ayn, va'n stayd er hareaghey dy braew mooar. As eh lhaih magh ny fysseree ayns coraa gheyre happee, ren eh prowal daue lesh myn-phoyntyn dy row ny smoo corkey oc, ny smoo traagh, ny smoo napinyn na va ocsyn ayns laa Jones, dy row ad gobbraghey traa sgirrey, dy row yn ushtey uyll oc jeh foays share, dy row ad bio ny sodjey, dy row corrillagh smoo jeh ny fir aegey oc tannaghtyn bio harrish y lambaanid oc, as dy row towse smoo dy choonlagh ayns ny sthollyn oc as dy row ad surranse ny sloo liorish jarganyn. Va ny beiynd credjal dagh fockle jeh. Dy insh yn irriney, va Jones as ooilley v'eh cochianglt rish bunnys er ltheie ersooyl veih'n chooinaghtyn oc. Va fys oc dy nee creoi as lhome va bea 'sy lhing shoh, dy row accyrys orroo dy mennick as dy row ad dy mennick feayr, as dy row ad dy cadjin gobbraghey tra nagh row ad nyn gadley. Agh gyn dooyt v'eh ny smessey ayns ny shenn laghyn. V'ad maynrey dy chredjal shen. As chammah's shen, ayns ny laghyn shen v'ad nyn sleabyn as nish v'ad seyr, as va shen jannoo caghlau erskyn ooilley, myr nagh ren Squealer failleil dy hoilshaghey magh daue.

Va ymmodee beill elley dy chur bee ayn nish. 'Syn ouyr rug ny kiare muckyn arkagh nyn aailyn mysh yn un traa, as va un ark jeig as feed er nyn mreth eddyr oc. Breck va ny irk, as er yn oyr dy row Napoleon yn un chollagh muck 'sy ghowaltys, foddee sleih cur çheb er quoi va'n ayr oc. V'eh fogrit magh ny s'anmey, tra va breekyn as fuygh kionnit oc, dy beagh shamyr scoill troggit ayns garey y thie eirinagh. Eddyry yn daa hraa, va ny irk goll er ynsaghey liorish Napoleon hene ayns thie vooar y thie eirinagh. Va lheitys goll er jannoo oc 'sy gharey, as v'ad currit veih cloie rish ny beiynd aegey elley. Mysh y traa shoh neesht, v'eh jeant myr reill, tra yinnagh muck as baagh erbee elley çheet quail er y chassan, dy row eh er y vaagh elley shassoo ry lhiattee: as chammah's shen dy row cair currit da ooilley ny muckyn, cre erbee va'n stayd oc, dy cheau rybbanyn geayney er ny fammanyn oc Jedoonee.

Va blein speideilagh dy liooar er ve ec y ghowaltys, agh va foast genney dy argid echey. Va ny breekyn, geinnagh as eayl ry chionnaghey son y çhamyr scoill, as veagh feme er goaill toshiaght er jannoo tashthey reesht son jeshaghtys cour y wyllin gheayee. Eisht va ooil

lampey as cainleyn son y thie, shugyr son boayrd Napoleon hene (hug eh sarey noi shen son ny muckyn elley, er yn oyr dy row eh cur orroo gaase rouyr), as ooilley ny stooghyn va goll er ceau gollrish greienyn, treinaghyn, streng, geayl, streng meainagh, shenn yiarn as brishtagyn son ny moddee. Va kionnan dy hraagh as paart jeh'n troar praase er ny chreck, as va'n conaant son oohyn er ny vishaghey gys shey cheead 'sy çhiaghtin, myr shoh y vlein shen, s'goan ren ny kiarkyn guirr ein dy liooar dy chummal seose yn earroo oc ec yn un towse. Va ny rheynnyn bee, va jeant ny sloo Mee ny Nollick, jeant ny sloo reesht Toshiaght Arree, as va lhiettalys er londeyrn ayns sthollyn dy spaarail ooill. Agh va ny muckyn jeeaghyn dy ve souyr dy liooar, as dy jarroo v'ad cosney trimmid, shaghey red erbee elley. Fastyr dy row dy anmagh Toshiaght Arree va soar çheh mea blasstal, jeh sorçh nagh ren ny beiynd soaral roish shen, sheidey roish harrish y chlose veih'n thie imbyl beg va ny lhie ass ymyd ayns tra Jones. Dooyrt peiagh ennagh dy row shen yn soar jeh oarn va goll er coagyrey. Ren ny beiynd stronnaghey yn aer dy accryssagh as v'ad gindys row lahney çheh goll er aarlaghey son nyn shibber. Agh cha ren lahney çheh erbee çheet rish, as y nah Ghoonaght v'eh er ny vograghey magh dy beagh ooilley yn oarn freillt son ny muckyn. Va'n magher çheu-hoal jeh'n ooylagh er ve cuirt lesh oarn. As ren y naight sheeley magh dy Leah dy row dagh muck nish geddyn ronney dy phynt lhune dagh laa, lesh lieh-ghalloon son Napoleon hene, va rieu goll er cur da 'sy taagh awree Crown Derby.

Agh eer dy row arkyssyn dy hurrall, v'ad er nyn leodaghey ayns paart liorish y nhee v'ayn dy row foays ny smoo ec y vea oc 'sy tra v'ayn na v'eck roie. Va tooilley arraneyn ayn, tooilley oraidyn, tooilley immeeaghtyn. Hug Napoleon sarey dy beagh, un cheayrt 'sy çhiaghtin, red ennagh enmyssit Taishbynys Gyn Aarlaghey er ny chummal, as yn dean jeh dy yannoo ard-eailley jeh doocaryn as ard-varriaghtyn Gowaltys ny Beiynd. Ec y tra pointit va ny beiynd faagail yn obbyr oc as marçhal mygeayrt rheynnyn y ghowaltys ayns possanyn myr sidooryn, lesh ny muckyn leideil, eisht ny cabbil, eisht ny booaghyn, eisht ny kirree as eisht ny eeanlee. Va ny moddee er dagh çheu yn immeeaght as ec y chione jeh ooilley ren kellaagh doo Napoleon marçhal. Ren Boxer as Clover rieu ymyrkey eddyr oc brattagh geayney as cowraghyn er jeh'n ingin as yn eairk as ny fockleyn, "Bea veayn da'n Chumraag Napoleon!" Lurg shen va daanyn goll er insh va scrut ayns onnor Napoleon, as oraid liorish Squealer, cur fysseree mychione y vishaghey s'noa ayns troaryn bee, as ny keayrtyn va orraghey er ny lhiggey veih'n gunn. She ny kirree va smoo currit da'n Taishbynys Gyn Aarlaghey, as dy row peiagh erbee gaccan (as ren kuse dy veiynd shen ny keayrtyn, tra nagh row muck ny moddee erbee faggys daue) dy row ad jummal tra as dy row ad cur orroo dy mennick ve nyn shassoo ayns shoh as ayns shen 'syn eayrid, son shickyrys yinnagh ny kirree cur tostid er lesh maaley feer vooar jeh "Kiare lurgaghyn mie, daa lurgey sie!" Agh son shen as ooilley ghow ny beiynd soylley jeh ny ard-eaillaghyn shoh. Hooar ad magh dy row eh dyn gerjaghey, cooinaghtane ve currit daue dy row ad, lurg shen as ooilley, nyn mainshtyryn hene as dy row yn obbyr jeant oc son y vondeish oc hene. Myr shoh, lesh ny arraneyn, ny immeeaghtyn, rollaghyn dy ysseree ec Squealer, buirrooghey y ghunn, gerrym y chellee as bennalt y vrattagh, oddagh ad jarroo dy row ny builg oc follym, rish paart dy hraa, ec y chooid sloo.

Mee Averil, va Gowaltys ny Beiynd er ny oraghey magh dy ve ny Phobblaght, as haink eh dy ve femoil dy reih Eaghtyrane. Cha row agh un hirreyder ayn, Napoleon, va reiht lesh un aigney. Y laa cheddin v'eh er ny lhiggey magh dy row docmadyn noa er ve feddynit va soilshaghey magh tooilley myn-phoyntyn mychione co-pharteeas Snowball rish Jones. V'eh jeeaghyn nish nagh row Snowball, myr va ny beiynd sheiltyn roish nish, ynrican er chur eab er coayl Cah y Thie Ollee liorish clink, agh v'eh caggey dy foshlit er çheu Jones. Dy jarroo, she eshyn va dy feer ny leideilagh jeh sheshaght chaggey ny fir dooinnoil, as ren eh roie stiagh 'sy chah lesh ny fockleyn, "Bea veayn da Deiney!" er ny beill echey. Va ny lhottyn er dreeym

Snowball, as va kuse dy veiyen foast cur cooinaghtyn er fakyn ad, er ve jeant ec feeackleyn Napoleon.

Ayns mean souree haink Moses y feeagh rish reesht doaltattymagh 'sy ghowaltys, lurg da ve assaaragh rish kuse dy vleeantyn. V'eh gyn caghlaa erbee, foast cha row eh gobbraghey as v'eh loayrt 'syn un aght as v'eh rieu mychione Slieau Villish y Hugyr. Harragh eh dy hassoo er kiap, yinnagh eh bennalt ny skianyn doo echey as yinnagh eh loayrt son oor er oor rish peiagh erbee yinnagh eaishtagh rish. "Heose ayns shen, chumraagyn," yiarragh eh dy trome-chooishagh, as sheeyney e ghob mooar er y speyr – "heose ayns shen, kiart çheu-hoal jeh'n vodjal dorraghey shen foddee shiu fakyn – ayns shen t'ee ny lhie, Slieau Villish y Hugyr, y çheer vaynrey shen raad nee shinyn ny beiyen boghtey goaill aash dy bragh veih nyn dooilleil!" Dy jarroo, dooyrt eh dy row eh er ve ayns shen choud's v'eh goll fer jeh ny etlaghyn syrjey echey, as dy ren eh fakyn ny magheryn beayn dy hamrag as y verreen rass lieen as ny crammanyn shugyr gaase er ny cleighyn. Va ymmodee beiyen dy chredjal. Va'n vea oc nish, v'ad dy resooney magh, accryssagh as tooilleilagh; nagh by chiart as by chorrym eh dy beagh seihll share ayn boayl ennagh elley? Red ennagh va doillee dy hoiggal, shen va barel ny muckyn er Moses. Dooyrt ad ooillee dy connaasagh dy nee breagyn va ny skeealyn echey mychione Slieau Villish y Hugyr, agh foast v'ad cur kied da tannaghtyn 'sy ghowaltys, gyn obbraghey, lesh lowanse kerroo-phynt dy lhune dagh laa.

Lurg da'n ingin echey slaanaghey, ren Boxer gobbraghey ny s'creoi na v'eh rieu. Dy jarroo, ren ooillee ny beiyen gobbraghey gollrish sleabyn y vlein shen. Er-lhimmey jeh obbyr cadjin y ghowaltys as aa-hroiggal y wyllin gheayee, va'n thie scoill oc son ny irk, as toshiaght currit er Mee Vayrt. Ny keayrtyn s'doillee va surral ny ooryn liauyrey gyn bee dy liooar, agh cha ren Boxer rieu loagan. Cha row veg ayns ny v'eh dy ghra ny dy yannoo dy yannoo seose monney nagh row y niart echey myr v'eh. Cha row eh agh yn cummey echey va caghlaait beggan; va'n çheh echey ny sloo gloasagh na v'eh as v'eh jeeaghyn dy row ny shleaystyn feer vooar echey er nyn gribbey. Dooyrt ny fir elley, "Nee Boxer çheet my laue tra hig faiyr yn arree dy ve ayn"; agh haink yn arragh as cha daase Boxer veg ny s'riurey. Ny keayrtyn er yn ughtagh fo raad gys baare y wharral, tra ren eh niartaghey ny muskylyn echey noi trimmid clagh foawragh ennagh, v'eh jeeaghyn nagh row veg freayll eh er ny cassyn echey er-lhimmey jeh'n aigney dy hannaghtyn lesh. Ec lheid ny keayrtyn va ny beill echey er nyn vakyn dy chummey ny fockleyn, "Nee'm obbraghey ny s'jeadee"; cha row coraa er-mayrn echey. Keayrt elley hug Clover as Benjamin raue da dy ghoaill kiarail jeh'n slaynt echey, agh cha dug Boxer geill da. Va'n nah laa ruggyree jeig echey çheet faare. By gummey dasyn ny haghryagh, dy row sthock mie dy chlagh er ny haghlym echey roish my ren eh irree ass er pension.

Dy annagh fastyr beg dy row 'sy tourey, hie faue doaltattym mygeayrt y ghowaltys dy row red ennagh jannoo er Boxer. V'eh er n'gholl magh ny lomarcyn dy hayrn lught dy chlagh sheese gys y wyllin gheayee. As kiart dy liooar, s'firrinagh va'n faue. Minnid ny ghaa ny s'anmey haink daa chalmane stiagh as driss orroo lesh y naight; "Ta Boxer er duittym! T'eh ny lhie er e lhiattee as cha nod eh irree!"

Ren mysh yn lieh ayren dy veiyen 'sy ghowaltys siyraghey magh gys y nappan raad va'n wyllin gheayee ny shassoo. Ayns shen va Boxer ny lhie, eddyr lurgaghyn y chart, e wannal sheeynt magh, gyn ablid eer dy hroiggal seose e chione. Va ny sooilyn echey kayeeagh, va ny lhiattee echey pohllit lesh ollish. Va stroo keyll folley er heeley magh ass e veaal. Hie Clover sheese er ny glioonyn eck liorishyn.

"Voxer!" deam ee, "kanys t'ou?"

"She'n scowan aym," as Boxer as faase e chora. "S'cumme shen. Er-lhiam dy bee shiu abyl dy chur kione er y wyllin gheayee m'egooish. Ta sthock mie dy liooar dy chlagh er ny haglym. Cha row agh mee er-mayrn aym, son shen as ooilley. Dy insh dhyt yn irriney, ta mee er ve jeeaghyn roym lesh taitnys gys cheet dy ve my haue. As foddee, er yn oyr dy vel Benjamin cheet dy ve shenn neesht, dy jean ad lhiggey dasyn cheet dy ve ny haue ec yn un tra as ve ny chumraag dou."

"Shegin dooin shirrey cooney chelleeragh," as Clover. "Roie, pheiaigh ennagh, as insh da Squealer ny t'er haghirt."

Ren ooilley ny beyn elley roie back gys y thie eirinagh dy insh da Squealer y naight. Cha nee agh Clover ren tannaghtyn marish Boxer, as Benjamin, ren lhie sheese lhiattee ry lhiattee rish Boxer as, gyn gra veg, ren eh freayll veihsyn ny carchuillagyn lesh yn amman liauyr ehey. Lurg mysh kerroo oor haink Squealer rish, lane dy erreesh as dy imnea. Dooyrt eh dy row yn Cumraag Napoleon er chlashtyn, as yn trimshey s'diuney ehey, mychione y drogh-aigh shoh ec fer jeh ny obbreyn smoo leighalagh 'sy ghowaltys, as v'eh reaghey hannah dy chur Boxer son lheiys 'sy thie lheiys ayns Willingdon. Va ny beyn gennaghtyn beggan neu-aashagh mychione shoh. Er-lhimmey jeh Mollie as Snowball, cha row baagh erbee elley er n'aagail y gowaltys, as cha mie lhieu smooainaghtyn mychione y chumraag ching oc ayns laueyn fir dooinnoil. Agh ren Squealer shickyraghey ad dy aashagh dy voddagh y fer lhee baagh ayns Willingdon cur lheiys da Boxer 'sy chooish shoh ayns aght smoo cooilleenagh na veagh ry yannoo 'sy ghowaltys. As mysh lieh-oor ny s'anmey, tra va Boxer er chouyral beggan, v'eh currit, lesh doilleeid, dy hassoo er ny cassyn ehey hene as haink eh rishyn shooyl dy baccagh back gys y stholl ehey, raad va Clover as Benjamin er n'yannoo lhiabbee vie dy choonlagh er-e-hon.

Rish yn daa laa er-giyn hantee Boxer 'sy stholl ehey. Ren ny muckyn cur boteil vooar dy stoo lheiys jiarg-bane, hooar ad 'sy choyr lheiys 'sy chamyr oonlee, as hug Clover ee eh da Boxer daa cheayrt 'sy laa lurg lhongaghyn. 'Syn astyr yinnagh ee lhie sheese 'sy stholl ehey as loayrt rish, choud's ren Benjamin freayll veihsyn ny carchuillagyn. Ren Boxer fockley magh nagh row arrys ehey mychione ny v'er haghirt. Dy row couyral mie jeant ehey, oddagh eh jerkal rish tannaghtyn bio rish three bleeaney elley, as v'eh jeeaghyn roish gys ny laghyn sheeoil oddagh eh ceau ayns corneil yn aber vooar. Shoh veagh yn chied cheayrt dy row soccar ehey dy yannoo studeyrys as dy hareaghey ny inçhyn ehey. V'eh fosyn, v'eh dy ghra, dy chur laghyn elley y vea ehey da ynsaghey yn daa lettyr as feed er-mayrn jeh'n abbyrlhit.

Agh cha noddagh Benjamin as Clover ve marish Boxer agh lurg ny ooryn obbree, as v'eh ayns mean y laa dy daink y van dy chur lesh ersooyl eh. Va ny beyn ooilley gobbraghey er gartilhan ny napinyn fo oaseirys muck, tra va yindys orroo fakin Benjamin cheet lhigey veih'n ard va troggalyn y ghowaltys, as eh caayney ec baare e chora. Shoh va'n chied cheayrt ren ad rieu fakin Benjamin greesit – dy jarroo, shoh va'n chied cheayrt ren peiaigh erbee fakin eh lhigey. "Dy bieu, dy bieu!" dyllee eh. "Tar shiu ass laue! T'ad cur lesh Boxer ersooyl!" Gyn fuirraghtyn er saraghyn veih'n vuck, ren ny beyn brishey ersooyl veih'n obbyr as ren ad siyragey back gys troggalyn y ghowaltys. Kiart dy liooar, ayns shen er y chlose va van mooar dooint, as daa chabbyl dy hayrn, lesh lettyryn er y cheu jeh as dooinney va jeeaghyn dy ve sleetchagh as va ceau bowler lesh cruinn injil ny hoie ayns soiag yn immanagh. As s'follym va stholl Boxer.

Ren ny beyn cruinnaghey mygeayrt y van. "Slane lhiat, Voxer!" as adsyn ooilley cooidjagh, "slane lhiat!"

"Ommidanyn! Ommidanyn!" deie Benjamin, as eh corlheimeraght mygeayrt-y-moo as sthampey y thaloo lesh ny yngnyn beggey ehey. "Ommidanyn! Nagh vel shiu fakin ny ta scrui er çheu y van shen?"

Hug shen er ny beyn scuirr, as va tostit ayn. Ghow Muriel toshiaght er lettraghey magh ny fockleyn. Agh ren Benjamin ish y heiy ry lhiattee as choud's va tostit agglagh ayn ren eh lhaih magh:

"Alfred Simmons, Buitçhoor Cabbil as Broieder Glooie, Willingdon. Delleyder Shehghyn as Meinn Chraue. Cooid son Thieyn Moddee.' Nagh vel shiu toiggal y bun jeh shen? T'ad cur lesh Boxer dy ve marrooit ec y Vuitçhoor Cabbil!"

Ren eam dy scoagh brishey magh ass ooilley ny beyn. Ec y traah shoh ren y dooinney er y toieag immanagh greesaghey lesh kip ny cabbil ehey as ren y van gleashaghey magh ass y chlose as drid bioyr ehey. Ren ooilley ny beyn geiyrt er, as adsyn yllagh magh ec baare ny coraaghyn oc. Ren Clover seiy ee hene roee gys y toshiaght. Ghow y van toshiaght er troggal bieauid. Hug Clover eab er greinnaghey ny oltyn poinnee eck dy lhigey, as haink ee lhee keimyragh. "Voxer!" dyllee ee. "Voxer! Voxer! Voxer!" Kiart ec y traah shoh, myr dy beagh eh er chlashtyn y musthaa çheumooie, ren eddin Voxer, lesh y schimmeig vane sheese y stroin ehey, çheet rish ec yn uinnag veg ec jerrey y van.

"Voxer!" deam Clover ayns coraa atçhimagh. "Voxer! Magh lhiat! Magh lhiat dy bieau! T'ad cur lesh oo gys dty vaase!"

Ghow ooilley ny beyn toshiaght er yn eam, "Magh lhiat, Voxer, magh lhiat!" Agh hannah va'n van troggal bieauid as goll ersooyl voue. V'eh neu-hickyr ren Boxer toiggal ny va Clover er n'ghra. Agh shallid ny s'anmey ren yn eddin ehey goll ass shilley veih'n uinnag as haink y feiyrt jeh bwoalley feer vooar jeh ingyng çheusthie jeh'n van. V'eh cur eab er brebbal e raad magh ass. Traah dy row, yinnagh breb ny ghaa veih yngnyn Boxer v'er smoashal gys skirragyn y van. Agh atreih! va'n niart ehey ersooyl; as lurg paart dy hraa haink y feiyrt dy yngnyn bwoalley dy ve ny s'faase as ren eh lhee ersooyl. Dy debejagh ghow ny beyn toshiaght er yeearee er y daa chabbyl va tayrn y van dy sthappal. "Chumraagyn, chumraagyn!" dyllee ad. "Ny jean-jee cur- lesh dty vraar gys e vaase!" Agh ren ny broutyn bolvaneagh, ro almoragh dy hoiggal ny va taghyrt, cur ergooyl ny cleayshyn oc as hrog ad y bieauid oc. Cha daink eddin Voxer gys yn uinnag reesht. Ro anmagh, ren peiagh ennagh smooinghtyn mychione siyragey er oaie as dooney y ghyat queig-barryn, agh lurg shallid elley va'n van ny trooid as goll dy tappee ass shilley sheese y raad. Cha row Boxer rieu ry akin reesht.

Three laghyn ny s'anmey v'eh er ny vograghey magh dy row eh er n'gheddyn baase 'sy thie lheiys ayns Willingdon, ny yei dy row dagh cooney currit oddagh y ve ec cabbyl. Haink Squealer dy insh y naight da ny fir elley. V'eshyn hene, v'eh dy ghra, kionefenish ayns ooryn jerrinagh Boxer.

"Shilley smoo ennaghtagh v'eh honnick mee rieu!" as Squealer, as eh troggal seose e chrubbane dy skeabey ersooyl jeir. "Va mee liorish e lhiabbee ec y tullogh yerrinagh. As ec y jerrey, bunnys ro faase dy loayrt, dooyrt eh myr hannish ayns my chleaysh dy row yn un

seaghyn echey, va shen dy gheddyn baase roish my row kione currit er y wyllin gheayee. 'Er oaie, chumraagyn!' ren eh sansheraght. "Er oaie ayns ennym yn Irree Magh. Gowaltys ny Beiyen aboo! Bea veayn da'n Chumraag Napoleon! Ta Napoleon kiart dy kinjagh.' V'ad shen ny fockleyn s'jerree echey, chumraagyn."

Ayns shoh ren ymmyrkey Squealer caghlaa doaltattymagh. Haink tostid er rish shallid, as ren ny sooillyn beggey echey ceau shillaghyn bieau dy ourys veih çheu gy heu roish my ren eh goll er.

Va fys er jeet dasyn, as eshyn, dy row faaue ommidjagh olk er ve currit mygeayrt ec y traa va Boxer currit ersooyl. Ghow shiartanse jeh ny beiyen tasteey dy row cowrey er y van ren cur lesh Boxer ersooyl, "Buitçhoor Cabbil", as ren ad dy feer siyragey dy yannoo briwnys dy row Boxer goll er cur gys y vuitçhoor cabbil hene. V'eh bunnys erskyn credjue, as Squealer, dy voddagh baagh erbee ve cho bolvaneagh. Gyn ourys, ren eh yllagh magh dy jymmoosagh, as eh scuitçhal y famman echey as corlheimeraght veih çheu gy heu, gyn ourys va fys oc dy row nyn leideilagh ennoil, y Cumraag Napoleon, ny share na shen? Agh s'feer aashagh va'n bun jeh. Roish nish by lesh y vuitçhoor cabbil va'n van, as v'eh er ny chionnaghey ec yn er lhee baagh, nagh row er pheintal foast harrish y çhenn ennym. Shen yn aght haink y marranys dy ve ayn.

S'mooar va feaysley ny beiyen lurg daue shoh y chlashtyn. As tra hie Squealer er dy hoilshaghey magh tooilley myn-phoyntyn jallooagh jeh lhiabbee vaaish Voxer, y kiarail yindyssagh va goit echey as ny stooghyn lheiys costallagh, er-nyn-son ren Napoleon eeck gyn smooinaghtyn er y chostys, ren ny ouryssyn jerrinagh oc lheiie ersooyl as va'n trimshey dennee ad er baase nyn gumraag er ny veeinaghey liorish y smooinaght dy row eh maynrey tra hooar eh baase.

Haink rish Napoleon hene 'sy çhaglym Jedoonee er-giyn as ren eh fograghey magh oraid giare ayns onnor Boxer. S'neu-possible v'eh, v'eh dy ghra, dy chur lesh corp marroo nyn gumraag er-son v'ad dobberan dy oanluckey eh 'sy ghowaltys, agh va oardagh er ve currit echey son slongan mooar dy ve jeant veih ny lauryssyn ayns garey y thie eirinagh as currit er oaie Voxer. As ayns laa ny ghaa, v'eh fo ny muckyn cummal jinnair mooar cooinaghtee ayns onnor Boxer. Hug Napoleon kione er yn oraid echey lesh cooinaghtane er daa reih-raa keeayllagh Boxer, "Nee'm obbraghey ny s'jeadee" as "Ta Napoleon kiart dy kinjagh" – raaghyn keeayllagh, v'eh dy ghra, as by red mie eh dy jinnagh dagh baagh ad y ghlackey dasyn hene.

Y laa pointit son y jinnair mooar, va van groseyr er ny imman sheese veih Willingdon as hug eh kishtey mooar fuygh stiagh ec y thie eirinagh. Yn oie shen haink y feiyer jeh goaill arrane dy garroo as dy tharmaneagh, as geiyrt er shen haink red ennagh va feiyral gollrish tuittym-magh elgyssagh as va kione currit er mysh nane-jeig er y chlag lesh smoash feer vooar dy ghlonney. Cha ren peiagh ennagh gleashaghey 'sy thie eirinagh roish munlaa y laa er-giyn, as hie fockle mygeayrt dy row ny muckyn, veih boayl ennagh ny boayl elley, er chosney yn argid dy chionnaghey dauesyn hene kishtey elley dy ushtey bea.

Cabdil X

Hie bleeantyn shaghey. Haink ny imbaghyn stiagh ayn as hie ad magh reesht, ren beaghyn giarey ny beiyen siyragey shaghey. Haink traa nagh row peiagh erbee er mayrn as va

cooinaghtyn echey er ny shenn laghyn roish yn Irree Magh, er-lhimmey jeh Clover, Benjamin, Moses y feeagh as kuse dy vuckyn.

Marroo va Muriel; va Bluebell, Jessie as Pincher marroo. Va Jones marroo neesht – hooar eh baase ayns thie son sheer-veshtallee ayns ard elley ny çeerey. Va Snowball jarroodit. Va Boxer jarroodit, agh ec fer ny ghaa as va enn oc ersyn. Shenn laair roauyr va Clover nish, neu-lhoobagh ny oltyn eck as beoyn ec ny sooillyn eck dy ve carbeigagh. V'ee daa vlein erskyn yn eash dy ve ny taau, agh ayns firriny cha row baagh erbee er jeet dy ve ny haau ayns rieughid. Va'n eie mychione cur ry lhiattee corneil yn aber son beyn va roie ayns eash er ve jarroodit foddey er dy henney. Nish va Napoleon ny chollagh muck lane-aasit as yn trimmid echey kiare claghyn as feed. Cho roauyr va Squealer, s'goan v'eh abyly dy fakin magh ass ny sooillyn echey. Cha nee agh shenn Venjamin va foast, son y chooid smoo, myr v'eh rieu, er-lhimmey jeh ve beggan ny smoo lheeah mychione ny cabbyn echey, as, neayr's baase Boxer, ny s'groamee as ny s'tostagh na v'eh rieu.

Va cretooryn foddey ny shlee ayns earroo er y ghowaltys nish, ny yei nagh row y bishaghey cho mooar as v'ad jerkal rish ayns ny bleeantyn moghey. Va ymmodee beyn er nyn ruggyr, dauesyn nagh row yn Irree Magh agh shennaghys faase, currit mygeayrt trooid beal arrish, as va fir elley er nyn gionnaghey nagh ren rieu clashtyn mychione y lheid roish my daink ad. Va three cabbil ec y ghowaltys nish, chammah's Clover. V'ad nyn meyn braew ynrick, nyn obbreeyn arryltagh as nyn gumraagyn miey, agh feer volvaneagh. Haink eh magh nagh row fer erbee jeu abyly dy ynsaghey yn abbyrlhit shaghey yn lettyr B. Ren ad soiaghey jeh dy chooilley red va inshit daue mychione yn Irree Magh as mychione bun-eieyn y Vaagherys, as er-lheh veih Clover, er-e-son va arrym oc gollrish myr mec jee; agh s'dooyteilag v'eh dy row ad toiggal monney jeh.

Va raah smoo ec y ghowaltys nish, as v'eh reaghit ny share: v'eh eer er ve jeant ny smoo lesh daa vagher va kionnit veih Mnr. Pilkington. Va kione er ve currit dy speideilagh er y wyllin gheayee fy yerrey hoal, as by lesh y ghowaltys nish mwyllin woallee as troggyder traagh er-e-hon hene, as va reygyrryn dy hroggalyn noa elley er ve currit stiagh ayn. Va Whympet er chionnaghey dasyn hene cart voddee. Agh ny yei, cha row ymmyd jeant jeh'n wyllin gheayee dy ghientyn pooar lectragh. Va ymmyd jeant j'ee dy vlieh arroo, as ren shen cosney vondeish braew argidoil. Va ny beyn gobbraghey dy creoi er troggal mwyllin gheayee elley reesht; tra va'n fer shen jeant, va'n fockle goll er gra, veagh ny dynamo-yn currit stiagh aynjee. Agh ny nheeghyn dy chur soaillid, jeusyn va Squealer keayrt dy row er n'ynsaghey ny beyn dy ghreamal, ny sthollin lesh soilshaghyn lectragh as ushtey çeheh as feayr ayndaue, as y çhiaghtin obbree three laghyn, cha row ad nish goll er loayrt mychione. Ren Napoleon cremmey eieyn nyn lheid shen myr noi spyryd y Vaagherys. Va'n eer vaynrys, v'eh dy ghra, ny lhie ayns obbraghey dy creoi as ayns aghbaghee spaarailagh.

Ayns agh ennagh v'eh jeeaghyn myr dy beagh y gowaltys er jeet dy ve ny s'berçhee, gyn cur er ny beyn hene dy ve veg ny s'berçhee – er-lhimmey, dy jarroo, ny muckyn as ny moddee. Foddee dy row shoh ayns paart er yn oyr dy row whilleen muck as whilleen moddey ayn. Cha nee nagh row ny cretooryn shoh gobbraghey, rere yn oash oc hene. Va obbyr gyn jerrey ayn, myr nagh row Squealer rieu skee jeh soilshaghey magh, ayns oaseirys as reaghey y ghowaltys. Va mooarane jeh'n obbyr shoh jeh sorçh dy row ny beyn elley ro almoragh dy dy hoiggal. Myr sampleyr, dinsh Squealer daue dy row eh er ny muckyn baarail laboraght foawragh dagh laa er reddyn quaagh enmyssit "coadanyn", "tuarastyllin", "coontaghyn giarey" as "memoranda". V'adsyn shoh nyn duillagyn mooarey dy phabyr as feme er coodaghey dy çhionn ad lesh screeu, as cho Leah's v'ad er nyn goodaghey 'syn agh shoh, v'ad

losht 'syn urnish. Va shoh jeh'n scansh smoo son foays y ghowaltys, va Squealer dy ghra. Agh ny yei, cha ren ny muckyn ny ny moddee noadyr troarey bee erbee liorish nyn obbyr hene; as va ymmodee jeu, as s'creeoil dy kinjagh va'n mian-bee oc.

Da ny fir elley, va'n vea oc, choud's va fys oc er y chooish, kiart myr v'eh rieu. Dy cadjin v'ad accryssagh, v'ad cadley er coonlagh, v'ad giu jeh'n logh uyll, v'ad tooilleil ayns ny magheryn; 'syn gheurey v'ad boirit lesh yn eayrid, as 'sy tourey lesh ny carchuillagyn. Ny keayrtyn yinnagh ny fir shinney ny mast'oc boirey er ny cooinaghtyn faase oc as hug ad eab er jannoo briwnys row reddyn, ayns laghyn moghey yn Irree Magh, tra va eebyrtys Jones foast ny cooish noa, ny share ny ny smessey na nish. Cha row cooinaghtyn oc. Cha row veg oc rish dy chosoyley y vea oc nish: cha row veg oc dy yeeaghyn er agh rollaghyn ny fysseree v'ec Squealer, va gyn caghlaa ayns cowraghey magh dy row dy chooilley red cheet dy ve ny share as ny share. Hooar magh ny beyn nagh row agh dy easley y cront; agh erbee, va row monney traa oc son sheiltyn er lheid ny cooishyn nish. Cha nee agh shenn Venjamin va gra dy row cooinaghtyn echey er dagh myn-phoynt e vea liauyr as dy row fys echey nagh row cooishyn rieu er ve, ny nagh row ad arragh cheet dy ve, foddey ny share ny foddey ny smessey – va accryys, doccar as molley jannoo seose, v'eh dy ghra, leigh gyn caghlaa y vea.

Agh son shen as ooilley, cha ren ny beyn rieu coayl cree. Ny smoo ny shen, cha ren ad coayl, eer rish shallid, yn ennaghtyn oc jeh onnor as cair dy row ad nyn olteynyn jeh Gowaltys ny Beyn. Shoh va foast yn un ghowaltys 'sy chlane cheer – ayns Sostyn ooilley! – by lesh as va goll er obbraghey ec beyn. Cha ren fer erbee jeu, cha nee eer y fer saa, cha nee eer ny noa-roshteyderyn va currit stiagh veih gowaltysyn jeh meeilaghyn ny feed meeiley ersooyl, scuirr veih goaill yindys er shen. As tra cheayll ad y gunn buirrooghey as honnick ad y brattagh geayney bennalt ec baare y chroan, ren ny creeaghyn oc lhieney lesh moyrn beayn-hassooagh, as haink y cowag oc dy ve mychione ny shenn laghyn feniaghtagh, mychione eebyrtys Jones, mychione screeu ny Shiaght Annaghyn, mychione ny cahghyn mooarey ayndaue va ny ruegeyderyn stiagh dooinnoil er ve currit mow. Cha row fer erbee jeh ny shenn ashlyshyn er ny hreigeil. Poblaght ny Beyn, j'eeish ren Major faaishnys, tra veagh magheryn glassey Hostyn gyn cowrey erbee jeh cassyn dooinnoil, shen foast goll er credjal oc. Laa ennagh harragh ee: foddee nagh jig ee dy Leah, foddee nagh jig ee ayns laghyn baagh erbee va bio nish, agh foast v'ee ry heet. As foddee dy row eer carr 'Beyn Hostyn' goll er cronane dy follit ayns shoh as ayns shen: ec yn chooid sloo, she'n irriney ee dy row fys ersyn ec dy chooilley vaagh er y ghowaltys, ga nagh b'lhoys da peiagh erbee goaill arrane eh er ard. Foddee dy nee creoi va'n vea oc as nagh row dagh nhee ny v'ad jerkal rish er ny chooilleeney; agh va fys oc nagh row ad gollrish beyn elley. Dy beagh accryys orroo, cha row shen er coontey cur bee da fir dooinnoil tranlaasagh; dy jinnagh ad obbraghey dy creoi, ec y chooid sloo v'ad gobbraghey dauesyn hene. Cha row cretoor erbee nyn mast'oc va goll er daa lurgey. Cha dug cretoor erbee "Mainshtyr" er cretoor ennagh elley. S'corrym va dy chooilley vaagh.

Laa dy row dy moghey 'sy tourey, hug Squealer sarey er ny kirree dy eiyrt ersyn, as ren eh dyn leeideil magh gys preaban reeastagh ec kione elley y ghowaltys v'er jeet dy ve feie lesh biljyn beih aegey. Ren ny kirree ceau y clane laa fassaghey jeh ny duillagyn fo oaseirys Squealer. 'Syn astyr beg hie eshyn hene back gys y thie eirinagh, agh, er yn oyr dy nee earish cheh v'ayn, dinsh eh da ny kirree dy hannaghtyn 'sy voayl v'ad ayn. Fy yerrey ren ad tannaghtyn ayns shen rish slane shiaghtin, as choud's yn traa shen honnick ny beyn elley veg jeu. Va Squealer maroo son y chooid smoo jeh dagh laa. V'eh gysaghey ad, v'eh dy ghra, dy ghoaill arrane noa, as va feme er preevaadjys son shen.

Kiart lurg da ny kirree çheet back myr v'eh, fastyr beg aalin dy row tra va ny beyn er chur kione er yn obbyr oc as v'ad goll nyn raad back gys troggalyn y ghowaltys, dy daink shutternee cabbil agglit ass veih'n chlose. Fo aggle, hug ny beyn sthap orroosyn. She coraa Chlover v'ayn. Ren ee shutternee reesht, as ren ooilley ny beyn goaill toshiaght er lhigey as ren ad siyragey stiagh 'sy chlose. Honnick ad ny va Clover er n'akin.

Va muck fyrryn shooyl er ny cassyn jerrey echey.

Dy jarroo, Squealer v'ayn. Beggan staghylagh, myr nagh beagh eh oayllagh rish cummal seose e hrimmid mooar dy liooar 'syn ymmyrkey shen, agh lesh slane cormid, v'eh talkal harrish y chlose. Shallid ny s'anmey, magh ass dorrys y thie eirinagh haink strane liauyr dy vuckyn, as v'ad ooilley shooyl er nyn gassyn jerrey. Ren paart jeu eh ny share na fir elley, va fer ny ghaa eer beggan corragh as jeeaghyn myr dy by vie lhieu maidjey dy chooney lhieu, agh ren dagh fer jeu cosney y clane raad mygeayrt y chlose dy speeideilagh. As fy yerrey hoal va gullal feer vooar dy voddee as gerrym gyere ass y chellagh doo, as magh lesh Napoleon hene, ny hassoo jeeragh dy ard-ooasle, as eh ceau shillaghyn bieau mooaralagh veih çheu gy heu, as lesh ny moddee corlheimeraght mygeayrt-y-mysh.

V'eh gymmyrkey kip 'sy chrubbane echey.

Va tostid agglagh ayn. Lesh yindys, fo aggle as cruinnaghey ry cheilley, yeeagh ny beyn er y strane liauyr dy vuckyn marchal dy moal mygeayrt y chlose. V'eh myr dy beagh y theihll er ve çhyndaaít bun-ry-skyn. Eisht haink traa lurg da'n ghreain hoshee ltheie ersooyl as tra, dyn y wooise da dy chooilley red – dyn y wooise da'n atçhim oc roish ny moddee, as da'n oash oc, ren lhiasaghey trooid ny bleeanlyn liauyrey, tannaghtyn rieuu gyn gaccan, gyn cremmey, cre erbee haghyragh – foddee dy beagh ad er ve aarlooy dy loayrt fockle ennagh dy phlaiynt. Agh kiart ec y traa shen, myr dy beagh cowrey er ve currit, ren ooilley ny kirree brishey magh ayns maaley feer vooar –

"Kiare lurgaghyn mie, daa lurgey NY SHARE! Kiare lurgaghyn mie, daa lurgey NY SHARE! Kiare lurgaghyn mie, daa lurgey NY SHARE!"

V'eh goll er rish queig minnidyn gyn scuirr. As liorish y traa haink ny kirree dy ve kiune reesht, va'n caa dy loayrt fockle dy phlaiynt er n'gholl shaghey, er yn oyr dy row ny muckyn er varçhal back 'sy thie eirinagh.

Dennee Benjamin stroin broddeck noi yn shlingan echey. Yeeagh eh mygeayrt. She Clover v'ayn. Va ny shenn hooillyn eck jeeaghyn dy ve ny s'dullyree na v'ad rieuu. Gyn veg y ghra, hayrn ee dy mial ec y whing echey as ren ee eshyn y leeideil mygeayrt gys kione y toalt vooar, boayl va ny Shiaght Annaghyn scruiit. Rish minnid ny ghaa v'ad nyn shassoo as blakey er y voalley feeit lesh ny lettyryn baney er.

"Ta my hilley failleil," as ish fy yerrey. "Eer tra va mee aeg, cha dod mee lhaih ny va scruiit ayns shen. Agh t'eh jeeaghyn dou dy vel y boalley neu-ghollrish myr v'eh. Vel ny Shiaght Annaghyn myr v'ad keayrt dy row, Venjamin?"

Dy yannoo caghlaa, ren Benjamin coardail rish brishey y reill echey, as ren eh lhaih magh jee ny va scruiit er y voalley. Cha row veg ayn nish er-lhimmey jeh un Anney ynrican. Va shen:

S'CORRYM TA DY CHOOILLEY VAAGH

AGH TA SHIARTANSE DY VEIYN NY S'CORRYMEY NA FIR ELLEY

Lurg shen cha row eh jeeaghyn dy ve quaagh tra, y laa er-giyn, va ooilley ny muckyn va oaseirey obbyr y ghowaltys gymmyrkey kippyn ayns ny crubbaneyn oc. Cha row eh jeeaghyn dy ve quaagh dy chlashtyn dy row ny muckyn er chionnaghey dauesyn hene radio, dy row ad reaghey dy chur stiagh ayn çhellvane as dy row ad er reaghey oardaghyn son 'John Bull', 'Tit-Bits' as y 'Daily Mirror'. Cha row eh jeeaghyn dy ve quaagh tra va Napoleon ry akin, as eh talkal ayns garey y thie eirinagh lesh piob 'sy veaal echey – cha row, cha row eer tra ren ny muckyn goaill eaddeeyn Jones magh ass ny pressyn-eaddee as hug ad moosyn ad, as Napoleon hene ry akin ayns cooat doo, breechyn roddaneyr as gaiteryn liarey, choud's ren yn reih vuc arkagh echey çheet rish ayns gooyn sheeidey tonnagh va Bnr. Jones cliaghtit rish ceau Jedoonee.

Shiaghtin ny s'anmey, 'syn astyr, ren earroo dy chartyn moddee imman neese gys y ghowaltys. Va cuirrey er ve currit er çhaghterys dy eirinee naboo dy yannoo keayrt scrutee. V'ad er nyn leeideil ooilley mygeayrt y ghowaltys, as v'ad gra dy row ammys mooar oc er dy chooilley red ren ad fakin, as er-lheh er y wyllin gheayee. Va ny beyn gartilhan y magher napin. V'ad gobbraghey dy jeadagh as s'goan v'ad troggal seose nyn eddinyn veih'n thalloo, as gyn fys oc eddyr dy ghoaill smoo aggle jeh ny muckyn ny jeh ny keayrtee dooinnoil.

Y fastyr beg haink garaghtee ard as brishey magh dy arraneyn veih'n thie eirinagh. As dy doaltattym, ec feiyr ny coraaghyn co-vestit, va ny beyn lesh mian son fys. Cre oddagh ve taghyrt sthie ayns shid, nish son y chied cheayrt va beyn as fir dooinnoil çheet ry cheilley as co-chormid eddyr oc? Lesh un aigney ghow ad toshiaght er snaue cho kiune as oddagh ad stiagh ayns garey y thie eirinagh.

Ec y ghiat ren ad leaystey, bunnys ro agglit dy ghoill rhyboo, agh ren Clover leeideil stiagh ad. Hie ad er baare ny chassyn oc gys y thie, as ren lheid ny beyn as v'ad ard dy liooar blakey stiagh ec uinnag y hamyr vee. Ayns shen, mygeayrt y voayrd liauyr, va nyn soie lieh-ghussan jeh ny eirinee as lieh-ghussan jeh ny muckyn smoo scanshoil, as Napoleon hene ny hoie 'syn ynnyd onnoroil ec kione y voayrd. Va ny muckyn jeeaghyn dy ve dy slane ec nyn aash ayns ny caairyn. Va'n çeshaght er ve goaill soyllay jeh gamman er ny kaartyn agh v'ad er scuirr veih rish tammylt, as v'eh jeeaghyn dy row shen dy ghoaill iu-laynt. Va podjal vooar goll mygeayrt as va ny meddyryn goll er aa-lhieeney lesh lhune. Cha dug peiagh erbee baght da eddinyn feyshtagh ny beyn va blakey stiagh ec yn uinnag.

Va Mnr. Pilkington, Foxwood, er hassoo seose, as e veddyr 'sy laue echey. Ayns tammylt beg, v'eh dy ghra, yinnagh eh shirrey er y çeshaght v'ayn dy ghoaill iu-laynt. Agh roish ny jinnagh eh shen, va fockle ny ghaa as eh gennaghtyn dy row eh ersyn gra.

She oyr dasyn dy ve jeant magh dy mooar, v'eh dy ghra – as, v'eh shicky, dauesyn ooilley va kionefenish – dy ennaghtyn dy row traa liauyr dy vee-hreisht as dy vee-hoiggalys er jeet nish gy kione. Rish tammylt – agh cha nee dy row eshyn, ny fer erbee jeusyn va kionefenish nish, er ve ny pharteeas da lheid y varel – agh rish tammylt va shellooderyn ooasle Gowaltys ny Beyn goll er jeeaghyn er, cha niarragh eh lesh noidys, agh foddee lesh paart ennagh dy ourys, liorish nyn naboonyn dooinnoil. Va taghyrtyr donney er ve ayn, va eiyeen marranagh er n'gholl mygeayrt. Va ennaghtyn ec sleih dy nee neu-ghooghysagh v'eh dy row gowaltys ayn by lesh, as va goll er stiurey ec, muckyn as magh ass shen dy beagh eiyrtys boiragh er y naboonys. Va roauyr eirinee er ghlackey lesh gyn brialtys dy liooar, dy jinnagh aigney dy chied as dy neu-smaght goaill niart ayns lheid y ghowaltys. Va imnea er ve oc mychione ny

eiyrtysyn er ny beyn oc hene, ny eer er ny failleydee dooinnoil oc. Agh nish va dy chooilley dooyt y lheid shen er ve immanit ersooyl. Jiu va eshyn as e chaarjyn er chur keayrt er Gowaltys ny Beyn as er scrutaghey dagh oardagh jeh lesh nyn sooilyn hene, as cre v'ad feddyn? Cha nee ynrican dy row saaseyn slane heose rish y laa ayn, agh smaght as doaie lhisagh jannoo seose sampleyr da dy chooilley eirinagh ayns dy chooilley voayl. V'eh credjal dy row eh kiart ayns gra dy row ny beyn sinshley ayns Gowaltys ny Beyn cooilleeney obbyr smoo as v'ad geddyn bee sloo na beyn erbee elley 'sy chountee. Dy jarroo, va eshyn as e chumraagyn ny keayrtee elley jiu er nakin ymmodee reddyn v'eh fouesyn cur er bun ayns ny gowaltyssyn oc hene çhelleeragh.

Yinnagh eh kione y chur er ny goan echey, v'eh dy ghra, liorish cur trimmid reesht er ny ennaghtyn caarjoil v'ayn, as lhisagh ve ayn, eddyr Gowaltys ny Beyn as e naboony. Eddy muckyn as fir dooinnoil cha row, as cha row feme er, mee-choardail bentyn rish ny cooishyn oc er chor erbee. Va ny doocaryn oc as ny doilleeidyn oc jeh'n sorçh cheddin. Nagh row y doilleeid lesh lught obbyr y red cheddin dy chooilley voayl? Ayns shoh haink eh dy ve baghtal dy row Mnr Pilkington er çhee soilshaghey magh da'n çeshaght raa aitt ennagh jeant aarloo dy kiarailagh, agh rish tammylt beg wheesh v'eh goit liorish y spoyrt echey nagh vod eh fockley magh eh. Lurg da goll er plooghey dy mooar, as ny caghlaaghyn smeggyl echey çheet dy ve gorrym-jiarg, haink eh lesh lhiggey magh eh: "My vees ny *beyn* sinshley *euish* dy streeu rish," as eshyn, "ta'n *theay* injil *ainyn*!" Ren y BON MOT shoh cur orroosyn mygeayrt y voayrd buirrooghey; as ren Mnr. Pilkington cur moylley as soylley reesht da ny muckyn er ny rheynnyn bee injil, er ny ooryn obbree liauyrey as er ve ooilley cooidjagh gyn jannoo bigginyn jeh ny beyn, myr v'eh er nakin ayns Gowaltys ny Beyn.

As nish, dooyrt eh fy yerrey, dy jinnagh eh briaght jeh'n çeshaght dy hassoo seose er nyn gassyn as dy yannoo shicky dy row ny glonnaghyn oc lane. "Gheiney seyrey," hug Mnr. Pilkington kione er, "gheiney seyrey, shoh diu iu-laynt: Da palçhys Gowaltys ny Beyn!"

Va horaaghey creeoil as sthampey dy chassyn ayn. Wheesh taitnys ghow Napoleon dy ren eh faagail yn ynyd echey as haink eh mygeayrt y voayrd dy chlinkal e veddyr noi shen ec Mnr. Pilkington roish my ren eh folmaghey eh. Tra va'n horaaghey er lhaggaghey reesht, ren Napoleon, v'er hannaghtyn ny hassoo, cur er fys daue dy row fockle ny ghaa echey dy ghra neesht.

Gollrish dagh oraid Napoleon, v'eh giare as bentyn rish cree ny cooish. Va eshyn neesht, v'eh dy ghra, maynrey dy row y traa dy vee-hoiggalys ec kione. Rish tammylt liauyr va faaueyn ayn – currit mygeayrt, va oyr ec credjal, liorish noid goanlyssagh ennagh – dy row red ennagh cleiy fo reddyn, ny irree magh noi oc, 'syn ymmyrkey echey as ec e chumraagyn. V'eh currit gys nyn lieh dy row ad cur eab er greinnaghey irree magh mastey beyn ny gowaltyssyn naboo. Cha nod veg ve ny sodjey veih'n irriney! She'n un yeeearree v'oc, nish as ayns ny laghyn t'er n'gholl shaghey, dy chummal ayns shee as lesh cochianglyssyn traghtee cadjin lesh nyn naboony. Va'n gowaltys shoh as va'n onnor echey ayns gurneil eh, dooyrt eh neesht, ny ventyr co-obbragh. Va ny barganeyn screeuee, as eshyn dyn gummal, lesh ny muckyn ooilley cooidjagh.

Cha row eh credjal, v'eh dy ghra, dy row veg jeh ny shenn ouryssyn foast er-mayrn, agh va shiartanse dy chaghlaaghyn er ve jeant er y gherrid ayns coorse cadjin y ghowaltys as lhisagh yn eiyrtys jeh shen cur er y hoshiaght barrantys eer ny sodjey. Roish nish mastey beyn 'sy ghowaltys va oash bolvaneagh dy liooar dy row ad cur "Cumraag" er y cheilley. Va shoh dy ve castit. Va oash feer whaagh er ve ayn neesht, gyn yss er y vun jeh, dy row ad marçhal

moghrey Jedoonee shaghey bollag chollagh muck va treinit gys stob 'sy gharey. Veagh shoh, neesht, castit, as va'n vollag er ny oanluckey hannah. Foddee dy ghow e cheayrtee tasteey, neesht, jeh brattagh geayney va bennalt veih baare y chroan. Dy ghow ad, foddee dy beagh ad er chur geill dy row yn ingin as yn eairk vane jeusyn roïe va cowraghyn er, er ve scryssit magh nish. She brattagh geayney gyn cowrey veagh ayn maghey shoh.

Cha row agh un chremmey echey, dooyrt eh, bentyn rish oraid feer vie as nabooagh Mnr. Pilkington. Va Mnr. Pilkington er jeet er feie er "Gowaltys ny Beiynt". Cha noddagh fys v'eh echey – er yn oyr dy row eshyn, Napoleon, kiart nish fograghey magh eh yn chield cheayrt – dy row yn ennym "Gowaltys ny Beiynt" er ve scryssit magh. Maghey shoh veagh y gowaltys er enn myr "Gowaltys y Vannor" – as shen, v'eh dy chredjal, va'n ennym kiart bunnidagh echey.

"Gheiney seyrey," hug Napoleon kione er, "nee'm cur diu yn un iu-laynt as roïe, agh ayns cummey elley. Lhieen shiu nyn glonnaghyn da'n oirr. Gheiney seyrey, shoh my iu-laynt: Da palçhys Gowaltys y Vannor!"

Va'n horaaghey creeoil cheddin as roïe as va ny meddyryn er nyn volmaghey gys y drundin. Agh choud's va ny beiynt çheumooie blakey er y reayrt, v'eh jeeaghyn dauesyn dy row red ennagh quaaagh taghyrt. Cre v'ayn va er ny chaghlaa ayns eddinyn ny muckyn? Ren shenn hooillyn moal Clover goll veih'n derrey eddin gys yn eddin elley. Va paart jeu as va queig smeggylyn oc, ec paart va kiare, ec paart va three. Agh cre v'ayn va jeeaghyn dy ve ltheie as caghlaa? Eisht, lurg da'n woalley bass çheet gy jerrey, hrog yn çeshaght neese ny kaartyn oc reesht as ghow ad er lesh y ghamman va er ny vrishey stiagh er, as ren ny beiynt snaue dy tostagh ersooyl.

Agh cha row ad er n'gholl agh feed stundayrt tra hug ad sthap orroosyn doaltattymagh. Va musthaa dy choraaghyn çheet veih'n thie eirinagh. Ren ad siyraghey back as yeeagh ad stiagh ec yn uinnag reesht. Dy jarroo, va troiddey fergagh goll er. Va yllagh magh ayn, bwoalley er y voayrd, shillaghyn gyere ouryssagh, obbal elgyssagh. Va moir y voirey jeeaghyn dy ve dy ren chammah Napoleon as Mnr. Pilkington cur sheese unnane spade ec y traa cheddin.

Va daa choraaj jeig gyllagh magh dy corree, as v'ad ooilley gollrish y cheilley. Gyn feysht erbee, nish, cre v'er jeet er eddinyn ny muckyn. Ren ny cretooryn çheumooie jeeaghyn veih muck gys dooinney, as veih dooinney gys muck, as veih muck gys dooinney reesht: agh hannah v'eh neu-possible dy ghra cre va'n derrey yeh as cre va'n jeh elley.

Mee Houny 1943-Toshiaght Arree 1944

YN JERREY